

Mizo Hnam Hla (1961—1986)



Mizoram State Library

10613



F. LALTHANZANG

Mizoram State Library

10613



MIZO HNAM HLA

First Edition : 2005
Copies 1000
MIZORAM STATE LIBRARY
Acc. No. 10613
Acc. by Mary
Class. by L. L. L.
Cat. by L. L. L.
Sub Heading by
Transcribed by
Location No :
Aman : Rs. 60/-

STATE LIBRARY
MIZORAM : AIZAWL
Acc. No. 28678
Date Recd. 27/3/09
Class. by
Cat. by

Published by C. Zama and Printed at the Mizoram Govt. Press

HRIATRENG NAN



Lalthangliana



Zairemthanga



Thangzuala

Pu Lalthagliana Overseer (J.E.) PWD, a nau Zairemthanga Guwahati University-a Pre Medical zirlai leh an unau zinga pang ber Thangzuala (TZA) Govt. High School-a pawl 8 zirlai te chuan Zoraminn zalenna a hmuh theihna turin MNF party in Independent a puan atang khan an hnathawh lai leh an zirlai te kalsanin an unau thumin an rammu a. An ni pathum hi Pu H.Philipa leh Pi Rothangi fa sawmlehpakhat zinga mi an ni a. Chhungkaw khawsa thei tak leh hlum taka awm thin an ni a, an unau sawmlehpakhat te chu an upat dan indawtin :- Lunghnema, Pahlira, Lalnunnema, Lalthagliana, Vanlalmawia, Lalsawmliani, Zairemthanga, Lalnipuii, Lalhuliana, Zoramthangi leh Thangzuala (TZA) te an ni. Hemi lehkhahu buatsah laia an unau la dam te chu :- Lunghnema, Vanlalmawia, Lalsawmliani, Lalnipuii leh Zoramthangi te an ni.

Pu Lalthagliana leh Zairemthanga te hi MNF rammu sawikara Administration lam khawih Civil Dept. ah awmin Pu Lalthagliana hi Phawngpui Bunga Lunglei khawpui bial Deputy Commissioner a ni a, Zairemthanga hi Phawngpui Bung ah Supply Inspector a ni a, an pang ber Thangzuala hi chu silai keng pawlah teli 'V' Battalion ah a awm thung a.

Ni 8-2-1969 khan Lunglei atanga khawthlang lam Darngawn khuaah Zairemthanga hi vai sipaiin an kaphlum a. Zairemthanga an phumna hmun tlawh tura kal a u Pu Lalthagliana chu ni 24-2-1969

khan vai sipai Jat Regiment in a nau thlan a thlen hmain Lungchen daiah an kaphlum ve leh ta a ni. Pu Lalthangliana ruang hi Lungchemah phum a ni a. An tlum ber Thangzuala 'V' Battalion chu a hriselna a that loh avangin 1974 khan a chawl a. A thian ter kan la thlakhleh em em laiin ni 17-5-2002 khan cancer natna avangin Chatuan ramah min chawlhsan ta a ni.

He hnam hla hi Pu Lalthangliana te unau thum hriatreng nan ka hlan e.

September 2005
Aizawl

C.Zama
Chawnpui, Aizawl.

THUHMA

Mizo hnam a awm chhunga theihngihl tawh ngai loh tur leh Mizo history-a chhinchhiah ni kumkhua tawh tur Mizoram Independent movement chu 1966 khan a rawn her chhuak a. He movement rawn her chhuah tirtu MNF party chu 1961 khan din a ni a. MNF Party din a nih atangin hla lama tui leh ngaihtuahna hmang ten hla an phuah a.

Independent movement tan a nih atangin harsatna leh buaina chhumpuiin Zoram a chim a. Zoram chhana feh chhuak MNF rammu sawrkar leh India sawrkar aiawh ten inremna thuthlung 1986 a an ziah thleng kum 25 chhung khan hla tam tak a rawn piang a. Chung hla te chu MIZO HNAM HLA tia hriat leh ziak a ni a. RAM NGAII HLA tia sawi an awm bawk.

Chung Mizo hnam hla phuahu tam tak te chu piallei hnuaah zalin dairial an chang tawh a, hla thenkhat chu a phuahu hriat a ni lo a. Hla thu te hi a ziak chhawngtu leh a sa thin thenkhat ten an ziah dan leh an sak dan a dang hret hret a. A tira a phuahu ten an phuah dan lo anga ziak leh a phuahu ten a thluk an siam loh anga a thluk ti danglam pawh an awm nual a. He Mizo hnam hla tih buahah hian hla thenkhat chu a tira a phuahu te phuah dan anga ziak a ni a. A thluk hi chu a ziak atang ringawt chuan sawifiah a har hle a ni. Hla te hi a phuahu hming ziah sual palh a awm mai thei a, chutiang te a lo awm anih chuan chhiartu te ngaihdam ka dil a, chhut leh huna dik zawka chhut a nih theih nan min tanpuia min finchhuah turin chhiartu te ka ngen nghal e.

Hunpui inlumlet hian mihring nunah thu tam tak a sawi a, chu hunpui inlumletin a lumleh pui hringfa te chanchin chu thu leh hla ziaik mi ten an ziaik a, hlaah an phuah bawk a. Chutiang hun inlumlet chanchin chu thangthar ten an chhiara an zir thin a ni.

1961 kum khan MNF party a lo ding a, Mizoram Political Party zinga mmahnia ro-inrel Idependent policy-a nei awmchhun party a ni a. Mizo Union Party in Lal a ban a, Lal thuneihna chu mipui kuta a awm leh tak si loh avangin mipui ten Independent ram niha mahni duh dan anga rorelna khawl han bun ve chu an chak a. MNF policy mahni kea dina mahnia ro-inrel chu an rilrem zawng tak a nih avangin MNF party chuan mipui te rilruah bu a khuar a. Mite rilru chawktio turin hla a rawn piang nghal a. Pu K.Zoliana'n

Aw Zoram i hmingtha kha,

Liam tir lo la thlang kawrvai lo hnar la,

I ram chhan la, i hnam tan hmangai la,

Enteh an sawm che lungualpui turin,

Lo hnar lul suhi ram tan do ve rawh.

tih hla a phuah a. MNF party chuan he hla hi campaign nan a hmang a, MNF volunteer-te chu khawtinah kalin a huhoin he hla hi an sa a. A ngaithlatu mipuite thinlungah thu a sawi thuk riau aniang chu nula leh tlangval tam tak volunteer-ah an inpe a. Mizo zinga hla phuah thiam Pu Rokunga (RIP) chuan MNF party policy nena inhmeh tak mai hla

Harh la, harh la, Zoram i tlai ang e,

Harh la, harh la, huntha a liam ang e,

Tho la, tho la, kein lo ding ta che,

Ngai rawh, chu tawtawrawt a ri,

Bei leh ngam ngei turin min au.

tih hla te. Aw Zoram i kein ding rawh tih hla leh Aw ka pianna kan Zoram nuam tih hla te a phuah bawk a. Heng hla te hian Zoram dung leh vang a deng chhuak a, MNF party in an pawla mi lak luh nan a hmang tangkai hle a ni.

A hla phuah pakhat Aw nang kan Lal kan Pathian tih chu MNF party in an duh hle a, a phuahtu Pu Rokunga hnenah Mizo hnam hla (Mizo National Anthem) atan an dil a. A nin a lo remti a. MNF party in Independent a puan hma kum 2 vel atangin Mizo hnam hla atan a lo puang tawh a ni. Party in conference an neih tum te, meeting pawimawh an neih tum te leh thil pawimawha party mipui te an inhmukhkhawm chang chuan he hla hi khun takin an sa thin a ni. A hla thu hi hrilhfhiah leh hran pawh ngai lovin a tluangtlan tha a. chang khat chauh i tarlang ang aw.

Aw nang kan Lal kan Pathian,
 I hming ropui ber se,
 I hmaa kan lo kun hian,
 Kan dil ngaithla ang che,
 Kan awmdan tur ngaihtuaha
 Mipui kan inkhawmin,
 Finna ropui min pe la,
 Ro min rel sak ang che.

Pu Laisiama Biate khua Independent poilicy tui pui em em tu chuan 'Hmana pi-pu chena ka ram ka hmangaih chu' tih hla leh 'Aw Mizo fate zawng zawng hian' tih hla a rawn phuah a, heng hla te pawh hian Zoram dung leh vang a deng chhuak a, volunteer ten an tuipui em em a, a hla thu te hi han bel chiang ila, Independent lam a kaw k ruih mai a, volunteer te tan chuan tuipui awm reng pawh a ni e Hmana Pi -Pu chena ka ram ka hmangaih chu tih chang hnihnaaf chuan ti hian a rawn phuah a

Enteh kan pen dawn ta,
 Kan ram chhanchhuak turin,
 Thlemna tangka rothangpui leng aiin,
 Khaidiat hruaia Tan In kawng zawh huamin,
 Aw nang Zoram chhan che hi kan thlang ta.

Aw Mizo late zawng zawng hian tih hla chang thumnaah chuan
Sulhnu kan Pi kan Pu te chuan,
Tawihlohpuan chu an sin a,
Keini pawn hnam huaisen nan
Kan hnam puan i zar ve ang.

tin a phuah a. Heng hla te hi volunteer ten an sa uar hle a. Pu
FLaltuara'n 'Tleitit kekawr zuh lubuk tih hla a sak tan tirh lam kha
a ni a, Pu FLaltuara hla sak dungthulin volunteer kekawr zuh tak
tak lubuk bawh si te chuan Pu Laisiama hla phuah te chu an sa a, an
lam thle nghuau nghuau mai a ni. Hetih hun laia nula leh tlangval
hawihaih chin deuh te chuan volunteer-a inpek loh chu rual pawl
lohna chikhatah an ngai hial a ni.

LALTANPUIA

1964 kum a rawn her chhuah chuan MNF party in hmaa sawnin Zokhaw tam takah Block, Group leh Unit din a ni tawh a, khawtinah campaign an nei reng bawh a. Sialsuk khua MNF unit chuan, “Pu Laltanpuia (RIP) hla phuah tir ila a tha ang,”tiin an sawi ho a. Pu Laltanpuia ti ti pui turin Pu Pazawna Samlukhai an ruat a. Pu Pazawna’n Pu Laltanpuia chu a ti ti pui ta a, “Aw Zoram i finna leh thiam i thuruk chu puang chhuak la,” tih hla hi ni 24-6-1964 khan a phuah ta a ni.

1996 kum khan Major Khawlhmingthanga (Pakhawla) nen Pu Laltanpuia hi a in Sialsukah kan tlawh a, amah hi pa ti ti thiam leh thenrual pawl thiam a ni bawh a, min lo dawngsawng tha hle a. A ti ti tui zawng tak ‘Pialleiah inthen mah ila, min rawn zawng chhuak leh la Parte van pialralah,” tih hla a phuah chhan te min hrilh hnu chuan “Aw Zoram i finna leh thiam i thuruk chu puang chhuak la,” tih hla a “Rorelna khawl hmaa zam lo nang kan vote ang che,” tia ka phuah, “Rorelna khawl hmaah zam lo la, kan vote ang che,” tia a phuah loh anga an sak a ngaih mawh thu a sawi chhuak a.

Pu Laldenga an man a, Silchar Jail-a a tan khan Vai roreltu te hmaah zam lovin huaisen takin roreltu te a hmaachhawn a ni tih mi sawi ka lo hria a. Chuvangin a hruai MNF party hi inthlan hunah chuan vote ngei tur a nih hi tiin “Rorelna khawl hmaa zam lo nang kan vote ang che,” tiin ka phuah a. A chang tawp ber “MN ka sawi thei lo kan ram hi kan ram a ni” tia ka phuah pawh “Zoram hi kan ram a ni” tiin an sa a. Ka phuah laia ka rilruah chuan kan ram tia kan sawi mai Mizoram map chhung chauh hi a huap lova; Mizo hnathlakhte kan chenna Burma ram te, E.Pakistan, Tripura leh Manipur lam te pawh a huam vek a vangin Mizo te chenna chin hi kan ram a ni tia ngaihtuah ka ni a. Chuvangin kan ram hi kan ram a ni tiin ka phuah a ni. Ka phuah loh anga sa leh sawi in hriata in hmuh chuan ka phuah chhan in hrilh zel dawn nia,” tiin min chah nghe nghe a ni.

He hla hi Mizo hnam hlabua a inziah dan leh Pu Lalzuithanga'n Laltanpuia leh a hla te tih bua a ziah dan nen a inanglo nual a. Chang khatna tlar hmasa ber chu Mizo hnam hlabu published by MNF Gen. Hqrs. leh Mizo hnam hlabu published by Saphianaah chuan Aw Zoram i finna leh thiamna thuruk chu puang chhuak la tiin a inziak a. Laltanpuia leh a hla te tih Pu Lazuthanga siamah chuan Aw Zoram i finna leh thiam i thuruk chu puang chhuak la tiin a inziak a.

Chang khatna tho tlar 5 na Kan ram mawi tak hi Zoram tana puang turin tia inziak chu, Pu Lalzuithanga ziaakah chuan Kan ram nuam hi Mizo hnam tana puang turin tiin a inziak thung a. Mizo hnam hlabua chang 2 leh chang 3 na chu Pu Lazuthanga siam nen chuan a inlet hlauh a. Mizo hnam hlabua chang 3 na chu Pu Lalzuithanga siamah chuan chang 2 na a ni a. Mizo hnam hlabua chang 2 na chu Pu Lazuthanga siamah chuan chang 3 na a ni hlauh thung.

Mizo hnam hlabua chang 2 na tlar khatna leh tlar 2 na chu Ram leh hnam a din chhuah nan thiamna famkim neih kan tum chuan tiin a inziak a. Pu Lalzuithanga siamah chuan Hnam leh ram a hmingthana thiamna famkim neih kan tum chuan tiin a inziak thung a. Chang hnihna tlar tawp ber chu Mizo hnam hlabuah MN ka sawi thei lo Zoram hi kan ram a ni tia ziaak a ni a.

Pu Lazuthanga siamah chuan MN ka sawi thei lo kan ram hi kan ram a ni tiin a inziak baw.

A hla thu te hi a tluangtlan thain a thluk nen a inchawih hle a, Pu Laltanpuia'n a phuah atanga vawiin ni thlengin a la lar em em a. He hla hi Pi Lalsangzuali Sailo in sain cassate-ah a khung a, a cassette chu MNF Party in inthlan dawn a piangin campaign nan a hman rim hle a. MNF party a awm chung chuan he hla hi Mizo mipui te rilruah a thi tawh dawn lo niin a lang.

Pu Laltanpuia'n Mizo mipui te himna ber chu inlungualna
niin a hria a, mi dang ten pawn lam atangin bei mahse mipui kan
lungual tlat chuan engmahin kan inlungualna chu a tichhe thei
lovang

Aw Zoram, aw kan Zoram,
Aw Zoram ka ngaihlu che;
I chhunga hnamze tinreng te,
Lungualna kan insuihkhawm hian,
Finna kulhpui, hriatlohna thim hi chhem kiang la,
Lungualna hi ram leh hnam tan
Himna kulhpui ber a lo ni e.

tiin thiam takin a thunawnah chuan a rawn chhep chhuak a.

Chutih rual chuan Mizoram dinhmun a han thlir a, India sawrkar
in Mizo mipui te a enkawl dan chu lungawi thlak loh. khuahkhirh
leh vaubeh Lung Ina tang ang mai niin a hria a.

Hnam leh ram a hmingthana
Thiamna famkim neih kan tum chuan,
Aw tuna kan ram dinhmun hi dawn ve la
Lung a awi nem maw..!

Ram leilung leh mipui zawng zawng hi tang kan ni...

tiin hnu a khar a ni.

1966 kum khan Sialsuk khua chu vai sipaiin an hal a, Pu
Laltanpuia in ngei pawh chu an hal ve a. An khua vai sipaiin an hal
ta mai chu a rilru a na em em a, an khaw kang chungchang chu hla
pahnnih a phuah a. Sialsuk khaw kang hla 1 na leh 2 na tiin a vuah a.
Sialsuk khaw kang hla 2 na hi ni 28-12-1966-a a phuah a ni. Sialsuk
khaw kang hla 2 na hi Pi Siampuii Sailo in All India Radio-ah a
khung a. AIR station atanga Pi Siampuii Sailo zai Sialsuk khaw
kang hla 2 na an tih chhuah chang chuan Sialsuk khaw mipui leh
Sialsuk khaw chhuak hmun hrang hranga awm ten thaw dep dep

chungin an ngaithla thin a ni. Sialsuk khaw kang hla 2 na chang 4
naah chuan

Puini a tawng kan vangkhua hian,

Lallai a sang tual tual;

Kawrvai i hnawl ang aw, zalen nan kaw! a eng mahna,

Rangka dartui ngeia'n i chuang ang aw,

Hlim zai i vawr ang thlang sappui biahzai a thang ta e.

tin hnu a khar a. A tlar 2 na Kawrvai i hnawl ang aw Zalen nan kaw!
a eng mahna tih lai thu hi hetih hun laia India Prime Minister Pi
Indira Gandhi-in a lo hria a, a duhlo hle nun Mizo sipai Aizawla
duty ten an sawi thin a, Indira Gandhi hian lo hre tak tak ang maw...!

Sialsuk khaw kang hla 1 na pawh hi a thu a tluangtlam thain
thiam takin Mizo tawng a remkhawm a, a thluk a mawin a sak a
nuambaw si a, chang 3 na hi han chhlar ve mah teh

Hmanah kan Pi Pu ten an chawi,.

Vangkhawpui par a chuar;

Kawrvai lian doral an chang ta,

Thinlai kaw! ang a var thei lo,

Tlangtinah pheisen lunglian,

Nghosai ang an hrang e,

Vangkhawpui leh lallai run mawitu,

Chengrang tuilian ang an la e.

Hla dang Independent kan ram tan tih a phuah baw! a, he hla hi chu
Mizoram tana a phuah hla dang te angin a lar ve lo a ni.

F. ROKIMA

Pu F.Rokima hi Lungleia awm a ni a, amah hi mi ril leh hla phuah thiam a ni a, hla tam tak a phuah a, Shillong-a sawrkar hna thawka a awm laiin 'Awmhar lunglen chang hian' tih hla hi a phuah a. Amah hi rammu ve lo mahse rammu ve anga inchanin ramhnuai reh ruih maia khawhar taka ka awm lai chuan, hun kal tawh te ka ngaihtuah kual vel a, mi tena min sawisel tur pawh dawn chang lovin lunglengin ka van ruai ruai a, kan lo thi ta a nih pawhin Zoram kan ngaih vanga thi kan ni mai a niang chu tia a suangtuahna chu hlaah arawn siam a

Awmhar lunglen chang hian, ka dawn vel thin a,

Hmanlai ngaiin run ramrehah hian ;

Chhawl ang ka uai a ni, tlangrel dawn lo hian,

Kan fam tak leh aw Zoram nang ngaih vang.

tiin chang khatna chu a han thlawh a. A thunawna 'Kawrvai lo lian lungmawl vangin' tih lai hian sawi a hlawh hle a. A phuahtu Pu F.Rokima hi a hla phuah chungchang ka zawh hmain fam dairial a chang hman hlaui mai si a. Thenkhat chuan "Kan mawl leh at avanga vai sipai te hian min rawn run leh min rawn bei an ni a lawm," tiin MNF rammu te chu an deu sawh a. Thenkhat thung chuan "Vai sipai te hi an mawlin an a em em a, an mawl leh at vangin a lawm Mizo mipui te min rawn beih," an ti ve thung a. "Kawrvai lo lian an mawl vangin." tiin he lai tlar hi an sa lui kher thin a ni. A thunawn i bih zawk ang.

Kawrvai lo lian lungmawl vangin,

Rualduh te zawng sam ang thenin,

Engtikah dar ang tawng i maw ?

Ka nghakhlel em mai kei zawng thinlaiah.

A fanu Pi F.Zothanpuui (RIP) in he hla hi AIR ah a khung a. AIR in a zai an tih chhuah tum chuan MNF rammu rual ten, ramhnuai chhawl buk hnuai atang leh Puk chhung atang tein an lo ngaithla a. an beng chauha ngaithla lovin an mit leh ka nen an ngaithla a, a za zawh chuan, "A va han thiam tak em..! Pasal a nei tawh ang em le..? A la nei lawng chu maw...!" tiin an check tlak tlak thin a ni.

CAPT. LALTHAFELA



Capt. Lalthafela hi Aizawl Chaltlanga awm a ni a, 1962 atang khan MNF Party a zawm a, Independent puan a nih khan a nupui leh fa te kalsanin a rammu ve nghal a. a nupui leh fa te pawh Aizawl chhuahsanin thingtlangah an kal (tlanchhia) a. Rammu val rualte E.Pakistana an chhukthlak hma kha chuan a nupui leh fa te nen an inhmu zauh zauh thei a. Engmah pek tur nei lova a nupui leh a fa te hmuhfo chu hrehawm a ti thin hle a. A chang chuan a nupui leh a fa te a hmuh theih tum pawhin a hmu lo lui fo thin a ni.

Tum khat pawh a nupui leh fa te Sihfa khuaa an awm lain hotu ten a nupui leh a fa te hmuh theihna chance an siam sak a, Sihfa pan chuan a kal ta a, naupang lawm tur engmah pek tur a nei loh avangin a nupui leh a fa te chu hmuh a hreh hle a, a hmuh loh chuan hmuh lehna chance vang tawh viauin a ring bawk si a. Sihfa a thlen chuan a nupui te awmna inah lut mai lovin daifem deuh inah a lut hmasa a, in neitu te naupang chu an nu a koh tir a. A thiannu a rawn thlen chuan, “ Naupang lawm tur engmah ka rawn hawn si lova, leina tur pawisa ka nei bawk si lova, in awmna rawn thlena naupang hmel hmuh ka hreh em mai, Pathian zarah ka damtha a, hemi inneitu te hnen atangin in dam thu ka hre bawk a, ti hian min hawsan la, in awmnaah chuan ka rawn kal lo mai ang c,” a ti a.

“Leh mai mai thin a, engmah leina tur i nei dawn lo tih te chu kan hresa vek a lawm, dam taka i hmel hmuh hi a lawm kan thlakhleh a, Pathian hnenah pawh kan dil thin. Tihian chhel takin Zoram tan i thawk zel anga, i hriselna a tha lova thiante hnung i zui thei lo a nih thlah erawh chuan inthlahrung miah lovin i rawn haw dawn nia, chutriang te a rawn thleng a nih loh chuan rawn haw suh ang che. Keini ho chu min rawn ngaihtuah reng reng suh. Khuanun zah a ngai anga, kan fate hi chu ka lo enkawl thei mai ang. Tirawh, i haw ang,” tiin a pasal chu a hruai haw a.

Capt. Lalthafela hi palian inkhaithli thlerh thlawrh, ngo lam deuh a ni a, fiamthu a duhin mi pawh a tihlim thiam hle a, Social leh Public meeting neih tum te chuan mite tinuitu ber a ni thin a, fiamthu thawh a thiam viau e ti lovin han ti ti tur lam hi a haihchham ve riau thung a, a kianga awm thin Mizo sipai te chuan, "Kan pu hi chu fiamthu a thawh thiam teh lul nen rin ai daihin a tawng duh lo," an ti ru sap sap thin a ni.

Rambuai hlim khan Central command 'V' Battalion tia hriat bawkah a awm a, vai sipai nen an inkap zauh zauh a, vai sipai an tuktlawm tum chuan a lawm thei em em a. 1967 kum khan Vanapa pawl kan ni e tih hla a phuah a. Chang khatnaah chuan Vanapa pawl an nih leh vai sipai laka an zam ngai loh thu te, an laka vai sipai an tlawm thu te chu

Vanapa pawl kan ni e,
 Kan zam ngailo vai tawnah,
 Kan thlang kawrvai India ho
 An zam leh ta kan tawnah

tiin a phuah a. A thunawnah chuan Mizo mipui te chu hlau lo leh thlaphang lo tura fuihin, Mizo hnahtlak tawh phawt chu tumah thlauhtlak bik leh duhsak bik an neih loh thu leh mipui te humhim leh chhan chu an tum ber a nih thu tiang hian a phuah a.

Lo thlaphang suh kan Zoram,
 Nangmah chhan tur kan lo kal,
 Mipui zawng zawng nunau nen,
 Tumah thlei bik kan nei lo.

'V' Battalion val rual te chuan vai sipai nena an inkah dawn tum chuan intihphur nan he hla bakah hian

Val rual zaleng hei zawng zingah,
 India ral lian tawna kal lo chu,
 Ziaam feng la tahpuan khawng la run chhungah
 Tichuan nuthaiah ka hel ang che.

tih hla hi an sa thin a. Vai sipai nena an inkaha hnehna an chan tum chuan Vanapa pawl hla hi pawr takin an sa thin a ni. Capt. Thafela hi 2003 khan chatuan ramah a chawl ta a ni.

S.VANPUILALA TIRHKOH



S. Vanpuilala hi Pu Lalngenga Sarlo (RIP) fapa a ni a. Muallung khua a ni. 1959 Mautam lai khan chanchin tha Luka ziak bung 19 na thu atang inhmuh chhuakin a piangthar a MNF rammu sawrkar hnuaia Pathian thu hril turin 1967 khan an in a chhuahsan a. MNF rammu sawrkara Army Headquarter-ah a lut a, Tirhko hna thawk tura appointment pek a ni a, a ni hi Tirhko hna thawk tura apoinment pek hmasak ber a ni. Offricer rank pek a ni nghe nghe a, a Commission No pawh 387 a ni.

Battalion hrang hrang 'L' Bn., 'V' Bn., 'T' Bn. leh 'Z' Bn ah te tirhko hnathawka sawn kual a ni a. A hnathawhnaah hian a inpe zo hle a. W.O. II Chuaauva leh Sgt. Clerk Tawna ten,"Tirhko S Vanpuilala kan Battalion ('V' Battalion)-a a awm lai 1969 khan a mumangah nula a lo ngai a ni awm a, a lunghnur nasa mai a, ni thum chhung chu a lungawi hmel hmuh tur awm lovin a tum hmau reng mai a. tuman an zawt tha ngam baw si lova, tum kher lova a nuih te pawh han nuih deuh sak zawk awm a nia, mumang mai mai te chu han ngath serious vak chi pawh a ni si lova.." an ti a , mi dang an inhrilh darh a, a hria apiang an nui deuh tet tet hlawm a.

Hemi kum vek hian Seiva kama an awm lain 'V' Battalion Biak In tur an sa a, an sak peih hnu chuan a bul vel Tirhko hin a tifar a, bawllhlawh phiah khawm chu a hal a, Biak In chu a kangkai palh ta hlah mai a, a phah deuha awm Capt. Chalrikhuma chuan, "Lo tlan khawm thui rawh u, Tirhko hpain Biak In a hal a, thelh a ngai" tin a au a An rawntlan khawm nghal thui a, a kan chhiat nasat hmain an thelh thei a.

Ptc. Sapa Serawl khua chuan, "Tirhko hpa hi a ti ho ngawt mai, hmanni lawkah a mumangah nula a mutpui a, lawmna chang hre

lovin a tum vel a, kei nin mumang ni lova a tak taka nula mut pui kan chak vei nen, a thil tiha tluang chi a ni hlei nem, tunahpawh keini ho hi kal khawm vat lo ila chu Biak In hi a hal fai vek ang chu..!” tiin Tirhkohpa hriat phak lohah fiamthu a thawh a, an nui ham ham a.

1971 kuma E.Pakistana an awm laiin Col. Lianhnuna, Pte. Rosiama ‘V’ Battalion, Pu Kawlchhawna, Pi Darhmingthangi leh midang te thihna chuan a rilru a luahkhat hle a. Khawhar taka zana a mut laiin ‘Lalpa buatsaih ram’ tih hla hi a phuah ta a ni. He lehkhabu buatsaih lai hian an chhungkuain Vaivakawnah an awm a, Vaivakawn Presbyterian kohhranah Upa a ni.

DOZINGA

Pu Dozinga hi Phulpui khua a ni a, MNF party din a nih hlim khan MNF party-ah a inpe a, Pu Laldenga te nen an campaign ho zak zak thin a ni. Independent puan a nih khan a nupui leh fa te kalsanin a rammu ve nghal a. Rammu sawrkarah chuan administration lam khawihin civil Dept. lamah a awm a. A mah hi pa ti ti thiam, thil sawi melh melh chi, kawm nuam tak a ni a, thian te a tithinur ngai lova, harsatna leh buaina hmunah pawh nui deuh hau thei mi a ni a, mi lungleng thei tak niin hla pawh a phuah nual a, rammu hla a phuah chu 3 a ni a, chung te chu 'Aw kan Zoram nuam suihlung phang lo la' 'Laikhum zau zaiin ka chawi dawn e' tih leh 'Pi Pu chena kan ram Mizoram' tih hla te an ni.

Aw kan Zoram nuam suihlungphang lo la tih hla chang khatnaah chuan Zoram nuam taka cheng Zofa te chu vai ho sal leh bawihah an awm kan phal lova, Pathianin kan dikna leh kan chanvo tura a ruat zalenna chu kan chan ngei theihna turin kan bei anga, kan hmuh hma chuan theihtawpin kan bei zel dawn a ni

Aw kan Zoram nuam suihlung phang lo la,
Thlang kawrvai bawih atan ka phal lo che,
Chung Pathian ruatsa i zalenna tur,
Theihtawpin kan bei zel ang.

tiin a han phuah a. Zantin maia Riakmaw savain riahna tur a zawng thin nia an sawi chu an mahni rammu ho chu Riakmaw savaah inchanin riahna tur hmun remchang lai zawnga zantin mai an han buai thin chu a thunawnah hmangin

Tlaitlain lenkaw! khua a lo thim hian,
Riakmaw sirva leng iangin;
Riahna run kan vai tukloh ramdaiah,
Piallei hmun rem kan bel e.

tiin a rawn chuktuah khawm a. Kan Pi leh pu ten an sawi dan chuan Riakmaw sava hi Thingthiang (Thiangthing) kungah chauh a riak

thei a, tlaia khua athim tan tirh hian Riakmaw sava chu riahna zawngin a thlawk kual thin a. A thlawh pah chuan 'Riak maw' tiin a hram a, chhangtu awm lova a reh thiap chuan Thingthiang a awm lo a ni tih a hria a, thlawk chungin a hram zel a, Thingthiang awmna a thlen chuan 'Thiang e' tiin a lo chhawn a. Thingthiang kungah chuan a riak ta thin a ni an ti.

MNF rammu ho te chuan he hla hi an duh hle a, khawimaw lai hmun ralmuang deuha an riah tum leh khaw chhunga Social an neih tum te hian he hla hi pawnpui sawr ang tluk tlukin an sa thin a ni.

Pu Dozinga hian a hla lo phuah tawh hmun rem lai chauha mu thin anga a phuah chu dikhlal deuhin a hria aniang chu, hla dang Laikhum zau tih hla a phuah leh ta a. He hlaah hian Mizoram dung leh vang khawilai hmun mai pawh an tan chuan mutna khum a nih zel zia rawn chham chhuakin, hmun rualrem leh hmun rualrem lo laiah pawh an mut mai thin a

Laikhum zau zaiin ka chawi dawn e,
Zalengin min sel lo ula, laikhum a zau
Piallei hmun rem rem lo pawh,
Chhawl buk zar hnuai hnuai lo pawh,
Tlaitla khawthim kan nanna piang
Khawilai hmun pawh kan zalna piang
Kan tan laikhum a chang zel e

Laikhum a zau, kan tan laikhum a zau ngei e.

tiin a rawn phuah a. He hla pawh hi rammu val rual ten an thiamin an sa rim hle a, a hla phuah pakhat 'Pi Pu chena kan ram Mizoram' tih hla pawh hi a thu a tluangtlam tha hle a, mahse 'Aw kan Zoram nuam suihlung phang lo la' tih leh 'Laikhum a zau' tih hla ang chuan a lar ve lo a ni. He lehkhahu buatsaih lai hian Pu Dozinga'n chatuan ram a pan tawh a. Zoram ka hmangaih che tih film a vai sipaiin putar nilumai an sawisak kha a mah Pu Dozinga a ni.

CAPT. CHHAWNTLUANGA

Pu Chalchhunga Chhangte leh
 Pi Biakhlani Chhangte te inkarah ni
 15-4-1938 khan a rawn piang a,
 Chalngengthanzamchungpathianlal-
 chhawntluanga tih chu a laiah hming
 a nu leh pain an sak a ni a, MNF
 rammu zingah chuan hming sei ber a
 hi hial awm e. Thinur laia hming
 puma lam vek chu a remchang lo viau
 mai thei a ni MNF-a a menroll-naah
 chuan Chhawntluanga tia ziak a ni a, a pianna khua chu Sialhawk a
 ni a, a hnuah Biatah an pem ta a ni



Vanrami

1962 kum khan MNF party a zawm a, 1963 kuma MNF party
 tana a campaign lain mipui te chu Zoram in zalenna an neih theihna
 tura MNF party zawma thangthar remhre zawk te hniakhnung zui ve
 tura sawmin 'Aw Zui ve teh thangthar lungfing' tih hla hi a phuah a
 Chang 2 naah chuan mipui te chu sum leh pai thaw hui leh hrechawm
 tuai ringawt tura sawm lovin Zoram hmangaiha an mahn rawn zawm
 ve mai tura sawmin

Sum tam sengah kan sawm lo che,
 Lu chhum ban chhum tuarah kan sawm bil lo che
 Kan sawm che ram i hmangaih chhan turin,
 Aw lokal rawh tunah lung i rualza ang.

tiin mipui te chu lungualpui turin hlai a sawm a, a hla hi a thluk a
 mawin a sak a nuam a, volunteer ten khaw hrang hrangah campaign
 nan an hmang ta nghal a ni.

1966 March ni 1 a MNF party in Independent a puan atang
 khan an inchhung lum chhuahsanin a rammu ve nghal a. Volunteer
 rammu leh vai sipai te chu an inkap ta zauh zauh a, vai sipai nena an
 inkah tawh chuan thi emaw hliam emaw an awm fo thin a. Inkahnaa

hlíam tuar kher lo te pawh natna avanga damlo te pawh an awm ta fo mai a, chung damlo te enkawl tur chuan nula te chu Nurse hna zirtirin training an pe a. 'Zoram par ang tivul turin' tih hla a rawn phuah leh ta a. A thunawnah chuan

Pheichheh mawi vala ten,
 Kan chawnban kan vawr siau e,
 Laitual lenmawi ten sakruang
 Dam nan nurse train-in
 Civilised Zoram par ang tivul turin.

tiin thiam tak maiin a han duang chhuak a. Kawr leh kekawr tlang hniar leh an sam kal zawnga bu nghuau nghuau khawpa sei te chu nula ten mawi an ti a. Chuvangin nu leh pa ten an silhfen inbel avanga sawisel lo tura duh thu chang 2 naah tarlangin

Chun leh zua te u min sel lo u,
 Kan silhpuan hniar awrhlaithi,
 Bahsam sei nghiau val hi,
 I mawi min ti tleitir lenmawi ten.

tiin thiam tak maiin a rawn thlawh a.

A mah hi mi lungleng thei tak leh thian ngaina tak mi a ni a Run Division-a Division 2 I/C hna a chelh laiin Tuivawl kan Vanbawng ramah camp an nei a. Camp-ah chuan a staff te nen an awm a. A staff Lalrinmawia chu ni 27-1-1968 niin Vanbawng khuuah chakkhai lam turin a tir a. Lalrinmawia khuah chakkhai lama a kal rawn haw chuan ni 27-12-1967 niin Capt. Lalrinthanga chu an khuah Biatah vai sipaiin an kaphlum tih a rawn hria a. A thianpa Lalrinthanga thih thu chuan Chhawntluanga chu a barakhaih nasa hle a. Ngawi reengin an buk chhuat chu a bih ta reng a. 'Ka thian tha ber a ni a sin' tiin a tawng chhuak a. Minute 5 dawn lai ngawi renga hnuai lam a bih hnu chuan a tho a, pen leh lehkhapuan a la a, an buk sira lungpui chungah chuan a thu a, a ziaak ta mawlh mawlh a. MNF-Party a awm chhunga ral tawh lo tur 'Aw i hming a dai lovang' tih hla a rawn phuah ta a ni. A thunawnah chuan a thianpa chu kum tam tak ral hnu pawha theihnghilh a nih ngai loh tur thu tiang hian a rawn phuah a.

Aw i hming a dai lovang,
 Thang leh thar chhuan tam leng mahse;
 I ram chhana i tawrhna hian a man taw e,
 Chham ang i zalna piallei hmun leh
 Zanmu chhing lo doral karah,
 Kan tuanna mual tuai ang tharin
 Nghilhni i awm lovang

A chang tawp berah chuan Lalpa kan hmangaih em em te chuan
 keini min hnuchhawnin i hnen lam an rawn pan ta. i Vantirhkoh ten
 lo lawmin i angchhung khawpui mawiah lo chawlh tir ang che tia
 Pathian hnena a dilpuina chu hetiang hian

Hnem thiam thintu hmangaih Lalnunnem,
 Kan lungduh kan lawmna ber ten,
 Kallai relin hnutiang min chhawn ta e,
 Thihna lui piah khawpui mawiah,
 Angel var ten chawimawina lo hlan se,
 Lo lawm ang che aw chatuan a tan.

a puuah a, he chang hian hnu a khar ta a ni.

Vanbawng ram atang chuan hmar lamah an pheizel a,
 Khawdungsei khaw tlawhchhanin ramhnuaiah camp an sa a, camp
 ah chuan an awm ta a. A khat tawkin Khawdungsei khuaah an chhuak
 zauh zauh a, thla khat zet an awm hnu chuan Khawdungsei khua Pu
 Lalseia fanu hmeltha tak Vanrami nen chuan an lo inhma duh ta a.
 August thla tir 1968 ah an inneri ta a ni. An inneri ni hian vai sipai
 Khawdungseiah chuan an lut a, Chhawntluanga te chu daiah relhruin
 an camp-ah an haw a. A staff zinga pakhat vai sipaiin an man chuan
 vai sipaiin an sawisak nasat lutuk tuar lovin an camp-ah chuan a
 hruai ta a. Zan dar 7.30 velah Chhawntluanga te camp hmun chu an
 thleng a, an kap ta a. Chhawntluanga te nupa chuan an thawmhnaw
 neih ang chhun pawh chuh kim hman lovin camp atang chuan an
 tlanchhuak a. Ramhnuaiah chaw ei lovin kamrah leh hnahnem ringin
 thla khat dawn lai an vak a, chutianga ramhnuaia khawsak reng chu
 fel lova an hriat avangin Vanrami chu an khuaah haw leh rih phawt
 mai se tun an ngaihtuah a.

Hetih lai hian Vanrami chu a ruak lova, “Ti hian in inah i lova khawsa leh rih phawt mai ang a, damte leh tluang taka nau i hring a nih chuan naute hming ka han hau lawk ang e. Mipa a nih chuan Lalchhanhima i sa ang a, hmeichhia a nih chuan Lalchhanhimi i sa dawn nia. Khuanun min hualhim zel ang a, Zoram tharah hlim takin kan la awm ho dawn nia,” tiin Chhawntluanga’n a nupui chu a chah a, Ratu khua loa lehlanga feh te haw rualin a thawn haw ta a ni.

1968 buhseng zawh hlimin Chhawntluanga, Tawnliana leh Nunenga te chu Vanbawng chul pawlah pawl-bukah an riak a. An muthilh laiin vai sipaiin an riahna pawlbuk chu an hual a, silai kausaa tinin tho turin an au a. Arawn tho hmasa ber Nunenga chu a malpuiah an kap a, Chhawntluanga leh Tawnliana chu an man a, duh tawka an nghaisak hnuah hruiin an hling a. hrui a hlin chung chuan an thianpa Nunenga chu an zawn tir a. Zan mi mut reh hnuah Vanbawng sipai post an thleng a, a tukah chuan Suangpuilawn panin an kal leh ta a. Suangpuilawn sipai camp-ah chuan nieng hmu phak lovin banker chhung thim thamah an tan tir ta a ni.

Suangpuilawn sipai camp-a an awm lai hian a nupui Vanrami chu rai teuh chungin Suangpuilawnah chuan a kal a, Suangpuilawn V/C te chu a pasal Chhawntluanga hmuh pui turin phungbawmah a sawm a. V/C te nen sipai post-ah chuan an kal a, Post commander chuan Chhawntluanga chu hmuh tir a lo phal hau lo mai a, Vanrami chu beidawng takin mittui nen a haw leh ta a ni.

Suangpuilawn atang chuan April thla tir 1969 khan a thianpa Tawnliana nen Khawruhlian panin an hrui thla a, Tawnliana Sawleng khua chu a chauh em avangin a kal thei ta lova, sipai te chuan a hnuhin an hnuk ta a. km 1 zet an hnuk hnu chuan a nunnain a tuar lova thi ta a ni. A ruang chu kawngsirah an zalh a, an kalsan nghal a. Chhawntluanga erawh chu chau tak chungin Khawruhlian a kal thleng thei a. Khawruhlian sipai post-ah chuan Banker-ah an tan tir leh a,

mahse a banker a thuk loh avangin khaweng a chhim thei a. Kawthalo leh santenin a tlakhuak avangin a chau hle a, chutia chau taka a awm lai chuan a nuin han kuangkuahin han bawih sawm se a duh hle a, a nu a ngai em em a, a hun tawp pawh hlat tawh lo niin a inhria a, chau tak chungin 'Min chawi rawh ka chau em mai' tih hla hi a phuah a. Khawruhlian post-a sipai te hi Suangpuilawn post-a sipai te angin an strict lova, chuvangin a hla phuah pawh Khawruhlian nula amah rawn kan tu te hnenah a thawn chhuak ru thei a ni. Min chawi rawh ka chau em mai a phuah chu tlem i tarlang ang aw..

Ka nu duh tak i hrai riang chawi,

Ram chhanin ka par a tliak,

Hlim leh lawmin ka muhil ang,

Min chawi rawh ka chau em mai.


Ka nu duh tak i hrai riang chawi,

Min pawm la i awm nghengin,

Hmangaih kutin min kuangkuah la

Min chawi rawh ka chau em mai.

Khawruhlian post-a thla hnih zet a tan hnuin ni 24-5-1969 khan Khawruhlian atangin Seling an pan pui a. Kan sawi tawh ang khan santen leh kawthalo hrikin rei tak a luhchilh avangin a taksa a chak lo hle a, kea kal an nih avangin a chauin a tui a hal hle a. Tuirini an thlen chuan tui-in a dil a, Tuirini lui tui chu a in ta khawlh khwih a. A in laklawh lai chuan, "A tawh tawh, kal leh nghal rawh," tiin an vin tuar tuar a. A chauh em avangin chawplehchilhin a tho nghal mai thei lova, thawh tuma tan a han siam lai chuan "I va han luhlul ve" tih leh vuak an rual a, tuih chuan a tlu hnawh a, an vaw zui nghal thuai thuai a, tho leh tur awm lovin chatuan ram a pan ta a ni. A thih hnu lawk hian a nupui Vanrami'n fapa duhawm tak a hring a, a pain a hming a lo sak lawk tawh chu ringin Lalchhanhima a ti ta a ni.

**GART. MALSAWMA**

Sept. Malsawma Zotlang Lunglei hi Zoram tana zalenna sualin
a rammy ye a, hla phuah lamah talent a lo nei tha riau mai a, hla 7 lai
a phuah a, a hla phuah te hi a thua tluang tlam thain a thluk a mawjin
a sak a nuam hlawn hla a. A hla phuah te hi Mizoram mawt zia leh
a chhunga cheng Zofa ten Zoram chu chhan an tumthu leh Zofa te
tanrua a ngaih zia lam a ni tlangpui a. A hla phuah pakhat 'Ka pianna
ram ngei tih chang khatnaah chuan Zoram a pianna ram chu nuam a
tih thu leh chu Zoram tana do tura a inpek thu rawn tarlangin

Aw Zoram ka pianna ram,
Thinlungin ka hmangaih che;
Rinawmin rawn par chhuak la,
Rual zawng khumin.

Aw Zoram nuam ka pianna tum ngei,
Chhawthlapui tang tual kan lenaa,
Ka thinlungin ka theih nghih lawng che,
I tan chauh ka inpek ang do turin/

tiin tluang fel takin a phuah a.

A hla pakhat 'Suanglungpuih nghih leh biahhu kan hlan'
tih chang 2 naah chuan Mizoram chu address in tunah chuan
tiinduhdahna hnuaih awwin i mawina chu par chhuak thei rib lo
mahse thilaphang reng reng awh thian chhan tih ngam val rualin
kan chhan dawn che. Zalenna sualtu kan nih angin harsatna engpawh
sutlang zel turin kan inhuam e

Tunah thim hnuaih lengin,
I hmel chui ri mahse,
Lungphang lo la, hnam fa te i tan kan ding,
Ram leh hnam thian chhan nan engpawh nuam zelin.
Kan tawn zel ang freedom fighter kan hi.

tiin a phuah a, kan sawi tawn ang khat a ni hi netiang lam phuah
hmem ber te zinga mi a ni aww e. He lehkhahu buatsaih lai hian an
chhungin Lunglei Zotlangan an aww

CAPT. NGURSALOVA

Capt. Ngursailova hian 1963 kum khan MNF party a zawm a, MNF in Independent a puan khan a rammu ve nghal a, sipai lamah awmin 'L' Battalion-ah a in enroll a. A mah hi pa ti ti ngah leh thenrual kawm thiam tak a ni a, thawnthu pawh ngaihnaawm tak a phuah a, mi lungleng thei tak niin hla pawh a phuah nual a, a hla phuah zinga a copy kan hmuh 5 chauh kan tarlang a. A hla te hi a thu a tluangin belhchian a dawl hle a, ram ngaih lam leh ram tana thawh a tul zia lam a ni deuh ber a. 'Piallei hringnun a nuam chuang lo' tih chang khatnaah chuan nula tlangval ten mahni inchhung lum an belh laiin kei ni chuan ramhnuai ngawpui hnuai chhawlbuk mai mai kan bel si a

Zankhua lo tlaiin rualduh zaleng zawng,
Vangkhawpui tualah siang an lawi,
Kei erawh tukloh ram lentu chhaw! hnuaiyah,
Rairah riang run chhaw! buk ka bel.

tiin hla thu tluang fel takin a nun dan leh a hun tawng a rawn sawi a. A chang 2 naah chuan, i thian te chuan kawppui neiin nupui fanau te nen an khawsa a, nang ve hi zawng ram tana thawkin khua i tlai zo mai dawn a lawm tiin ka nu in min rawn ti a

Kei ka chun riangin biahthu min rawn hlan a,
I rual duh ten hraileng chawiin,
Tangka cheng Rothangpui nen run an rem,
Ram zunah khua i tlai min ti.

tiin thiam tak maiin a rawn phuah a. Khaw chhunga awm te chu nuam tiin thlahlel mah ila. dikna sawi thei lova soal thuhnuaia kan awm reng si chuan nun a hlim chuang nang tiin a thunawnah

Kan vang khawpui tual nuam chu ngai mah ila,
Soal thim lal nunrawng te nena tuallen chu;
Piallei hringnun a nuam chuang si lo.

tiin thiam tak maiin a rawn phuah a.

E. Pakistana an chhuk thlak hnuin hotu ten training neiha intuan thar leh a tha tiin MTS (Military Training School) an siam a. Chutah chuan Battalion tina Officer leh NCO (Non Commission Officer) te training tir an ni a. Vawikhatah a ruala training vek theih a nih loh avangin a badge a badge-a hun in ang lova a inchhawka training tir an ni a. He MTS hi Mizoram chhunga zirna te nen tehkhinin, Mite thiam zir chuan khawpuiah zirna in tha tak tak an bel a, ram hmangaih pasaltha te thiam zir ve na chu ramril hla tak sai leh sakei te chettlatna a nive thung a ni tiin chang 1 naah a rawn phuah a. A thunawnah chuan 'Dikna vuana sual doin ralthuam chelek dan Zofa te hmakhua thlira an zirna MTS chu dam reng tura a duh thu a tarlang a.

A mi leng thiam zirna vang khawpui,
Sumtual zau lai, dar tuah run sang mawi,
Mihrang thiam zirna buannel ramdai,
Nghovar leh ziatial an lenna.

Aw sual do, dikna chhuangtu ten,
Pheilai khawngin chengrang an chawi,
Thiam tin an zir zalenna tur atan,
MTS damreng rawh Zoram tan.

tiin thiam tak maiin a duhthusam chu hlaah a rawn chantir a. He lehkhabu ziah lai hi chuan piallei hnuaiah chham ang zalin fam dairial a chang tawh a ni.

CAPT. D. THANGLIANA

Capt. D.Thangliana hi Darlung khaw chhuak a ni a, MNF in Independent a puan hnu khan rammu vein silai keng pawl 'Z' Battalion a zawm a. A mah hi hotu te thuawi thei leh disipline tha tak a ni a. Mi pawisawi hlau tak leh thian te pawh tibuai ngailo a ni a. Mizoram tan kum rei tak rammuin harsatna tam tak a paltlang a. MNF rammu sawrkar leh India sawrkar an inbiakrem hnu khan Remna Runah a rawn haw ve a. Tlangval ngawichawi tak e ti lovin hla phuah lamah rin aiin a inhlei a, hla tha tak tak 4 lai a phuah a. A hla phuah pakhat 'Zampuimanga Battalion hla' ah chuan pasaltha zamual liam tawh Zampuimanga hmingchawia kan sak 'Z' Battalion hi mipui hnenah ka han hril teh ang tiin

Zaiin kan hril dawn zaleng zawng zingah,
Thlafam chang hnu mihrang Zampuimanga,
Ram leh hnam chhan val rual sakhming hluana'n,
Kan chawi 'Z' Battalion kan ram tan.

A thunawnah chuan Zoram dung leh vanga mite thlamuan pui, pasaltha Zampuimanga hmingchawia 'Z' Battalion hming han put chu hnam sipai tan chuan a va inhmeah em, kan Zoram tan mawi takin par vul zel ang che

Zampuimanga Battalion, Mizo hnam sipai,
A mawi chuang e, i sakhming kan Zoram tan,
Zaleng zawng thinlai muantu a ni,
Par ang vul zel ang che kan Zoram tan.

tiin a thunawna phuah a.

MNF Day hlaah chuan thenrual tha leh Zo hnahthlak tawh phawt chu he ni (MNF Day) hi lawm tura sawmin

Chinlai rual duh Zofa zaleng zawng te,
I lawm ang u, he ni ropui hi,
Zaiin kan hril zel dawn e khuavela'n,
Sakhming mawi leh hlu kan Zoram tan.


A thunawnah chuan

Aw par ang hian vul la, sakhming mawi,
 Kan lawm lai piancham chawitu hming hluan,
 Zofa thinlai dumtu ber i lo ni,
 Dam reng la, MNF dam reng rawh.

tiin MNF dam reng tura a duhnain a thunawn a khar a.

Kan sawi tawh ang khan a rammut chhung hian hotu te mit a tlung hle a. Sipai tha leh thuawi entawn tlak chhinchhiahna sang ber Exemplary atan thlan a ni. He lehkhabu ziah lai hian MLA a ni a. N.Vanlaiphai bial atanga MNF party ticket-a thlan tlin a ni a, Nursery veng Khatlaah an chhungkuain an khawsa a ni.





Mizo mipui tam zawk ten MNF rammu te an thlawp avangin var sipar te an chefuh hlei thei lova, an thinun mipui nunau pawisawi lo te chu an nghaisa a, tam tak an man a, Tan Inah an khung baw a. Chu pawh chu duhtaw lovin an in an hal sak a, an bungrua te an tihehhiatsak baw a. Chutianga nasa taka an bei chung chuan mipui te rilru chu hneha hnehin a ti tangrua sauh zawk a. Dan phuahchawp hmangin thingtlang khaw chengker deuh te chu hmun laili (khaw laili) deuhah an hruaikhawm a. Hetia an hruaikhawm hian MNF rammu te chu che thei lo leh rem mai tura ngaihna an nei ni tur a ni.

Hruaikhawm tur khua te chu hruaikhawmna hmunah chenna tur in leh ei tur pek an tiam a. Hruaikhawm an nih hnuah an intiam angin eitur leh intur an pe leh si lova, naupang te chu riltamin an tap a. Chu an dinhmun hrehawm tak mai chu Pu Suakliana Riangtlei khuain hlaah arawn phuah a. Khawkhwm hla (Hruaikhawm hla) tin an vuah a. Pi Siampuii Sailo in he hla hi AIR ah a thun nghe nghe a ni. Mizo ten kan hun tawng tawh zingah chuan khaw sawikhawm hi a paw ber a, Zoram hmun tin mai chu a chul zo ta a ni ber mai a, hruaikhawmna hmuna awm te lah chu eitur nei lovin riltamin an awm hlawn si a..

Kan hun tawng zingah khawkhawm a paw ber mai,
Zoram hmun tin khawtlang puang ang a chul zo ta,
Ramtina mi khalkhawm nunau mipui te,
Chhunrawl avang, riakmaw iangin kan var e.

tin chang khatna chu a phuah a. A chang 2 naah chuan kan ram huntawng zel tur hi a ngaihtuah pawh ka ngaihtuah ngam lova, Sap ho kan rama awm thin te chuan min hawsan vek tawh baw si a, kan ram rethei tak enkawla tungding leh tur hian chanhai leh rethei te tanpuitu Pathian ngaih a va han zual tak em..!

Ka dawn sei ngam lo, kan ram lungngaihna hi,
Hnampui lungfing mingo valin hnutiang min chhawn,

Kan ram riangvai boral tur tungding leh tuin,
 Rairah chhantu chung Pathian ka ngai vawng vawng.
 tiin kan ram tungding turin Pathian a au va.

A chang tawp berah chuan tunhmaa chhungkaw kim leh
 thenrual te nena an lo chen hona leh an lo zai hona thin an in leh an
 khua te chu a chulin a ram zo tawh a, sava te chettlatna hmun fianrial
 leh khawhar mai an lo chang zo ta a ni

Chhungkim tea lenrual lungduh te nen,
 Zai kan vawrna van lal run leh khawtlang a dai.
 Thuva awmhar chun tawng lo ten an nghak e,
 Zarva lenna ramdai aw an chang zo ta.

tiin a tlang a kawm a.

Hc hla hian Zoram dung leh vang a deng chhuak a, Pi Siampuii
 Sailo in he hla a sak Radioa an tihchhuah tum chuan mi tam takin
 hnukulh teuh chungin an ngaithla a. Mi ten an ngaithla chak a, an
 ngaithla hreh bawk si a. Hruaikhawmna hmuna harsatna tawk mek
 nu leh pa te chuan mittui nen he hla hi an ngaithla a. Mi thenkhat
 chuan he hla hi Hla Lungchhia an ti hial a ni.

LALNGHENG

Pu Lalnghenga hi Ratu khua a ni a, Sawleng high School-a a thawh laiin Independent puan khan a nang a. Hetih lai hian a u Vanlalnghaka chu Aizawlah a awm a, Independent puan a nih ve leh khan an unau hian an rammu nghal ve ve a. Pu Vanlalnghaka hi silai keng pawlah telin 'V' Battalion a zawm a. Pu Lalnghenga hi Administration lam khawihthu pawlah telin Run Bunga Chalfilh Area 1 ah Assistant of Accountant hna a chelh a. He hna hi rei vaklo a chelh hnuah Inspector of Police-ah a awm leh a, he hna a chelh lai hian a hna chelh chu redesignate in Superintendent of Police a ni ta a. Run Bung pumpui a bial a, a hnu deuhah Lurh Bung pawh a enkawl tel ta a ni.



A u Lt. Vanlalnghaka hi Jan. 1967-a Tualbung khuaa vai sipai camp Mizo sipai ten an luhchilhnaah a tel ve a, a vanduaiah tangin a thi a, a nau Pu Lalnghenga nen an rammut hnuin vawikhatmah an inhmu ta lo a ni.

Pu Lalnghenga chu 1969 kum tirah E.Pakistanah a thian te nen an chhuk thla a, E.Pakistana an chhuk thlak hlim hian President Pu Laldenga remruatna angin SSA (State Security Agency) din a ni a, Pu Nghenga Commander a ni. Pu Laldenga'n India Intelligent te be turin Shillong-ah a tir a, Shillong-ah chuan RAW (Research & Analysis Wing) Deputy Director Subramaniam an bia a, Shillong-ah hian Pu Laldenga'n tum thum lai a tir a. Raw Deputy Director in thudelhkilh awmsa lova inbiak chu a duh lova, Pu Nghenga ten thudelhkilh awmsaa inbiak an duh bawk si lova, tum thum lai an inbiak hnuah an inthathen ta a ni.

Pu Lalnghenga hi lekhathiam saptawng pawh thiam tak a ni a, Pu Laldenga pawhin a chhuang ru hle a, lekhka pawimawh saptawnga ziah a ngaih chuan Pu Nghenga hi a ziah tir fo thin a ni.

Aizawl khawpuia Capt. Lalhleia nena an duty laiin ni 8-10-1972 khan Venghlui Aizawlah Lalhleia nen an man a. Lalhleia nen hian tlanchhuah tumin an tanna atang chuan an thlang kawngah a rualin an zuangthla a, a tlaksual avangin a kawng leh khup a tina a, a tlanchhuak thei ta lova, Lalhleia chauh a tlanchhuak thei ta a ni. He mi tuma Lalhleia tlanchhuak hian luman a nei ta nghe nghe a ni.

Aizawl Assam Rifle Quarter Guard-ah la pheiin Dark room (pindan thima) ah thla thum dawn lai an dah a, chumi hnu chuan khaweng chhim theiin an dah ve ta a. Hetih lai hian MNF rammu te chuan tanhmun bulfuk (Base area) an neih that loh avangin a rilru a hah thei hle a. MNF rammu te chu hnathawk peihlo leh chhiah khawn mai maia ngai an awm a. Lei rem kan rah hma hi chuan tute emaw chuan chhe tinreng min belin archuktuiloah min chhuah tho dawn a nih hi tiin a ngaihtuah a, 'Mizoram lungphang suh' tih hla hi a phuah ta a ni. A hla hian Zoram dung leh vang a deng chhuak a, nula leh tlangval ten an duh hle a, rammu val rualte pheii chuan an sa an sa thin a ni.

A changkhatnaah chuan Mizo mipui te dikna leh zalenna chu vai hoin chakna hmanga an awpbeh luih avangin Mizo mipui ten harsatna namen loa nasa an tawh thu a sawi lang a. Chutiang dinhmunah chuan ding mahse Mizo mipui te chu hlau leh thlabara awm lo tura fuihin an mahni chhan tura ram hmangaihtu te an din tlat thu a tarlang a.

Kan ram zalenna kalkhamin,
Thlang kawrvaiin chakna hmangin min bei,
An thlen tir hrehawm tuarna tinreng,
Zaleng naufa rairah min chan tir e,
Mahse ramchhan mihrang kan ngir,
Mizoram lungphang suh.

Chang 2 naah chuan hrehawmna leh harsatna tawkin sipaiin min nghaisa mahse ram tana beitu te kan nih avangin kan hlauin kan zam

lovang. Mi ten archuktuiloim min sawi mahse, min sawichhiatna
zawng zawng te i phur zel phawt mai ang, kan dinchhuah hma chuan
min sawiselna hi a reh chuang lovang tin

Hrehawm tinreng tuar mah ila,
Ka hlau lovang kan rm leh hnam tan hian,
Deusawntu ten min cheksawlh mahse,
Phur zel nang e, hming sawichhiatna te zawng,
Kan dinchhuah hma chuan kan ram tan,
Mawina kan khum chuang lo.

A thunawnah chuan Mizoram a hmangaith thu chham chhuakin tunah
mi ten hmusitin endawng mahse thangthar ten Pathian chakna
rinchhana hmelma vai sipai te an beih zel tur thu sawin

Mizoram, Mizoram ka hmangaith che,
Tunah hnehchhih phatsan ni nh mah la,
Thang leh thar ten Lalpa chakna hmangin,
Hmelma doral kan tawn zel dawn.

tiin mawi tak main a remkhawm a.

Jailah kum tam tak chhung a tang a, a tan chhung hian
vawikhatmah a phunnawi lo a ni. Jail-a atang pawh chu mi tam tak
tan malsawmna a lo ni reng mai a. Jail-a tang ten matric an exam
theihna turin thuneitu te a dawr a, thuneitu ten an lo remti a. Matric
exam tur te chu English, History leh subject dang te a zirti a, a
thahnemngaihna zarzoim mi 6 lain Jail atangin matric an pass ta
nghe nghe a ni

Pu Thenphunga kaihhruai P.C Party in Mizorama io an rel lai
khan P.C. Party ticket in N.Vanlaiphai bial atangin MLA ah thlan
tiin a ni a. He lehkhahu ziahlai hian Aizawl West College ah English
department-ah lecturer hna a thawk a, Zonuam Aizawlah an
chhungkuain an khawsa a ni

LT. COL. LALKUNGA

Lalkunga hi W.Phaileng khua a ni a, Mizoram
 zalenna a sual tirh khan MNF Party zawmin a rammu
 ve nghal a, India sawrkar leh MNF rammu sawrkar
 ten inremna thuthlung an sign thleng khan rinawm
 takin a thawk a, remna sign a nih hnu khan Remna
 Runah a rawn haw chhuak ve a ni. A rammut lain hla
 3 Fakin awm rawh se Halleluiah, Lalpa i tana thawktu te tih leh
 Khuangchera Battalion hla te a phuah a. Fakin awm rawh se
 Halleluiah tih hla hi hmun kilkhawr bera awm hnam sipai te pawhu
 chatuan nunna kan lo chang ve ta hi thil lawmawm lutuk a ni a
 chuvangin Pathian i fak ang u

Fakna hla chu a lothleng ta,

Chhandamna kim min hmuh tir vangin,

Fakin awm rawh se, Halleluiah.

tiin a thunawn a phuah a.

Lalpa i tana thawktu te tih hla hi Lalpa duh danin awm lo mahse,
 Lalpa ngaihdamna an beisei tlat thu te, an tum ramtiam an thle
 hmaa sualna chi hrang hrangin a chimpil mai lohna tura sualna leh
 thlemna chu hnehsak tura Pathian a ngenna thu te a ni tlangpui a
 Chang 3 naah chuan

Kan Pi Pu te nundan mawi kha,

Chawisang ila, dan mawi leh duhawm chu,

Kan Zoram hi Christa tan tiin,

Nundan mawi vuanin i kal zel ang.

tiin rammu val rual Christa lalna ram din tumtu te chu nundan maw
 leh awmdan tha vuan tlat turin a chah a.

Khuangchera Battalion hlaah chuan Khuangchera hnung zuitu
 keini hnam sipai te hian Khuangchera huaisenna kan chhawm ze
 dawn

Khuangchera mi huaisen,
Keini a zuitu te hnam sipai,
Kan duai bil lo val rual hi,
I tungnung zel ang huaisenna.

'K' Battalion te huaisenna chu par angin a la vul ngei ang,
keini val rual te hian hlimin au ila, zaiin i fak ang u, tiin a thunawn a
siam a.

A chang tawp berah chuan Khuangchera ding zel se, keini
Khuangchera hming chawitu 'K' Battalion te hian a hniak hnung
kan zui zel dawn. Tlawmngaihna leh huaisenna kan chhawm nun
zel theih nan Lalpa min hruai zel rawh

Khuangchera ding zel se,
Keini a ncitut e hian kan zui,
Tlawmngaihna, huaisenna sang ber,
Maltin sawmtu min hruai zel rawh

tiin hnu a khar a. He lehkhabu siam lai hian Chhingaveng Aizawlah
an chhungkuam an awm a ni.

K.VANLALAUVA

Ni 24-3-1943 khan Tanhril khuaah a lo piang a, naupang te a nih lai atangin infiam lam a ngaina hle a, 1960 kum khan 1st. A.R.Commanding Officer in infiamna hrang hrang zirtir atan amah hruai turin sakawr nen Tanhrilah a kal a. A mah chuan duhin chak hle mahse a pain fapa mal hmun hla taka kal chu a remti lova, Commanding Officer chu pawiti takin Aizawlah a kir leh ta a ni.



K. Vanlalaauva hi Kawlhla (RIP) leh Sailuti (RIP) te fapa mal a ni a, chhungkaw rethei tak atanga lo piang a nih avangin sikul pawh a duh angin a kal tha thei lova, zirna lamah rual a awt hle thin a, a thian College-a kal te chu mittui nen a thlir liam fo thin a ni. 1966 kuma MNF party in Independent a puan khan an in chhuahsanin a rammu ve nghal a. Rammu sawrkarah chuan Civil Administration lamah telin Finance Department-ah hotu te kaihza veng (attendant) in a awm a. MNF rammu sawrkara silai keng pawl (Mizo sipai) ten silai nena vai sipai an hmachhawn laiin Civil lam chuan chemtum nen vai sipai an hmachhawn ve thung a. An dinhmun hi silai keng te dinhmun aiin a thlannahawm lo zawk awm e.

Ni 24-12-1966 khan E.Pakistan (tuna Bangladesh) ah MNF President Pu Laldenga (RIP) in pawisa mamawh te lam turin mi 7 a tirh te zingah a tel ve a. 1967 kum tira Mizorama an rawn luh leh nuah Dampa Bungah Sub Treasury Officer-ah appoinment pek a ni.

1968 kum tir lam khan khawthlang Tinghmun ramah Tinghmun khaw tlawhchhanin buk neiin an awm a. Vanduaithlak tak maiin Dampa Bung Chief Commissioner Pu Zaithanmawia, M.P. Thangbuaia, Biakthuama Asst. Director of Supply, Sangluaia Asst. Director of Information leh Pu Malsawma Armoural te chu ni 13-2-1968 tuk khan Phaizau ram Tut luikamah vai sipaiin an kaphlum a, an zinga tel ve Commissioner Pu Lalkunga chu hliam tuar chungin a tlanchhuak thei hlah a. He thil thleng avang hian vai sipai te chuan

Tinghmun khua chu an thutchilh ta a. An chaw lamna ber vai sipaiin an thutchilh avangin K.Vanlalauva te chuan kawhtebel, tumbu leh chakai te chaw atan an ring ta a. Vai sipai an chhuak mai si lova, chawlhkar khat chhung zet chu chaw pangngai hmu phak lovin a chung a kan sawite khi chaw atan an ring a. Vaak khuaah vai sipai an awm loh ringin an bihrukna camp atang chuan Vaak khua chu an pan ta a.

Vaak khua an thlen hma deuhin vai sipai Vaak khuaah chuan an lo lut hmasa chu niin an nin an hre si lova. Buhchangrum ei hlan nghakhlel takin Vaak khua chu an pan sawk sawk a. Kawtchhuah an thlen chuan vai sipaiin an lo kap ta chiam mai a. Buhchangrum chu Kaha..? ka pal nge bung ka ngal ti khawpin an tlanchhe ta chawn chawn mai a, vanneihthlak takin tumahin hliam an tuar lova, kalna tur dang awm chuang hek lo, an chhuahsan tak Tinghmun rama an buk chu an pan leh ta a.

An buk an chhuahsan dawn laia an path tumbu leh kawhtebel te chu an chhar leh ta a, chawah an ring leh ta a ni. Zanaah chuan, “Hetiang tur anih hria ila chu a kala lokal loh tawp tur hi a ni a, a hlauhawm leh a hahte ngawih ngawih hi kan hlep a nih hi..” tiin fiamthu an thawh a an nui ham ham a.

E.Pakistan a tlawm hnu khan Burma ram Arakan Province-ah an phei a, Ainak khaw bula an awm laiin ‘Tawhlehi ni tur’ tih leh ‘Zalenna kan tan’ tih hla a phuah a, a hla phuah hi rammu val rual ten an sa thap thap thin a ni.

Tawh leh ni tur tih hla hi Zoram an hmangaih avanga hrehawm tam tak tuar an nih thu leh kawppui tur chu mumang lama an hmu mial a nih loh chuan a taka hmuh tur a van thu te, Zoram tharah chuan chhuah an chak thu a phuahna a ni a.

A chang 2 naah chuan khuaa han chuan chhuah ve tum pawh hian, pawnpuoi pawh sawih pui tur kan tawng ngai lova, a hrihlhai thlak thin ngei mai. Mumang lamah tal kawppui tur hi tawng tak ang i maw..

Vangkhua lungduh lenna,
 Tawnchangin hrilh a hai
 Doral lian iang;
 Ka tawng lo runpui lum tur,
 Tawnmangah tal tawn ni awm maw.
 tiin a han phuah a. Chang tawp ber chang 4 nuah chuan
 Aw Zoram nang hi maw,
 Lungduh lenrual lungngaia kan thenna,
 Lungngaihna zawng zawng hlip tawhin,
 Hlimna thleng se Zoram ngeiah.
 tiin tlang a kawm a.

Zalenna kan tan tih hla hi chhan tlak ram kan ncih vanga ram
 chhan tura thawh chhuah a ngaih thu leh zalenna chu kan dikna leh
 kan chanvo tura Khuanu ruat anih anga kan chan ve tur anih thu lam
 phuahna a ni a, a chang tawp berah chuan
 Vahnnuai lei chhin hringmi zawng ten,
 Hnam zalenna pek kan ni,
 Kan dang chuang lo Zofa te,
 Zalenna kan tan ruat a ni.
 tiin hnu a khar a.

Martyr te la hi remna sign fel a nih hnu, an awmna ramhnuai
 atanga an larawn haw hma sia a phuah a ni a. Kohhran pawl hrang
 hrang leh political party hrang hrang ten remna siam an duh Zofa te
 nghahfak chu arawn her chhuak ta a, kan ram tan mipui duh dan kan
 zawm a, kan pawm thiam a tul a ni.

A lo thleng ta Zoram nghahfak remna kaw! eng,
 Christian pawl tin leh party tin ram hmangaihtu,
 Mipui aiawh inlungual ten,
 Remna siam ru MNF tia an auh chu,
 Kan zui nang e, mipui te au aw kan ram tan.
 tiin fel takin thu tam tak kha kim takin a fawm khawm a. Remna
 Runa anrawn lawi luh hma ramhnuai an awm laia an thian thi tawh
 te ruhro anlak phak china mi chu an la vek a, kuang siamin anrawn
 zawn hawng a

Kan rawn chhawm e,
 Zoram vanga Martyr te sakruang chu,
 Tukloh ram lentu kara chham ang zal tawh hnu,
 An tel lova Zoram luah chu kan ngaingam lo,
 Ngaiin au mah ila, kir tur an awm ta lo,
 An lo hlan ta an nun hlu Zoram tan.

tin Martyr te tel lova Zoroma haw chu an ngaihngam loh thu leh an
 thian te ruhro an rawn hawn thu a thunawnah a hmang a ni.

MNF rammu sawrkarah khan politics vir vel kualin President
 pawh vawi hnih vawi thum lai inthlak kual vel a ni a. Service atanga
 politics lama a kal atangin National Council member-ah a lut nghal
 a. He mawhphurhna hi chelh chungin kum 1966 atanga Mizoram
 buai tia kan sawi thin chu kum 20 lai a lo ral hnuah remna leh muanna
 a lo awm khan Pu K. Vanlalauva hi Mizoramah a rawn haw ve a ni. A
 rammut laia a hna chelh tawh te chu 1. Attendent Finance Dept. 2.
 Sub. Treasury Officer 3. Account officer (Central) 4. Auditor (Central)
 etc. 5. Secy. to the Vice President 6. Secy. to the President

1987 Mizoram state MLA inthlanah 14th. Khawbung
 Constituency-ah MNF ticket in a ding a, thlan tlin a ni a. MNF sawrkar
 kha presidential rule-ah dah a ni a. 1989 a MLA thlan a nih leh khan
 a dinna ngai Khawbung bialah hawh MNF ticket in a ding leh a,
 vanneihthlak takin a tling leh a. 1993 MLA inthlan puiah khan
 Khawbung bialah tho a ding leh a, hemi tum hian Congress leh Janata
 Dal (tuna MPC) tang kawpin an beih rawn a. Party pahnih inkawp
 chu a hneh ta lova.

1998 a MLA inthlan puiah a dinna thin Khawbung bial chu Pu
 Zoramthanga Champhai bial nena a din kawp avangin Official
 Candidate-ah a lang ve ta lova. Khawbung bial mipui tam tak phei
 chuan "Pu Auva ngeiin thil awmdan a rawn sawi fiah hma chuan
 vote kan thlak dawn lo" an ti fur mai a. An nupaa thahnem ngai taka
 campaign an beih avangin bial mipui rilru pawh a dam ta aniang chu
 Pu Zoramthanga pawh hneh taka thlan tlin a ni ta a. Tichuan Pu
 Zoramthanga chu Champhai bial leh Khawbung bialah thlan tlin a

ni ve ve a. Danin a phut angin bial khat zawk chu a chhuahsan a ngai a. Khawbung bial chu a chhuahsan ta a. Khawbung bial by electionah chuan Chief Minister Pu Zoramthanga duhsakna dawngin MNF Official candidate-ah dah a ni leh ta a, hneh taka thlan tlin a ni a, vote 1234 ngawtin a chak a ni. MNF sawrkarah Minister of State-ah hlankai a ni ta a ni.

Kum 2003 MLA inthalnpuih a dinna bial Khawbung ah bawk MNF Official candidate a ni leh a. Hemi tum hian kil 6 atanga MLA hi chuh a ni a, vanneihthlak takin a wawi 4 na atan MLA ah thlan tlin a ni leh ta a. Minister of state-ah bawk a awm leh a, Central sawrkar in state tin te Minister neih zat tur a bithliah fel khan a minister seat chu a chhuahsan ta a ni. Minister nihna atanga a step down hnu hian Principal Secy. a nih bakah KVI Board Chairman a ni bawk.

July ni 5 1988 khan nula fel tak mai Lallawmchhungi Pu B.Zakhuma (RIP) Venghlui fanu nen an inner a, fanu 4 an nei a. He mi lehkhahu buatsaih lai hian an mahni in Venghlui Aizawlah an chungkuain an khawsa a ni.



LALKUNGA ADC

Lalkunga hi MNF party in Independent a puan khan Zoram tan a rammu a, MNF rammu sawrkarah chuan Civil Administration lam khawihin Assistant Deputy Commissioner hna a chelh a, a mah hi pa ti ti thiam leh sawi tur ngah tak a ni a, a kiana awm a nuamin a bengtlai thlak hle thin a ni. A mah hi mi lungleng thei tak niin a rammut laiin Harhin tho ru tih leh Ram tana thi te tan tih hla a phuah a. Mizo tawng a hmang ulukin a remkhawm fel a, chhiar a nuamin sak pawh a nuam hle a ni.

Harhin tho ru tih hla chang 1 naah chuan Mizoram chu kan Pi leh Pu te atanga kan ram kan ta ngei a nihzia leh nula tlangval huaisen te tlawmngaih leh inpek zawhna vanga kan ta nih hre thar leh kan nih thu te, rammu tlangval huaisen Zoram chhana silai nena ngir khup te chu mawi chung chuanga a hriat thu chu tiang hian a phuah a.

Mim ang kan pianna kan Zoram tlang mawi hi,
Hmanah Pi Pu chena kan ram mawi hi kan ta,
Kan din thar ta, tlawmngai, huaisen zarah.
Harhin tho ru, Mizoram Lalpa tan bei ru.

tiin a phuah a. A thunawnah chuan

Rinawmna leh huaisenna kan ram tan,
Dikna puanzar nen pen ru, i kal zel ang,
Zam su, hma lam pan ru, a eng zel ang,
Harh in tho ru, Mizoram Lalpa tan bei ru.

tiin, dikna puanzar khaia rinawmna puanhnuaia huaisennaa inthuama Lalpa tana bei zel tura fuihna thu mawi takin a thunawn chu a phuah a. A chang tawp berah chuan kutkaw! leh thir khaidiat te chuan kan thil tum min thulh tir dawn chuang lo, Lalpa chakna ringtu te kan ni a lawm. Hnehna kan chan ni a la rawn her chhuak ngei ang. Harhin zuang tho ula, kan ram hi Lalpa tan i pe ang

Min dal zo lawng, hrenthir, khaidiat mai chuan,
 Kan tang zel dawn e, Lalpa chakna ring zelin,
 Hnehna ni ropui chu min thlen ngei ang,
 Harh ru, tho ru, Mizoram Lalpa tan pein.

tiin a hla tlang a kawm a.

Ram tana thi te tan tih hlaah chuan damtakin aw tia inchibaiin kan ram hi Lalpa chakna ringa chhan turin kan inthen a, rinawm taka Zoram chhanin zamual min liam san ta si a. In sulhnu leh in hnathawh te kan rawn chhui zel dawn e. Ram tana in tawrhna hi kan theihnghilh ngai lovang tiin chang 1 na chu a han thlawh a.

Chang 2 naah chuan ram chhan val rual zingah i tel ve emaw tiin ka zawng che in, i chanchin mite ka zawt vel a. I hmel hmuh tur a awm si lova, a hrilhhai thlakin a va khawhar thlak em..! Zoram tan a nunna a hlan ta, tia i chanchin min han hrilh mai chu hriatthiam a va har em..! tiin

Pheisen darfeng chhuahtlang mawia ngir zawng zingah,
 Zawtin ka zawng, ka tawng si lo, thinlai a vai.
 Biahthu min hlan thinlai thawngin, tuar a har ngei,
 Min liamsan ta, rinawm taka Zoram chhanin.

Chang 4 naah chuan Leihnuaiah phuma awmin fam dauiial chang tawh mah la, kan theihnghilh tawh lawng, in kimtlang leh insakruang.. chu Zofa te hrilhfak a la ni ngei ang tiin

..Piallei thua riat karah chham ang lo zal mah la,
 Kan nghilh lawng in sakhming,
 Khuarei zofa khuavel hril a tling ngei dawn e.

KHUANGHLIRA

1964 kum khan MNF party zawm in volunteer-ah a inpe a, Zoram a lo buai khan a rammu ve nghal a, 'N' (Neuva) Battalion-ah a in-enroll a. 'N' Battalion chu 18th. Battalion tiin a hming an thlak a. 18th. Battalion hming a put lai hian Chawngtui daiah Jat Regiment nen an inkap a, vai sipai hi an thi nual a, a thi zat chiah hriat a ni lova, Mizo sipai lamah chuan Pte. Lalringa Khumtung khua a boral a, Sgt. Lalbiaka, Cpl. Lalhmingliana, Pte. Thansiamah leh Pte. Chawngphunga te an hliam a. 18th. Battalion chu 'S' (Saizahawla) Battalion tiin a hming an thlak leh a, he hming hi a pu hlen ta a ni.



Khuanghlira hi tlangval lian lo leh tlangval sehheh ve tak a ni a, a pumrua phu lovin chaw leh sa a ci thei a, thahrui pawh nei tak a ni. 'S' Battalion ah chuan miral leh sarala an hmatheh te zinga mi a ni a. Ni 8-6-1974 niin Riangtlei thlawhlaiah Assam Rifle in an man a. Aizawl District Jail-ah MISA danin hren a ni a. 1975 khan Central Jail Uttar Pradesh-ah thawn thlak a ni a, kum khat leh thla 6 hnuah Madhya Pradesh Gwallior Jail-ah an sawn a. Gwallior Jail-ah hian Double Cell-ah eng hmu mang lovin an tan tir a. Thla 8 zet Cell-a an tan tir hnuah ni 6-1-1977 ah Nowgong Special Jail Assam-ah an thawn leh a. August 1977 ah Nowgong Special Jail atangin District Jail Aizawlah sawn luh a ni leh ta a. Nov. 1977 khan bail in a chuak a.

1979 kum khan MNF rammu sawrkar a zawm lehngal a, Sgt. ah promote a ni a, thla 2 hnuah W.O. 11 ah a kaisang a. 1980 June thla khan 2 Lt. ah kaisan tir a ni a, 1981 kum khan Lt. ah a kaisang a, 1982 khan Piler khuaah MAP Special Force in an man a, 1985 kumah bail-in a chhuak a, hemi kum tho Christmass dawnah MNF sipai thar tur hruaiin MNF rammu sawrkar a zawm lehngal a, hetia a

zawm leh hnu hian 'S' Battalion-ah Adjutant in a awm a, Remna Runa an rawn chhuah thlengin he hna hi a vuan ta a ni.

'Lenrual lungduh then zawng' tih hla hi Aizawl Jail-a a tan laia a phuah a ni a, Saizahawla Battalion hla hi 1986 kum tira a phuah a ni. Lenrual lungduh then zawng tih hlaah hian hlim taka inkawm ho dial dial thin kha vai sipaiin min rawn run vangin thian te kan lo inthen ta hi lung a va awi lo em..vai sipai chhawih tak tak leh nunrawng pui pui ten kan thian te an tihlum a, hmelma ten heti fakaua min han bei mai hi chu na ka va ti em.

Aw, thlang kawrvai lungmawl, nunrawng te chuan,
 Ka lenrual lungduh fam an chan tir e.
 Ka ngaithiam lo hmelma doral lian hi,
 Thinlai a na, lungduh min thentir hi.

A chang tawp ber chang 4 naah chuan Kan thian ram tana martyr sang tam tak an hmel hmuh leh tawh ngai loh tura mual an liam ta hi ka han ngaihtuah chang hi chuan lungawi har ka ti a, kan thian mual liam ta te ka theihnghilh thei tawh ngai lovang.

Han dawn velin lung reng a awi nem maw,
 Kan thian Martyr kal ta te hmel duhawm,
 Hmuh theih lohvin sang tam tak an liam ta,
 Aw kan nghilh thei dawn lo, ka lungduh te.

tiin hnu a khar a. He lehkhabu buatsaih lai hian Champai Zoteah a fate nen an khawsa mek a ni

LALHNUNA TIRHKOH

Lalhnuna hi MNF rammu sawrkarah lut vein tirhkoh hna a thawk a, tirhkoh te hian awmna hmun bik Battalion an nei lova, a tul anga Battlion hrang hranga transfer kual thin an ni a. Lalhnuna hi 'Ch' (Chawngbawla) Battalion a awm laiin Chaawngbawla Battalion hla hi a phuah a. Pasaltha hmingthang Chawngbawla hmingchawia Hnam sipai ten an sak chuan Zoram tan hma a lak mek thu chang khatnaah a rawn sawi a.

Sakhming chul lo, Zofa mihrang Chawngbawla,
Fam chang tawh hnu kan ngai em che,
I hming chawiin hnam sipai te,
Kan inbuatsaih kan Zoram tan.

a thunawnah chuan

Mihrang Chawngbawla pawl ten,
Chung Pathian malsawmna a zarah,
I tan theihtawp kan chhuah zel ang,
Lo lungphang suh aw kan zoram.

tiin Pathian tanpuina rinchhana Zoram tan theihtawp chhuaha an beih tur thu a rawn sawi a.

Zalenna atana thawktu zawng te,
Huai leh chhel takin i kal zel ang,
Lalpan min siam kan Zoram hi,
Kan chang ngei dawn Zofa leng ten.

Lalpan Zofa te tana a siam Zoram hi Zofa ten kan chang ngei dawn a ni tiin hnu a khar ta a ni.

MAJOR KHAWLHMINGTHANGA



Khawlhmingthanga hi Serchhip khua a ni a, 1963 kum khan MNF party zawmin 1964 ah volunter-ah a inpe a. School pawh kal chhonzawm thei lovin MNF Party tan a inhmang a. MNF Party in Independent a puan khan a rammu



ve nghal a. MNF rammu sawrkarah chuan silai keng pawlah telin Mizo pasaltha hmingthang Chawngbawla hmingchawia sak 'Ch' Battalion a zawm a. Kum tam tak rammu in harsatna tam tak a paltlang a. An leido te nen tum 28 an inkap a, inkahna tenau tum 4 a tawang bawk.

January 1974 khan Chawilung khuaa a duty lain vai sipain an man a, Aizawl Jail-a kum khat zet a tan hnuin Varanasi Jail-ah an thawn a, chuta tang chuan kum khat hnuah Jabalpur Jail-ah an thawn leh a. Chuta tang chuan Nwogong Special Jail-ah an thawn leh a August 1977 khan Nwogong Special Jail atangin Aizawl jail-ah an thawn chho a. Sept. 1977 khan Pu P.Lalupa'n a bail a. Bail-a a chhuah zan hian a Bailer remtihna in MNF rammu sawrkar a zawm leh nghal a ni. Aizawla rei vak lo'a awm hnuin thian thenkhat te nen Bangladesh lam an panthla a.

October 1977 khan Khawthlangtuipui leh Lawngkawr (Bangladesh) inkarah Bangladesh Rifle (BDR) patrolling kal nen an intawk a, a nau hruai Rintluanga nen BDR ho chuan an man a, Lawngkawra an Post-ah an hruai ta a. BDR te chuan Chittagong lamah hruaithlak an tum niin an hria a, tlanchhuah dan an ngaihtuah ta a. Lawngkawr Post a ni 2 an hren hnu chuan tlanchhuah theihna hun remchang an hmu thei ta a. Khawthim tawh hnuah Khawla te thian dun chuan an daikal chhuah thu an sawi a, daikal turin ek inah an hruai a, ek in chhunga an awm lai chuan an tlan ta thut mai a. Rintluanga chu a insawh sual avangin a tlan chhuak thei ta lova, an

man lehngthal a. Khawla chu BDR te chuan an kap zui thuai thuai a, a dar veilamah an kap fuh ta hlah mai a, silaimu chu tlang lovin a hnute chung deuhah a tang a. Hliam tuar chung chuan Khawthlang tuipui km. 8 zeta hla chu a kal thleng a.

Khawthlangtuipui chu a mar lian put mai si a, hliam tuar lo pawha hleuh kai a huphurhawm tehlul nen hliam tur chung a hleuh a tul si a. A hleuh thuai loh chuan BDR hoin an rawn nangching hman ang tih a hlahawm si a. Damna na na na chu thih leh thih tiin a hleuh ta a, tui lian chuan km. 1 dawn lai a len hnuah Mizoram lamkam chu engemaw ti tiin a kai thei ta a. Mizoram a thlen hnu chuan a rakin an enkawl dam ta a ni.

1986 kuma MNF rammu sawrkar leh India sawrkar aiawh ten inremna thuthlung an ziah fel hnu khan Remna runah a ran haw ve a, a rawn haw lai hian 'V' Battalion ah Commanding Officer hna a chelh a ni.

A mah hi pa nuntha leh mi pawisawi hlau tak leh mi inggaitlawm tak a ni a, a hmelena a zuamawm ai hian belhchian a dawl a, hmelma nena inkah tum chuan a hmatawngah a tang thin a ni. Ral hmaa huaisen viau e ti lovin a nupui hmaah chuan a zum deuh thin ni tur a ni, a thianpa Sawma'n,"Ui hlah neia an mei an khup ang hian a thiannu hmaah chuan a mei a khup zal zal mai a ni..," tiin a dem fiam thin.

Mizo hnahthlak zawng zawng te chu inzawmkhawma Hnam Runa lawia Mizoram siam tura tang ho tura sawmin 'Mizo Hnam Run' tih hla a phuah a. A thiannu Maengi hi zai mi a ni a, an fanu Zoremsiami hi music lam ngaina tak leh zai thiam tak a ni baw k, an chhungkua chauha an awm pawhin Mizo hnam run tih hla leh Mizo hnam hla dang te sain an zai an zai thin a ni.

Zofa leng zawng kan hlim ve nan,
 Zo hnahthlak chhinlung chhuak zawng te,
 Mizo hnam run rawn bel ve ru,
 Raltiang kai kan rel ta e.

DARTHUAMA

Darthuama hi Khawdungsei (Thingsat bul) khaw chhuak a ni a, a nau Laldawngliana chu Zoramin Independent a puan tirh atang khan a rammu ve nghal a. Laldawngliana hi tlangval ruakhau pui a ni a, silai keng pawl 'V' Battalion-ah telin a hnuah 'Ch' Battalion-ah an transfer ta a ni. 'Ch' Battalion a zawm tirh hian Officer in a zawm a ni. Laldawngliana hi tlangval nuntha leh huatthu nei lo tak a ni a, a rammut chhung hian mi tihthinur leh hauh pui pawh a nei awm love. Nunnem tak e ti lovin, raltitna hmunah chuan hma a hruai ngamin hmelma tan chuan tawrhhlelhawm zet mai a ni thung a. Pa nuntha tih takah fiamthu a duhin a kianga awm hi a nuam em em a, fiamthu a thawh a, a nui huau huau mai thin a ni.

India sawrkar aiawh leh MNF rammu sawrkar ten inbiakrem dan dapa operation an suspend lai khan Arakan atanga rawn chhuakin Link Office Aizawlah a duty a. Operation suspend lai a nih avangin MNF lam chuan operation chawhlsanin hriam an lek lova, an silai te pawh an thukru a. Link Office-a an hotu ten Capt. Dawngliana chu Champhaiah engemaw ti zawk turin an tir a. Champhaiah chuan a chho ta a.

Champhai a thlen hnu chuan a thian te nen hlim takin an ti ti a. chutia hlim taka an ti ti lai chuan Special Force Aizawl atanga umzui ru tu te chuan silai nen an veh a. A thian te nena hlim taka an ti ti lai chuan Special Force te chuan luhchilhin, "Kan hotu ten biak lawk che an duh a, i lokal zawk hman em,"? tiin Capt. Dawnga chu an zawt a. "Thei e a," tia chhangin Special Force te chu a zui chhuak ta a. Special Force te chuan an motor kenah chuan an luh tir a, Aizawl lam panin an tlanpui ta a.

Khawzawel leh Champhai inkar Tuipui kam an thlen chuan an ding a, Capt. Dawngliana chu motor atang chuan an chhuk tir a,

silain an tin ta a, "Tiang tur a ni love, Zoram pumah remna a thlen theih na tura kan beih laia hetiang a Mizo leh Mizo inbeih chu a tha lovang," tiin awka zaidam takin silara a mah tin rengtu te chu a bia a. Silara tintu te chuan engmaha chhang lovin hriam pawh keng ve lo chu hnai set sawtah an kap ta pawp pawp mai a, an kaphlum ta a ni.

Inkahhai laia hnam sipai Capt. Laldawngliana an that ta mai chu Mizo mipui leh Hnam sipai ten an ngaithiam lo hle a. A nu phei chuan a tuar thiam lo zuala, a tap a tap mai a. A nu tawrh nasat zia a hmuh chuan a nu pual turin a fapa Darthuama Capt. Dawngliana u chuan 'Zoram lily an thliak ta maw' tih hla hi a phuah ta a ni.

A chang khatnaah Zoram chuan hma lam panin ke a pen mek a, Mizo tlangval rammu rual te chuan silai puin Zoram chhan zai an rel a. Ka fapa nunnem leh zaidam pawn Mangtha tia chibai min bukin kan ram chhan turin a rammu ve ta tin

Zoram kalsiam a her lui lui a her sang zel,
Zofa mihrang chengrang chawin pheilai an khawng,
Zoram chhanin ka hrai nunnem mihrang val lairil a tho,
Zo zalen nan mangtha u le biahthu min hlan.

Chang 2 naah chuan India sawrkar leh Mizoram hruaitu ten Zoroma remna thlen theih dan tur an ngaihtuah a, ka fapa kan chhungkua min phuar khawmtu, Zoram dung leh vanga remna thlen theihna tura beitu chu an tihlum ta hlah si

Thlang kawrvai leh Zoram hnarkai mi ril zawng ten,
Remna biahthu Zoram tluanah an rel ta e,
Ka hrai nunnem chhungkaw remna lalno hlantu thlafam changin
Remna thuthlung Zoram tluanah thleng se an ti.

A chang 3 naah chuan Zoram dung leh vangah inkahhaina thuthlung an siam laia, zurui, nunrawng leh hnam phatsantu ten ka fapa an that ta mai hi chhungkhat laina leh thenrual tha ten ngaihtiam har kan ti a, Zoram hruaitu ten engtin ngai ve che u maw le..tiin

Zoram hnarkai mi ril zawng ten engtin ngai maw..?

Ka hrai dawntuai par ang an thliak, zurui, hlemhle,

nunrawng rual ten,

Chinlai unau lenrual zawng ten kan ngaithiam lo.

A thunawnah chuan

Aw sakruang buan ang ka pawm, ka chul vel a,

Ka hrai dawntuai Zoram Lily an thliak ta e,

Zofa nunrawng thlafam chantu ka ngai thiam lo.

tiin a chhep a. A fapa Special Force kut tuara a thi ta mai chu a
ngaithiam lo hle a, a dam lai chuan he hla ahriata an sak chuan a
mittui a tla zawih zawih thin a ni. A phuahtu Pu Darthuama hi tunah
Sakawrdaiah an chhungkuain an khawsa a ni.

C. LALTHANGVUNGA

1966 kuma MNF in Indepenent a puan khan C.Lalthangvunga pawh hi MNF rammu sawrkar zawmin a rammu ve nghal a. Rammu sawrkarah chuan silai keng pawlah telin 'T' Battalion-ah a in enroll a. Medical lam a traning hnuah 'T' Battalion-ah Medical Inchage in a awm ta nghal a ni. A rammut lai hian hla 2 Isua Christa lo lal rawn se tih leh Taitesena Battalion hla a phuah a. Isua Christa lo lal rawh se tih hla hi Zoram dung leh vanga Christa lal tura a duhna leh Zoram chhan tura hnam sipai Taitesena pawl ten lungual taka Zoram phatsan lova beih an tum thu leh harsatnaaah pawh an zam ngai loh tur thu leh Zoram phatsan lova thih thlenga rinawm taka Zoram chhan tlat an tum thu a ni tlangpui a. Chang 1 naah

Taitesena hnung zui mihrang val rual ten,
 Kan bei zel dawn zalenna famkim atan,
 Kan hma lam khua dur thin mahse,
 Kan zam ngai lo, aw Zoram kan hmangaih che.

Chang 2 naah

Kan phat lawng che, Aw Zoram kan phat lawng che,
 I tan thih thlenga rinawmah kan intiam,
 Engpawh huamin i tan kan do ang,
 Hrehawm mahse kan chhan ang che aw Zoram.

tiin harsatna hnuaiah pawh Zoram phatsan lova an chhan tlat tur thu a puang chhuak a. A mah hi pa ti ti thiam leh sawi tur hre tak mai a ni a. He lehkhahu buatsaih lai hian Pangzawlah a nupui fanau te nen an awm.

LT. ROHNUNA

Rohnuna hi vaphai khua a ni a, Mizoram
Independent a puan hma atang khan MNF volunteer-
ah a inpe a, school kal chungin MNF party tan
theihtawpin a thawk a. Independent puan a nih khan
a rammu ve nghal a. MNF rammu sawrkarah chuan
silai keng pawlah telin 'S' Battalion-ah a inenroll a.



Rohnuna hi tlangval lian lo tak, a hmel han en mai chuan
zuamawm tak hmel a pu a, mahse han belh chian chuan rin ain
belhchet a dawl a. A hmaa harsatna awm chu hel mai lova suttlang
tum tlat mi a ni a. Engemaw rikrum thilah pawh thinphut zawk kan
tih ang hi a nei ve lo a ni. India sipai te nena an inkah tum pawhin
thiante hnunga awm mai lova, thiante hma lama awm thin a ni a
Ram leh hnam tana a thawhna kawngah harsatna siamtu an ni ang
tih a hlauh avangin ngaihzawng pawh a nei ngam ngai lo a ni.

1974 khan Aizawl khawpuia duty tura ruat a ni a, Aizaawlah
chuan Capt. Lalhleia, Capt. Thangrehlova te nen an duty ho a. I.G.P
leh Police Officer 2 te kahhlumnaah pawh khan tel vein Capt. Lalhleia
nen IGP Office chu an luhchilh nghe nghe a ni. Capt. Lalhleia'n
tawhsual a taw'n dawn tum ni 6-3-1975 nipawh khan an inkawp a.
Tanhril lam pan tura Luangmual Field veng an chhuahsan dawn
thlengin an inkawp a, Lalhleia'n a thil theihngilh lama a kir leh
khan a thianpa Rohnuna chu a hmu ta mai lova, Tanhril lamah kal
zela a rin avangin hmanhmawh taka Tanhril lam pan ta kha a ni a.
Mahse an inhmuh hmam BSF te nen an intawng ta hlauh mai a.
Lalhleia chu BSF silaimu tuarin a thi ta a ni.

Capt. Lalhleia thih thu Rohnuna'n a hriat chuan a hrilhhai hle
a, a mittui a far zawih zawih a, "Phuba ka la ang," tiin a tawng chhuak
charh charh a, a thianpa Lalhleia hriatreng nan Mangtha ka thian

duh tak tih hla hi a phuah ta a ni. Chang 1 naah chuan

Aw kan Zoram nuam leh mawi hi,

Thamral mai atan phal lovin ,

Ramdai hmun khawhar leh hrehawmah

Aw ka thian, i nun i hlan ta maw..!

tin ramdaia a thianpa thi a ui thu a rawn phuah a, chang 2 naah chuan

Lenrual zawng te hlima an len laiin.

I chan piallei thlan khawhar maw,

I rauthla leng tal rawn tir la,

Mah ten tanglaiah pawm ka nuam e.

tin piallei hnuai atanga a thlarau rawn tir turin a thianpa chu a ngen a ni.

A thianpa Lalhleia thi a sun em em lai leh phuba lakna tur remchang a melh reng lain ni 29-8-1975 ni khan a thianpa Zomawia 'T' Battalion nen Chhinga Veng a an awm lain CRPF section khat awm vel hi Bazar lam atangin Arm veng lam panin an rawn chhuk dam dam a. Tlema kal fal deuh an holder silai ken chu chhuhsak theih mai a inring a, a thianpa Zomawia hnenah chuan, "Saw laia CRPF silai ken saw ka va chhuhsak ang e, tikhan min lo veng rawh aw." a ti a, CRPF awmna lam chu a pan ta a.

CRPF Holder kiang a va thlen chuan a kut vei lamin CRPF Holder chu a hnek nghal thuai a, Holder chu a tlu a, a tlu chu bawh zuin a silai chu phih thlak sak a tum a, mahse holder chuan a silai ken chu hruiin a hlinga a kawngghrenah a thlung a lo ni a, han phih thlaksak mai theih chi a lo ni si lova. Holder nen chuan an inbei ta Chiang Chiang mai a. Chutia an inbeih lai chuan a thianpa Zomawia'n a awmna bang kil atangin puakrang silaiin a hawl phei ta thawt thawt mai a, a thianpa Rohnuna chu a kaphlum ta a ni. Zomawia hi huaisen deuh se chu an inbeihna kiang hnaiah va kalin CRPF Holder hi awlsam taka kahhlum mai tur a ni na a le. A thianpa Lalhleia phuba lak a tumna lamah a thianpa silaimu tuarin chatuan ram a pan ve ta a ni.

V.L.CHUANA

Vanlalchuana hi Chawnpui veng (tun hmaa Hmuia veng) Aizawla awm a ni a, 1965 khan volunteer-ah a inpe a, MNF volunteer-a inpe te chuan Bible nemin an hotu leh Zoram tana rinawm taka hna thawk turin thu an chham thin a. MNF party zawmtu te chuan membership fee pein an zawm mai a, Bible nema inpek kher a ngai ve lo a ni.



Volunteer-a a inpek atang chuan School pawh kal tha hman lovin ralthuam hman dan an trained a, an trained zawh hnu chuan la train ve lo te training pe reng rengin an hmanhlel a. 1966 March ni l a Independent puan a nih khan a rammu ve nghal a, rammu sawrkarah chuan silai keng pawlah telin 'Z'; Battalion a zawm a. A sur a sa hnuaiah a thim a var thlu lovin rim takin Zoram tan a bei a. Hotu te thu a awihin a zah thiam hle a. A hmaa tihtur awm chu phunnaw lovin phur tak leh hlim takin a ti mai thin a ni. E.Pakistan a tlawm hnu khan Burma rama Arakan Province ah an pheih a, Arakana an awm lai hian Arakanese ho tawng pawh zin veivahna leh love play na khawp chu a thiam hman a ni.

Arakana an awm lai hian Ram tana Martyr te tih hla a phuah a, a thluk hi a man a siam nghal a. Chang 1 naah chuan tunhmaa lungruual taka an lenna thin Zoram chu ram tana Martyr te avangin inthenna ram a lo ni ta mai si a..tiin

Zaiin ka chawi dawn e, kan ram lungngaihna hi,
Thinlai lungruk ka dawn changin,
Hmana suihlung ruala kan lenna ram ngei kha,
Doral lianin thenna ram a chan ta.

A chang 2 naah chuan kan thian ram tana Martyr te chuan thangthar la rawn awm zel tur te hmakhua ngaiin an nunna chu an hlan ta tiin

Aw ka lenrual lungduh then tak zawng zawng te chuan,
Ram tana an nun an hlan ni chuan,
Kei nin kan vawrin ni chu an naktuk atan,
Kan hlan ta tiin biahthu min chhiah ta.

1974 kum tir khan Mizoramah duty turin Arakan atangin an
awn chhuak a, Kolasib tlang dungah a duty a, ni 13-5-1975 khan
jai siparin Kolasib-ah an man a, Jail-ah hun rei tak a tang a, He
chkhahu buatsaih lai hian Chawnpui veng Aizawlah a nupui fanau
e nen an awm.

L. DUHAWMA

L.Duhawma hi Mizoram chhanin a rammu ve a, silai keng
 pawlah telin 'T' Battalion ah a inenroll a. Amah hi mi lungleng thei
 tak a ni a, I zal ta maw kan ram tan tih hi a rammut laia a phuah a ni
 a, a hla hi chang 4 niin thunawn a nei bawh a ni. Chang 1 naah chuan

Lunglam ka vai dawn chang ni hian,
 In zal ta maw piallei thuahriat kara'n,
 Nghilh ni reng awm dawn lo lungduh te,
 Ngaih lai a zual sulhnu fan changin.

tiin thiam tak maiin a phuah a. A chang 3 naah chuan

An riang chuang e, lungduh thlafam chang hnu,
 Nemrangpuan chawi lo ten in zal ta maw,
 Fan ka nuam piallei khartung sawnin,
 Hlan ka nuam mihrang tawlhlopuan ngci.

Puana tuam pawh hlawh lova an phum tak an thian te
 khawngaihthlak zia leh an awmna a kala Mizo pasaltha tawlhlopuan
 ngeimai han sin tir a chak thu chu thiam tak maiin a rem khawm a ni.

R. KHAWPUITHANGA

1963 kum khan MNF party a zawm a, Party tan theihtawp chhuahin a hun tam zawk a hman a. 1965 a MNF party in Provincial Govt. of Mizoram riruang a siamah Deputy Director of Supply & Transport hna chelh tura ruat a ni a. Mizoram Independent puan a nih khan an inchhung lum kalsanin a rammu ve nghal a. Provincial Govt. ruangam tur din a nih laia a hna chelh tura an ruat chu a chelh nghal a. 1968 June thla khan Run Bunga Tuithapui Phai Manipur-ah Deputy Commissioner-ah dah a ni a, Mizo sipai za rual nen Manipurah hian a awm ta a ni.



1970 June thla khan Imphal atangin overground in Aizawlah a lut a, Aizawl atang chuan Tripuraah a lut thla a. Tripura atang chuan Dacca-ah a chhuk a, Dacca atang chuan MNF rammu sawrkar hmunpui Chhantlangah a chho leh a. 1970 Nov. thla khan MNF Gen. Hqrs. Asst. Secy. atan thlan a ni a. Chumi hnu chuan Gen. Secy. atan thlan a ni leh a. Gen. Secy. hna hi term hnih a chelh ta a ni. Gen. Secy. hna a chelh lai hian hrisel lohnain a tlakbuak a, ramhnuaiah damdawı tha menkawlna tur a awm bawk si lova, a nunna atana hlauhawm dawna an hriat avangin an hotu ten damdawı thaa a inenkawl theih nan chawl mai turin an ti a. Hreh tak leh rilru na ngawih ngawih chungin 1975 May thla khan sawrkarah a inpe ta a. A thian a thawhpui te tana pawı tur engmah a sawı duh loh avangin a inpekna chu sawrkarin a pawm sak lova, an man a, Central Jail Tiharah a thawn thla ta a. Kum khat zet a tan hnu 1976 kum chawhnu lam khan an rawn chhuah ta a ni.

A mah hi pa thawmna vak lo, dik nia a hriat chu tan tlat mai mi a ni a, a rammut lain 'Engvanginge tiin ka zawt a' tih hla a phuah a. A hla hi hlawm thumah a then theih a, hlawm khatna chu ram tana nun pe tu te sulhnu chhui a, ram tan thawk zel tura fuihna lam a ni a. Hlawm hnihna chu pasaltha val rual ten an nunna hlana pialleia chham

ang an zal laiin nang chuan ram phatsanin India vai i bel a, hetiang te chuan ram tana nun pe te an zahawm em a lawm, tia phatsantu te deuna lam a ni a. Hlawm thumnaah chuan ram tana nun hlantu zawng zawng te chu Khuanun chatuan rama a angchhunga seng vek tura a duh thu a sawina a ni. Chang 1 naah chuan

Hawh u, i bei zel ang u,
Ram tan engpawh huam zelin,
Fam dairial chang tawhte sulhnu,
Chhui chung zelin i bei ang.

A chang 3 naah

Nang zawng thlang kawrvai bel,
Ram leh hnam phatsan i ni,
Ka hawi ngam lo piallei thimbel,
Mihrang val rual ho zingah.

tiin ram leh hnam phatsantu te avanga ram tana nun pe te phumna thlanmual lam hawi hrehawm a tih thu a sawi chhuak a. A thunawnah chuan

Engvanging nge tiin ka zawt a,
Ram leh hnam vang a ni,
Lungngaih lusun kan chan,
Tiin min chhang a.

Heng thil te hi engvang a thleng nge tiin ka zawt a, ram leh hnam tan nunna an hlan vanga khawhar leh lungngai an nih thuin min chhang a ni tiin a phuah a.

Pu R.Khawpuithanga hian ram tana a inpeka a tawrhna zawng zawngah vawikhat mah a inchhir ngai lova, mahni phak tawka ram leh hnam tana rawngbawl hi a tuina ber a ni. Aizawl Tlangnuamah an chhungkuain an awm a, Tlangnuam Presbyterian kohhran Upa a ni. 2003 kuma Mizoram MLA inthlanpuiah khan Aizawl South 11 bial atangin MNF Party ticket in MLA ah thlan tlin a ni a. He lehkhahu buatsaih lai hian Chief Minister Office ah Adviser to Chief Minister hna chelhin PWD a enkawl a ni.

LALHLUPUII

Tleirawlte a nih lai 1966 kum khan a pa Aizawl kal a zui a, an haw lam chu Kepranah an riak a, an thlenna inah chuan MNF rammu sawrkara Vice President Pu Lalnunmawia hnungzui Tea tia an koh mai a hming tak pawh a hriat zui tak loh te nen an thleng ho a. Tea hi a tawng duh hle a, “Ti hian kan



ram tan theihtawp chhuahin kan bei zel ang a, huntha a rawn inher chhuaha kaw l a en hun a la rawn thleng ve mai ang. Chutih hunah chuan ral tawh mai se lei niinawm hi tih hla satu te chu an hla sak anga a thlen mai hlahtawhnna avangin Lung Inah kan khung duh ang,” tiin a ti ti bawrh bawrh a. A kiana thu tleirawlte Lalhlupuii hnenah chuan, “Mami, i nulat hunah chuan ram tana thawk chhuak ngei pasaloh nei ang che aw,” tiin fiamthu tih tihin a hrih a. Lalhlupuii leh a pa chu an khua Phuaibuanga an haw dawn tuk chuan,” Dam takin aw.” tiin an inchibai a, an inthen ta a ni.

Lalhlupuii chuan Tea chanchin chu a hre zui ta lova, an ina MNF rawn kal thin te hnena a zawh lah chuan an hre fuh hlawn si lova. Mahse tlaikhawhnuah rammu thian thenkhatte ka atangin a hre ta a. 1968 kum khan Pu Lalnunmawia hoa Tiau kama an awm laiin Tea chuan eirawng a bawl a. A eirawngbawl lai chu Burma sipaiin an rawn kap thut mai a, a nak ding lam hnuaiah an kap fuh a, hliam tuar chung chuan Tiau lui fintu lui pakhat Burma ram lam a mi chu a zawh a, in chhung dung chen aia thui deuh a zawh hnu chuan Lengkir a lo awm a. Lengkirah chuan a lawn kai a, lengkir chhak deuhah chuan kawr kam vei lamah kham chhawrdawh deuh hi a lo awm a. Chu kham chhawrdawhah chuan a lawn kai leh a, kham chhawrdawh chung a puk zau vak loah chuan a mu chawl ni ngei tur a ni.

Puk a thlen hnu chuan thi mai lovin harhfimin hun engemaw chen a la hmang tih chu a sulhnu atangin a rin hriat theih a. Burma sipai awm tawh loh hnua a thian ten a awmna an zawn chhuah chuan

pukah a zangthalin a lo mu a. Thlalak 2 an chhungkaw thlalak leh a bialnu niawm tak nula hmel fel deuh thlalak a awm chungah a awm a, a lung lukham hnuaiah pawisa note pawhsawm a awm bawk a. A pawisa neihchhun chu hmelmain a thih hnuah an la anga an hmang ang tih a ngaihtuah ni ngei tur a ni.

Lahlupui'n Tea chanchin an hriat chuan a rilru a khawihin a ngaihtuah thui hle a, bawihsawmtu nei lovin ramhnuaia hmun khawharah mahni chauhin hliampui a tuar a, a thi ngei dawn a ni tih hriain a thlalak kawl chu a han thlir ang a, a nu leh pa, a chhung te leh a thiante a va han ngai dawn tehlu em..! a khawngaihthlakin a va han lainat awm tak em tiin a ngaihtuah a, Aw kan phal lo tih hla hi a rawn phuah ta a ni.

Nu leh pa, unau leh thiante nen inhmuh leh beisei chungin in inthen a. Mahse chu i beiseina chu a thlawna changin khawvel atanga seng i ni ta si a. Hriat ngailoh ramhnuaia maw thihna i tawn tak, dam chhunga i kimtlang leh hmel hmuh leh ni a awm tawh lo tur leh i hming an reh vawng vawng mai tur hi chu ka ngaingam lovin ka phal lo a ni. I nuin awmpui chein i hliam te chu han silsak che sela, i unau leh i thiantha ten han bawihsawm che sela chuan thin a dam deuh tur, mahse tuma bawihsawm lohvin mahni chauhin ramhnuaia khawhar taka i han tuar hi chu thin a va han na tehlu em. In dam lai ni a tawi lu deuh hi chu a pawu ngei mai, tapin inthen mah ila van khawpuia chuan kan la inhmuhkawm leh ang. Thang leh thar la rawn awm zel tur ten nun chhenfakawm an neih theih nan kanhlan ta kan hringnun hi tiin kan thian thi ta te chuan an thih chhan min hrihlin an hmabak an hlenchhuah hman loh chu kan koah an nghat nghal a ni tiin hla phuahu hian a rilrua a ngaihtuahna chu hlaah a rawn siam a. Chang 2 naah chuan

Chun Nunnemin i tang vuanin han chul vel se,
Lungchim takin aw hmangaih ten bawihsawm ve se;
Thinlai a fan, lunglai a na, tuar thiam a har,
Tukloh ramdai mah riak ten maw i lo ngah le.

Chang 4 naah chuan

Aw kan lenrual lungduh zamual liam ta te chuan,
Thang leh thar tuai ang lian tur te nau ang nuhi nan;
Kan vawiin ni hi in naktuk atan kan hlan,
Tiin anka biahthu nem ten min lo chhiah ta.

A thunawnah chuan

Aw kan phal lo, kan phal lul lo aw i chan hi,
Aw i sakhmung rial ang dai tur kan ngai ngam lo,
A mi dailam rawnah famkhua i chang ta maw,
Aw i sakhmel dar ang tawnni a awm tawh lawng.

I hmel hmuh tur awm tawh lo tur leh i hming lam rik ni tawh ngailoh tura, hriat ngailoh ram hnuara i thi ta mai hi chu hriatthiam har ka tiin ka phal thei lo a ni tiin a ui zia a rawn sawi chhuak a. 'Aw kan phal lo' tih hla a phuah laia nula hemi lehkhahu buatsaih laia Pi ni tawh Lalhlupuii hi a pasal C.Zama leh a tu leh fa te nen Chawnpui veng Aizawlah an awm a. 'Aw kan phal lo' tih hla hi Pi Siampuii Sailo in thiam tak maiin a sa a, 'An nun an hlan ta ramdaiah' tih film khar nan an hmang nghe nghe a ni.

AICHHINGA

Pu Aichhingah hi Khawzawl khua a ni a, MNF party in Independent a puan hma khan Khawzawl M.E. School (Private) ah Headmaster hna a thawk a, Independent puan anih khan a hna chu bansanin a rammu ve nghal a. Rammu sawkarah chuan silai keng pawlah telin Eastern Command-ah Captain a ni a. 1967



ah Army Hqrs. ah sawn a ni a, AHQ ah hian Major ah a kaisang a, 1968 kum chawhnu lamah sipai chu chhuhsanin Administration lam khawihthu Civil Dept. ah a tel ta a. Lurh Bungah Superintendent of Taxes hna a chelh a.

E.Pakistan tlakthlak hnu 1969 kum khan Superintendent of Trade and Commerce hna chelhin Govt. Store a enkawl a, November 1970 khan Member of Parliament (M.P) ah thlan a ni a. E.Pakistan a tlawm khan Arakanah an pheih a. 1973 kum tir khan Col. Lallawta nen Arakan atangin Mizoramah an rawn chhuak a. Ni 6-3-1973 ni khan Electrick veng Lungleiah 12th Jat Regiment in an man a. Lungleia ni 3 an kawh hnuin an tanna atangin an phur chhuak a. Nilenga motora an phurh hnuin Bankerah an dah ta a. Khawi hmunah nge an awm tih pawh hre lova thla 3 zet Banker thimthama an awm hnu chuan June 1973 ah Aizawl Jail-ah an lut a, Aizawl Jail an thlen hnuah thla thum lai an tanna chu Tuirial sipai camp a ni tih an hre chhuak ta chauh a ni. Tuirial sipai campah hian Col. Lallawta leh Capt. Lalhlana te nen tan tir an ni.

Aizawl Jail atang chuan 1975 ah Jorhat Jail-ah an thawh a, kum khat hnuah Tejpur Jail-ah an thawh leh a. Tejpur Jaila a tan lai chuan Calcutta Conventiona tel tura hruai chhuah a ni a. Chhunah chuan Convention-ah a tel a, zanah chuan Calcutta Central Jail-ah an tan tir a. Calcutta Convention zawh hnu chuan Calcutta Alipur Central Jail-ah thla thum a tang leh a. Thla 3 hnuah Aizawl Jail-ah an thawh chho a. Sept. 1979 khan bail in a chhuak a, Aizawl khawpui

chhuahsan an phal loh bakah chawlhkar tin Court-ah a in report a, 1980 khan Pu Laldenga'n Emissary atan a ruat a. MNF rammu sawrkar leh India sawrkar aiawh te inbiakna chu 1982 khan tih tawp a ni a. Inbiakna a tawp rual hian an man lehngal a. Aizaawl Jail atangin Silchar Jail-ah an thawh thla a, kum khat leh thla 6 zet a tan hnuin 1983 kum tawp khan a chhuak a. 1984 a inbiakna chhunzawm leh a nih atanga inremna thuthlung ziah fel a nih tak 1986 tleng khan Emissary hna hi a thawk ta a ni.

A mah hi pa kawm nuam leh fiamthu duh, fiamthu pawh dawh tak a ni a. Jorhat Jail-a a tan lain hla 3 Ka hmangaih Zoram, Zoram chhantu tih leh Anpai Jail run tih hla a phuah a. Heng hla lo pawh hi hla tha tak tak a phuah a. A hla phuah te hi a thu a chhiep rem thiamin Mizo tawng a hmang thiam hle a. A thluk hi aman a siam nghal a, a thluk a mawiin sak pawh a nuam hlawm hle a ni. He lehkhahuah hi chuan hnam hla atana a phuah 3 chauh tarlan a ni.

Zoram chhantu tih hlaah chuan Zoram chhana tlangval rual rammu te chu ramhnuaiah chengin khawsa mahse khawchhung ngai chuang lovin ramhnuaiah muang takin an awm a. Zofa te kan hlim ve theihna turin silai nen vai sipai te chu an bei thin a ni tiin

Aw, saw raltiang lentu pui cham dur,
Chhuihthang val rual dar ang lenna,
Thinlai muang ten zanmu an chhing,
Chhun ni an leng lentu karah,
An ngai bil lo vangkhawlai zawng,
Chengrang chawiin tuan zai an rel,
Hmelma pheisen ral lian karah.
Zofa te lung lai lawm nan.

A chang 2 naah chuan

Rual zawng laiah ka lung min len,
Len ve ka nuam lentu karah..
..Dar ang lenna Jail run hliapah
Ngaihla a zual lung lam ka vai.

tiin a thian te nena ramhnuai khawsak ho a chak thu leh Jail-a a tan tlat avanga hrehawm a tih thu a rawn sawi chhuak a.

Ka hmangaih Zoram tih chang I naah chuan a pianna ram chu a hming ringawt pawh a mawi a, pangpar chi hrang hrang par vulna, ngawin a bawh vel ram, thlifim tleh heuh heuh na leh Zotui thianguanna ram Mizoram chu a chhunga cheng hringmi leh nungcha ten a par zu hi kan tlan ning lo a ni tiin thiam tak maiin a phuah a

Aw, ka pianna Zoram, i sakhming reng a mawi lua c,
Nungcha zawng leh hringmi ten kan awi ning lo che,
Par mawi tin vulna ram nuam...
..Zotui thiangu leh thlifim lenna

A chang tawpah chuan


Ka dawn thinlaiah, rairah kan tahna Zoram hi,
Dikna silhpuan sinin remna parthi batin
Hmangaih insuih tawnin rual zaawng khuma hmatiang sawnin,
Kan hnam puanzar kan zar hun tur chu hmangaih Zoram ngeiah.

tiin dikna puan sina remna parthi awrha, hmangaihnaa inkuangkua chungu kan hnam puanzar hnuaia ram development kal pui a chak thuin hnu a khar a.

Anpai Jail run tih hlaah chuan nilengin khawhar takin Jial-ah hun kan hmangral a, zan lah dang chuang lo, awka vin ngaithla chungin mi ten an lo sawi thin Tan In ah riah run kan rem a, hetiang hi kan chan tur renga siamtun a lo ruat emaw ni dawn le ? Ngaihtuah ngam pawh a ni hlei nem tia bul tanin

Ka dawn sei ngam lo kan'chan tawk,
Khuanu rel reng em lo ni ?
Chhun ni kan leng zantiang khumin,
An sawi anpai Jail run hliapah.

tiin chang khatna a phuah a.



Tawngkam hawihhawm leh thlum duhsakna tel lova, tawngkam
vin leh thinur awka ringawt nitina an dawn thin chu a ning hle a.
Jail-a a tan hmaa a thian te nen khaw hrang hrang tlawha an zin kual
lai leh silai kenga vai sipai an beih ho lai te chu a ngai em em a. Chu
thu chu a thunawnah hmangin

Biahzai kan rel thiam lo,
Anpai zaleng zingah,
Ngaih lai a zual lungduh te nen,
Chengrang chawia chhingkhual kal lai ni leh
Doral lian kan tawn lai ni te

tun a phuah a.

Maltin sawmtu chung Khuanuleng,
Zoram hmangaiha rammu te,
Pheisen ral man saltang te nen,
Hlim ten min hruai khawm leh ang che.

tia siamtu chu address in, Nang mite malsawm thintu chuan Zoram
hmangaiha Zoram chhana rammu te leh vai sipai in an man Jail-a
tang mek te hlim takin min hruaikhawm leh ang che tia siamtu
malsawmna dilin Anpai Jail run tih hla chu a khar a.

He lehkhahu buatsaih lai hian Pu Aichhinga hi Cabinet Minster
a ni a, Aizawl West 1 hial atanga MNF party ticket-a MLA thlan
tlin a ni a. Tun tum hi MLA term 4 a thinna a ni a, Babutlang Aizawlah
an chhungkuain an awm.

CAPT. LALHLEIA THI PHUAHNA

Phuahthu - Rengliana

Mizo tlangval pasaltha, huaisen Capt. Lalhleia chu ni 6-3-1975 tlai thim thet thet khan Luangmual Chawlhmunah vai sipai silaimu tuarin a thi a. A ruang hi a pa nau T.Chhangte Khatlaa awmin a hlawm a. Hemi zan hian Aizawl veng hrang hrang nula leh tlangval ten a lu an men a. Ni 7-3-'75 tlaiah Khatla thlanmualah an vui hian ta a ni.

Capt.Lalhleia thih thu hian hunreilote chhungin Mizoram a fan chhuak a, “A va pawl tak em..!” tih leh “Sipai kahhlum nge ni ang, amah leh amah inkaphlum,”? tih chu mi tam tak te zawhna leh sawl tam ber a ni a.Mi huaisen hmigthang te chu hmelmah ten an dang kawlawka an hual vek a nih pawhin, a tawp thlenga ral rath thlenga tang tura ngaih an ni a. An silaimu neih pawh kap zo vek lova, an mahni inkahhlumna tur zuah tura ngaih an ni a, chu chu an mahni pawhin an duh dan a ni.

Mizo Upa-in “Mi huaisen chungchuang leh Lal ropui bik te an thih tum chuan an thih zan (lumen zan)ah ar a khuang ngai lo,” an lo ti thin a. Thil chikmi thenkhat chuan Capt. Lalhleia lumen zan hian Aizawlah ar a khuang lo niin an sawi.

Lalhleia thih (sunna) hla hi chang 5 niin thunawn a nei bawka. Chang 1 naah chuan Zoram chhana rammu tlangval huaisen leh pasaltha. Zoram dung leh vanga mi te hriat leh theihngihl tawh ngai loh turin damlohna nei si lova thihna a tawka ta mai chu hriatthiam har a tih thu a rawn tarlang a.

Awmlai leng si lo kei ka tuarzo dawn lo,
A fam ta e, Zoram mihrang pasaltha chu,
Darfeng val rual zaleng zawng zingah,
Sakhming mawi chul lo tur, aw Zoram tluanah.

I thihni chuan Aizawl khawpui a ngui ruai mai a, Mizo lal ropui Lalmanga thih ni pawh kha hetiang bak hi chu a ni bik chuang lovang, mi tin mai hian an sun chein an tap bang thei lova, ar tak ngial pawh khuanzai rel lovin an ngawi thiap mai a ni tiin

I fam tak ni khan Zawl khawpui tlang a ngui,
Lalmang vangkhua thlafam ni pawh a sang bil lo;
Luaithli nul bang thei lo zaleng zawng zawng ten
Zai vawr an rel thei lo, aw bawhar zawng ten.

Chang 4 naah chuan pasaltha huaisen mi ten tlukloh ena an en chu zam miah lovin a thi ta maw..! tawrh thiam har ka va ti em, hetiang a thi mai tur hi chuan ka phal lo che a sin.! La dam ve la chu Zoram hi i siamtha ngei ang tiin

Ka tuar thiam lo, aw suihlung phang lo tein,
A kal ta e, mihrang rualkhum zaleng chhingtu;
Rihsang mual liam turin ka phal lo che,
Ding rih la Zoram nuamah i siam ngei ang.

SANGKHUMI

Mizo nula leh tlangval ram chhana rammu te inpekna chu a han chhut thin a, a ngaisangin a zah em em a, chawimawi an phu hlihah hlihahin a hria a “Zah ula, chawimawi rawh u” tih hla hi a phuah ta a ni.

Chang 1 naah chuan tlangval rammu rual te chuan an khua, an chhung te leh an thian te anngai ve hlawm hle ang tih chu hriatsa a ni a, mahse ngai lo ang maiin Zoram mipui te dikna leh zalenna venghima Zoram chhan turin an chhuak (rammu) a, ramhnuai ngaw karah te an khawsa ta thin a ni tiin ram tana an inpekna chu a fak a

A chang 2 naah chuan Zofate awpbbeh luih an nihna tanga chhan chhuak turin silai leh chempui nen hlau lo leh zam lovin hmelma chu an bei a. An thisen chu Zofa te tana leihbuain an nunna chu Zoram tan an hlan ta tiin

Hmelma lian, doral lian karah,
Chengrang hnamechem an chawi,
An duai ngai lo, an zam ngai lo rual zawng laah,
An thisen, an tha leh tui,
An nunna, an theihna an hlan ta.
Saltang Zofa te chhan turin.

Chang 4 naah chuan a thim-a var thlu lo leh eitur nei lova hrehawm tinreng an tawrh pawha vuihmuipu lova, hlim taka hma lam pana kal zel MNF val rual te hi khawvel hriat thamin thangin sang zel rawh se tiin

Chhuan tam nghei, zanmu chhing lo,
Hrehawm hnuaiah pawh,
Phunnawi lovin hlim ten hmatiang
An sawn zel e, MNF val rual hi,
An thanlai sang zual zel rawh se khuavelah.

A chang tawp beah chuan zalenna ni a rawn her chhuah hun
pawha rawn kir tawh ngai lo tur ram leh hnam tana Martyr te ka
ngaihtuah chang hi chuan ka lung a chhiain ka thin a na vawng vawng
thin, aw Pathian, lo lawmin lo chawimawi ang che tin

Mahse aw thinlar a na, kim ten ka dawn changin,

Ram leh hnam tana nunna pe lungduh te kha;

An kir lawng, zalenna ni kawlah her chhuak mahse,

Khuanuleng, chawimawina lo hlan ang che.

JORDANA A.O

Pu Jordana hi Administrative Officer a ni a, A.O hna thawk chungin a theih ang angin MNF rammu te a tanpui thin a, vai sipai hoin thudik leh diklo pawh thliar hrang lova Zoram mipui min rawn phingchil bawrh bawrh mai chu a ngaithiam lova. Dikna tana lungruai taka beih ho a tul zia leh chutianga beih a nih chuan hnehna chu Zofa ten an la chang ngei ang tih ngaihtuahin 'Zalenna ni kaw! a eng ngei ang' tih hla a phuah a. He hla hian chang 4 leh thunawn a nei a ni

Chang 1 naah chuan diklo taka dan siamchawp hnawl tur leh kan ram neihchhun Zoram humhim tura silai nena tlangval huaisen rammu te chuan khawvel pum hi an deng chhuaka tin

Lawi ang kan than kan ram hi kan ta,
Val an hrang khuavel dengkim ngei c,
Dan sual atna puan ang hnawl turin;
Chengrang chawin thanhawl valan tuan

C'hang 2 naah chuan nunrawng pui pui ich sual tak tak vai hoin min rawn run a, mahse dikna tana lungruai taka kan do tlat chuan an la tlawm ngei ang.

Nunrawng ze tin sual chitin phur,
Thlang kawrvai tur ang an lo lian e,
Thudik tan thil tha ti lungrualin,
Pal ang kan dan an la nem ngei ang.

Chang 3 naah chuan zalenna ni a rawn her chhuah hunah chuan hmanlala pasaltha leh huaisen 'mihrang' te an chawimawi angin ram tana thawktu te ropui takin kan lawmin kan chawimawi anga, chutih hunah chuan Lalpa lam tang lova min bei min beitu te chu an zam anga min bei ngam tawh lovang.

A lo eng ang zalenna ni kawlah,
Hneha ropui hrang kan lam ni chuan;
Pathian leh kan ram tana tang lo chu,
Suihlung phangin an la nem ngei ang.

Dikna puanzar zarin zam lo leh rinawm takin kan ram tan kan
ber zel e, zalenna ni ala rawn her chhuak ngei ang tiin a thunawnah
chuan a rawn chhep chhuak a.

Pathian leh kan ram tan rinawm takin,
Dikna puanzar ropui chu chawjin;
Zam rel lo ten hmatrang kan sawn zel,
Zalenna ni kaw! a eng ngei ang.
Pu Jordana hi a nupui fanau te nen Serchhipah an awm.

L. RAMHLUNA

L.Ramhluna hian ‘A paw em mai Dengmam’ tih leh ‘I luangral tur kan phal lo’ tih hla a phuah a. A hla thute hi a chuktuah rem thiam hle a, ‘A paw em mai Dengmam’ tih hla hi ram leh hnam tana rammu ten sawichhiatna leh selna anka tinreng phur chung a thiantha te pawh hmu phak lova Jail-a tang te a phuahna a ni a. Harsatna leh tihduhdahna hnuaiah pawh zam lo turin a fuih nghal a . Chang 1 naah chuan ram leh hnam i hmangaih vangin i tuallenna Aizawl khawpui chu chhuahsanin Jail hrehawm takah maw i tan tak le..! Tihduhdahna tuarin harsatna hmachhawn mah la, zam hauh suh ang che aw..

Ram leh hnam vanga riang hlei hluan Zoramchhuana,
Zawl khawpui vangkhua hnutiang i chhawn;
Ngai lo iang Jail run thim maw i nghah,
Suihlung phang lawng che thim lal tawnah

Chang 3 naah chuan Mizo mipui te chu Israel te Babulon sala an tang kha tehkhinin vai awpbehna hnuaia sala tang anga inhmehbelin , Zoram mipui te kan sal tanna atanga chhuah kan nih ve theihna tura beitu rammu rual te hian zalenna ramah min hruai thleng ngei ang che u.

Babulon sal tang zalen ve na turin,
Chhuihthangval lenmawi zaleng chhingu,
Buaina Jordan lui ral ram nuamah;
Min thlen ang che aw zaleng zawng zawng.

A thunawnah chuan Thianpa Deng, vai chhe ho vanga rethei leh chanhai taka i awm ta hi a va han paw tak em..! Zoram chhan tlangval huaissen, min fuihna awka nem kha kan theihngilh ngai lovang tiin

A paw mang e, Dengmam i riang lua e,
Thlang kawrvai doral vanga maw rairah i chan,
Zalenna ram chhan chhuihthang valmawi,
I anka nem nghilh ni a awm lawng e.

'I luang ral tur kan phal lo' tih hla chang I naah chuan natna
vanga thi te mah hi hriatthiam har kan tih laiin kan duhlai kan
hmangaih em em Zoram chhantu te vai sipain an that ta maw..!

Awmlai leng mah kan ngai thiam lo,
Pheisen darfeng doral an lo liana,
Kei ka lungduh ka lawmna ber,
Zoram chhantu famkhua an lawi tir e.

Chang 2 naah chuan i nu, i unau leh i thian ten awm ngaihna
pawh kan hre lo..! I sulhnu leh i thalak kan thlir chang hian kan tap
lo thei lo a ni..

I chun leh unau lenrual zawng ten,
Tinkim dawnin awmkhua kan rel thiam lo,
I sulhnu leh i hlimthla leng thlir changin;
Luaithlipui kan nul leh thin.

A thunawnah chuan

I chun leh unau rual zawng ten,
I sakruang nem kan chul nem maw,
Hmar tlang ramdai piallei karah;
Rial tui ang i luang ral tur kan phal lo.

I nu leh i unau ten kan bawihsawm lohva ramhnuara i han
tawihral mai tur chu kan phal lul lo a ni tiin a lunga dam loh thu a
chhep chhuak a.

SGT. VANLALRINGA

Vanlalringa hi Sialsuk khua a ni a, Mizoram
 zalenna a soal hma atang khan MNF volunteer-ah a
 inpe a. School kal chungin silai hman dan te a zir thin
 a. Zoram zalenna puan anih khan a rammu ve nghal a,
 rammu sawrkarah chuan silai keng pawlah telin 'Z'
 Battalion a zawm a. Vai sipai te nen vawi tam tak an
 inkap a, thih thelh chang pawh a nei nual a ni. Vai sipai nena an
 inkah changa vai silaimu tuara an thian thi te chu mittui nen an vui
 liam thin a. A mah hi tlangval nungchang tha leh huaisen tak, hotute
 thuawi thei tak a ni a. Zoram hi Lalpa lalna rama din tura an thawhnaah
 Zoroma soalna a lo reh theih nan Lalpa chu rawn inrawlh tura sawmin



Lalpa, i lalna rama din turin,
 Zofa leng ten pheilai khawngin;
 Kan ram soalna a lo reh nan,
 Lalpa kan ngen i khawngaih malsawmna.

tiin chang 1 na chu thiam takin a phual a. Chang 2 naah chuan

Aw kan lungduh lenrual then tak ten,
 Fam dairial chang tawh mahse;
 Kan nghilh lawng che khuarei mahse,
 In thisen man Zoram aral hma chuan.

tiin a thian mual liam tawh te chu an hriatreng tur thuin a chang a
 khar a. A hla phuahtu hian 'Z' Battalion a zawm tirhin Private (sipai
 bel nei lo) a ni a. Ram leh hnam tana hna a thawh laiin 1975 khan
 Kolasib-ah vai sipaiin an man a, vai sipaiin an mana vanduaia a
 tawh hmain Sgt. (bel thum) a bel hman a ni. Hun rei tak Jail bang a
 zut a, Jail bang a zut hnum hlurh hnuah, Jail atangin a chhuak a, he
 mi lehkhahu siam lai hian Zotlang Aizawlah an chhungkuain an awm.

SAITHANGPUIA

Luangpawh lal tupa Saithangpuia Sarlo (Sarlo
uh hi a hming ziahnaah aziak tel ngai meuh lo a ni)
hi MNF party in Independent a puan hma khan
volunteer-ah a inpe a, Independent puan a nih khan a
rammu ve nghal a. Central Command 'V' Battalion
tia hriat hawk chu a zawm a, Lieutenant rank pek a ni
a. 1967 kum tir lam atang khan 'V' Battalion chu



chhuahsanin MNF rammu sawrkara Administration lam khawih Civil
Dept. zawmin Run Bunga Account Branch-ah Accountant hna a
chelh a. 'V' Battalion a chhuahsan hnu lawk hian a nau Lalfima chu
rammu vein a u chhuahsan 'V' Battalion chu a zawm ve ta a ni.

Mizo sipai ten Mizo chhangban an duh zia a hria a, amah pawh
hian Mizo chhangban chu a ngaina ve em em a. 1966 Christmass lai
Luangpawh rama 'V' Battalion Hqrs. a Mizo sipai thahnem tak an
awm lai. a mah pawh an zinga ala awm ve lain Chhang hla hi a
phuah a ni. Chhang hla chang 3 naah chuan chhang dengtu ten chhang
ei tura Mizo sipai te sawm ngei tura nengin

Chhang dengin in hriatreng tur chu,
In ei hmam ngaihtuah ula,
Mizo Army in an duh em kha,
Khawnge i sawm teh ang tiin.

Chang 4 naah chuan

Chhang ei tur kan tawn chang chuanin,
Manager in an siam vel a,
Chutah kurtai a han thet a,
Kan hmeh belhbawm kan chhawk hmawh thin.

tiin chhang ei tur an tawn hnua an ei dan a rawn sawi a. Rammu val
rual ten Mizo chhangban an duh hawk a, rammu zingah chhang hla
hre lo an awm lo ti ila kan tisual lem awm love. Social-naa Mizo
sipai ten chhang hla an han sak thup thup mai chuan an kianga awm
pitar leh putar te pawhin lo zawm vein an sa thap thap thin a ni.

He lehkhahu ziah lai hian Pu Saithangpuia te chhungkua hi
Chawnpu i veng Aizawlah an awm a ni.

SGT. LALCHAWILIANA

MNF party in Mizoram zalenna a puan hma deuh khan MNF volunteer-ah a inpe a, mahni inlama hna tul kalsanin hotu ten tul an tihna lam apiang tualchhung leh khual khuaah te party tan hna a thawk a, amah hi Chawngtleng khua a ni. MNF in Zoram zalenna a puan khan an in chhung lum kalsanin a rammu ve nghal a. Rammu sawrkarah chuan silai keng pawlah telin Mizo chak hmingthang leh pasaltha huaisen Saizahawla hmingchawia an sak 'S' Battalion ah a in enroll a. A thian te chuan Chawia tia ko mai lovin 'Chawipoh' an ti kher thin a, a thian ten an koh thanna a nih avangin ani pawhin huatah a la lova, Chawipoh tia ring zeta an koh pawhin ring takin 'Eihah' a ti mai thin a ni. Pa ti ti ngah tak leh luruh ring a awmnaah chuan phul lui mai chi a ni a. "Hei Pu Laldenga te reuh hi mi dangdai tak mai a ni a, Independent hi min hrui thlang tak tak reuhin ka ring a nia ," a ti fiamthu thin a.

Laldenga'n lal zawng a deng kim ngei,

Kei nin kan fawn (phone) Zion tlang leh chhandamtu,

Zalenna kawl zawng a eng ngei ang

tiin hla a phuah a. A mah hi mihlim kan tih ang lam rawng kai deuh a ni a, a hla phuah chu a man a thluk a siam a, a sa nghal ul ul a. He a hla phuah hi Hmawngkawn khua Pu Chana pawl (Khuangtuaha pawl tia hriat thin, amah a thih tak avanga a fapa Chana'n a dinhmun a rawn luah tak hnua Chana pawl tia hriat tak) ten an tuipui hle a. Pu Laldenga hi Zoram hrui chhuak tura Pathian belruatah pawmin 'Mizo Hnampa' tiin an sawi thin a ni. Sgt. Chawia hla phuah chu khuangpui nen an sa hep hep mai a... MNF rammu te tan chuan a ngaihthlak a nuam ngawt ang. Mi thenkhatin Chawia hla phuah thluk milin hla dang an rawn phuah belh zel a, a vai chuan kan tarlang seng lo ang a, thenkhat chauh lo tarlang ila:-

Ka nu tap ruai hian mi ring lo la,

Assam Rifle Quarter Guard kan tawn ni chuan.

A sur hian ngenmu a sur sung sung.

Laikhum leh laikhum a dang ngei e,
Keini laikhum mi tukram chulhnu pawl kara'n;
Khuangruah sur si lo kan hnawm chip chiap.

I timak reng reng e Pu Laldeng,
Runlum nuthai i sem leh si loh chuanin;
Kan vak tar mai awm e val rual hi.

Sajek tlangdunga an awm lain Chhippui khuaa intihhlamna
Social an neih tumin Capt. Ralkhuma 'V' Battalion leh a ho ten Pu
Laldenga te nupa hmaah kan rawn tarlan hla khi an sa a, Pu Laldenga
te nupa pawh an nui char char mai a sin. 1968 khan Sgt. Lalchawilana
hi vai sipai te nena an inkahnaah vai sipai silamu a tawng fuh hlauh
mai a, khawvel atanga sengbo a ni ta ani.

C. DURTHANGA

C.Durthanga hi Durtlang khua a ni a, MNF party in Independent a puan khan a rammu ve nghal a, rammu sawrkarah chuan silai keng pawlah telin 'V' Battalion a zawm a. 'V' Battalion hi Central command tia sawi a ni tho bawk a. 1966 September thla khan 'V' Batalion chu thiah (disband) a ni ta a. An silai zawng zawng pawh an tung vek a. 1967 khan an din tha leh (reorganised) a ni.

C.Durthanga hi tlangval ti ti ngah leh kawm nuam tak a ni a, zai hi nuam a tiin zai hi a til thenna lam a ni a. A mah hian zai a thiam thu a sawi ngai lova, mahse mi ten zaithiam an ti a. A mah hi mi lungleng thei tak a ni a, hla a phuah a, a hla phuah chu a thluk a siam a, a sa nghal mai thin a ni. Nula tlangval te chu ramchhana rammu ve tura sawmin 'Sawm che ka nuam underground puiah' tih hla a phuah a. Nula tlangval te chu Zoram mawi leh nuam taka lenga khawsa an nih angin an chenna Zoram chu chhan tura sawmin

Sawm che ka nuam underground puiah,

Nang lova tlai nilen a har si ;

I nuam lawm ni i pianna ram chhan chu,

Zoram mawiah Khuanun a chaw lian che.

tiin bul a han tan a. A chang tawpah chuan duhthu an sam thin, Zoram zalenna ni rawn her chhuak tawh se, an bialnu te nena hlim taka athianga len ve a chak thu chu

Lo her chhuak tawh langin aw Zoram,

Duhaisama ka thlan zalenna;

Ka tawn di par ang ka lawm ve nan,

Zaleng zawng te kan lawm a kim tawh ang

tiin thiam takin hnu a khar a.

Thingtlang khua a kalna tawh phawtah chuan in-chhungah emaw sumhmunah emaw tual zawl remchang deuh laiah te a han zai ta mai thin a. A zai ri hre pha naupang, nula leh tlangval, nu leh pa te tlengin a zai ngaithla turin an rawn pung khawm a, an bial tuau tuau thin a ni.

Ram leh hnam tana a rammut laiin 1967 khan vai sipaiin an

man ta hlahh mai a, Jail-ah a tang ta a. Jail-ah chuan Mizo tlangval leh pa tam tak an tang a, nula pawh tang an awm nual a. Ram leh hnam tana a tha leh zung thawh thei lova Jail-a tan reng chu nuam a tilo hle a, thian zaho a an rammut laia vai sipai an kah ho lai te chu a rilru mitthlaah a rawn lang a. 'Jail run thim' tih hla hi a phuah ta a ni.

Kumsul mah vei se hleih ten kan nun a dang lo,

Ka ngai thin lenrual lungduh te nen chengrang chawi a....
tin a mitthla chu hlahh chantirin, engtikah tak kan tan hlimna ni tur rawn her chhuak ve tak ang maw..! Jail-a tan reng mai chu a va han zuamawm lo ve...!

Engtikah her chhuak ang maw hlim ni tur,

Hei hi chantawk Khuanu ruat em lo ni ?

Ka zuam lo kumtluanga Jail run thim nghah reng zawng,

Sual leh thim lal nunrawng te an leng si.

tin a thunawn a phuah a. Jail run thim tih hla hi Jail-a tang zawng zawng ten thiam ngei ngei tur tih thupek awm mah suhse Jail-a tang ten an thiam vek a. Jail chhung chauh ni lovin Zoram pum a deng chhuak a. All India Radio Shillong-ah Jail run thim hla hi khung a ni a. He tih hun lai hian ngaithlatu te hla thlan AIR in a tihchhuah thinah pawh he hla hi thlan hlawn pawl tak a ni. C.Durthang hian hla a phuah hnem hle a, 250 lai a phuah a ni. He lehkhahu siam lai hian Zawlnuamah a nupui fanaute nen an khawsa a ni.

1966-1967 chho vel khan 'V' Battalion-ah zaithiam an awm nual a, rammu Battalion hrang hrang zingah zaithiam ngah ber an ni awm e. Chung zaithiam te chu kan sawi mek C.Durthanga Durtlang, Lalsanga Zobawk (Paikhai bul) Zoliana sailo Aizawl, K.Malsawma Saitual leh Lalngurliana Sailo Baktawng te an ni a. Zaithiam te hi an kalna apiangah miten an lawm em em a, Capt. Lalthlana phei chuan zai thiam ve a chak thu hi a sawi a sawi thin a ni. Zaithiam zinga a chanchin han sawi lan deuh ka duh chu Lalsanga Zobawk 1968 kuma chatuan ram min pansan ta chanchin hi a ni a. A mah hi tlangval ria lam deuh hmelchhe lo tak hmeichhe ngainat zawng tak hmel a pu a niang chu. hmeichhia ho hian an ngaisangin tha an ti thei em em thin a..

Ka rilru mitthlaa cham reng chu 1968 May thla khan Pawlrang

khuaah kan awm ho a, nula Rinthangi te inah kan awmkhawm taih a, zai turin an han ngen fiam a, a thil chak zawng tak nimahse zahzelah, “Ka hritlang deuha ka zai thei dawn em ni chu aw...” tih pahin aw a han thian kharh kharh a. “Zai hram rawh” tia tingtang an pek chu muang chang hian a han la a, tingtang hrui chu a han herh tha te te a..

..Han dawn kir chang ni hian,
 Chung thuvate hram leh sirva,
 Thing leh mauraw kur diam hian,
 Thinlaia ti thar leh thin..
 ..Bawihte bawihte ka ngai em che,
 Ka ngai ber che bawihte...

tiin a ahan zai ta hlerh hlerh mai a, a zai chhung zawng chuan kan ngawi thap mai a, in neitu nula Rinthangi hmelchhe lo tak chu ka va melh a, Lalsanga en chung chuan ngun em em maiin a lo ngaithla a. Lalsanga’n han khaikhem deuh se chu, “..I tan hmun ka thinlungah a awm...” tih hla sa thei mai tur, Lalsanga tan kawng zau taka inhawngin ka rin hmuh a, zaithiam han nih ve ka chak rilru hle a. Rinthangi chang pawh a ni lo, nula dangte pawhin, “..I tan hmun ka thinlungah a awm..lo leng ve rawh..” tih melhin an melh ni hian ka hria a. Lenga Pawlrang khua ‘V’ Battalion rawn zawm thar pawhin, “Zaithiam ve ka va han chak tak em...” a ti tlawk tlawk mai a sin.

Vanduai thlak takin July 1968 khan Lianzuala Republic Aizawl nen Tiuirialah an tlahlum a, an ruang pawh hmuh a ni ta lo a ni. Lalsanga chetla vel leh hlim taka a zai lai hmel chu ka mitthlaah a cham reng a. Hringnun khawvelah hian nung dama awma tuallai la leng zel atan ka duh a, uiawm ka tiin ka ui em em a, a chanchin hi ka han zep tel zawk a ni.

Zairemthanga hi Pu H.Philipa (RIP) leh Pi Rothangi (RIP) te fa 7 na a ni a, Gwahati University-ah Pre Medical a zir a, a zir zawh hmam Mizoram zalenna a sual tak avangin a zirlai chu chawlsanin Mizoramah arawn chhuak a, Zofa ten zalenna an hmuh ngei theihna tura bei turin a rammu ve nghal a. Rammu sawrkarah chuan Civil Dept. lamah awmin Phawngpui Bungah Supply Inspector hna a chelha a, a hna chanpual chu thin takin a thawk a, a thil tih tawh chu puitling taka ti duh leh tum tlai mi a ni. A u Lalthangliana leh a nau Thangzuala (TZA) te nen an unau 3 in an rammu a. A u Lalthangliana hi Phawngpui Bunga Lunglei bialah Deputy Commissioner a ni a, a nau Thangzuala hi silai keng pawl zawmin 'V' Battalion-ah a awm thung a.

Zairemthanga hi tlangval fel tak zuk leh hmuam ruitheih thila fihlim a ni a, amah hi tlangval tawng duh leh ti ti thiam a ni a. A rammut lai hian hla pakhat 'Mizoram tan' tih a phuah a, Pathianin hnam tin tan ram a pe a, Zofa te pawh min huam telin Zofa ten kan chang ve a. Mahse hnehchhiahtu ten an awphbet rih si a, kan thiamna leh remhriatna te hmangin kan ram chhan turin kan puanven kan sawichhing a, kan vanglai ni tha leh zung te thawha kan beihna hian Zofa te rumna hi a la chhawk ngei ang tih lam hawmin a phuah a. Chang 2 naah chuan Zoram chhan chhuak tura thih thlenga rinawma din kan tum tiin hetiang hian a phuah a.

Aw nang chhan turin Zofa leng zawng te,
Pheisen darfeng pheilai khawngza-in,
Fam dairial chan thlenga rinawmin,
Kan lo ding ta, nangmah chhan chhuak turin.

E.Pakistan chhukthlak vek tur tih order a awm avangin Darngawn (Lunglei thlang Darngawn) V.C.P thu sawi pui turin Darngawn khuaah a lut a. VCP inah a inngat a. Zana chuan VCP nen an ti ti a. A tuk ni 8-2-'69 zingah chuan Darngawn tuikhurah inbual turin a kal a.Tuikhura a inbual lai chuan vai sipaiin an nangching a, kawktu an hruai chuan "MNF a ni" a tih avangin sipai

chuan engmah sawi lovin an kap nghal a, a malpuiah an kap a, a malpuia thi put zuaih zuaih chung chuan an man a. Tuikhur vel chu a thi ngiai nguai mai a.

Dim deuha bawih sawm ta lo chuan a kut leh keah an phuar a thingtuaiin vawkzawnin an zawn ta a. camp an thlen chuan, "I in surrender chuan i hliam hi kan enkawl dam sak ang che," tiin in surrender turin an thlem a. "Ka in surrender emaw, surrender lo emaw ka hliam enkawl hi chu in tih tur a ni a. Hei hi international dan ding lai a ni. Ka chungchang thua chuan thih thlenga rinawm taka zoram tana thawk tura Bible nema intiam ka ni a, ka in surrender dawn lo," tiin a chhang a.

Vai sipai te chuan a hliam chu tuamsaka hnehin dim lo baksakin an sawisa ta vak mai a, duhtawka an sawisak hnu chuan in surrender turin an thlem a, "Ka hrilh tawh che u kha, Mizoram in zalenna a hmuh hma chuan rinawm tak a thawk turin Pathian hmingin ka inpe tawh a, chuvangin ka in surrender dawn lo," tiin a chhang a. Sipai ho thinrim chuan an sawisa uar sauh a, chumi zan chuan sipai camp chhungah an kaphlum ta a ni.

A u Lalthangliana Phawngpui Bung D.C. chuan a nau Zairemthanga thih thu a hriat chuan a rilru a na hle a, a chhungte hnenah a nau Zairemthanga thih thu chu lehkhah a thawng nghal a. A nau thih dan hrechiana an phumna hmun te tlawh turin ni 24-2-1969 khan a staff mi 6 te nen Darngawn panin an chhuak a. Lungchem leh Darngawn inkara an kal lain vai sipai thawm an hria a, kawng thlangah tawh liamin hnim karah an biru a. Vai sipai te chuan an hmu thawi hman deuh a, an kap zui ta chiam mai a. Vanduai thlak takin Pu Lalthangliana chu a luah an kap fuh hlauh mai a, ka pawh chhawn lohin chatuan ram a pan ta a ni. A ruang hi Lungchem khaw thlanmualah Lungchem khaw mi ten an phum ta a ni.

ZORAMTHANGA

Zoramthanga hi Samthang khua a ni a,
 Champhai atangin High School a zir zova, Manipur-
 ah College a kal a. 1966 kum tir lam khan B.A.
 Honour an exam zawh ve leh Mizoramahrawn hawin
 an in pawh tlawh lovin MNF rammu sawrkar a zawm
 nghal a. Run Bungah Area Secretary hna a chelh a.
 Mizoram hmar lamah hmun hnan hnanah an awm kual a. Ramhnuana
 an awm lai chuan Radio atangin B.A. result an ngathla a, a pass ve
 a ni tih a hriat chuan a lawm hle a, a thian te nen chibai an inbuk kual
 tal tal a. Thingpui an lum a, mau noah an thli a, thingpui sen hangin
 B.A. English Honour a passed chu an lawm a ni.



N.Serzawl chhuah lam ram camp-a an awm lain a mitthlaah
 an in, an chhungkua, a nu pangpar chin vul chik chek te chu a rawn
 lang a, a nu a mah hmangath em emtu hinuh a chak thu leh a ngath
 thu chu saptawngin a phuah a, a hla thupui atan 'I long to see' tih a
 hmang a. chang I naah chuan

I long to see mother at home,
 She is the only one that care for me,
 By now and then I feel the wind,
 That gentle calls me through the lulls.

tin mawi takin a rawn siam chhuak a. A chang dangah chuan ram
 tana nunna lo pe tawh te thisen chuan ram tana thawk zel tura a koh
 thu leh, chu hna chhunzawm zel chu a nu tan leh Zoram tan a nih thu
 rawn chham chhuakin, kan thi a nih pawhin mite hriat hlawh phak
 leh, kan dam a nih pawha mite hriat tham in kan awm tur a ni tih chu
 mawi takin

The bloods of dear my friends are calling me,
 It is for you O.! good mother,
 It isa for you O.! Thou Zoram;
 That I should live and die nobly.

tiin thiam tak maiin a phuah a. MNF rammu te chuan he hla hi an hre deuh vek hlawm awm e.

1968 kum chawhnu lama E.Pakistana an chhukthlak dawn lai vel chuan an thian an rammut pui thenkhat te chu an in lamah an haw nual a. India sawrkarin beihpui an thlak a, Mizoramah India sipai te an tamin mipui lakah pawh an inluling nasa hle a. MNF rammu te pawh an dinhmun a chep hle a. Rammu te chu ramhnuaia an awm zel lohva an chhungte kianga rawn haw tura thlemna thu Radio ah an tichhuak chamchi a. Chu pawh chu duhtawh lovin lehkhah te an sem a. Chutiang thlemna(sawmna) chu thlawhtheihna atangin hmun tam takah an thlak bawh a. Rammu te pawh an chhung ten haw tura an sawm avangin an buai rilru hlawm hle a.

“Chutih lai chuan ka rilruah hla phuah a rawn lang a, ka han ziaak a, ka phuah chhuak ngam ang em tiin ka inngaihtuah a. Ka rilruah Exodus bung 23 :20 Ngaiteh, kawnga veng zel tur che leh hmun ka buatsaihah chuan hruai lut tur che in, i hmaah ka vantirhkoh ka rawn tir dawn e, tih chu ka rilruah a rawn lang a. Kei mahni chakna ni lovin Lalpa chakna ringin a lawm kan do zel dawn tiin ka hla phuah lai chu ka phuah zo ta a ni,” tiin hemi hla a phuah chungchang hi E.Pakistana an awm laiin President Guard tu ‘V’ Battalion te hnenah a sawi. He a hla phuah thupui hi ‘Kan Zoramah Lal Christa Cross’ tih a ni.

Chang 1 naah chuan kan Zoram chhungah hian Isuan cross-a tuara a tlansa te tam tak sualna hnuaiah an tlu mek a, chu sualna do a, dikna tungding tura beitu ten huai leh chhel takin do zel rawh u aw tiin

Kan Zoramah Lal Christa Cross,
Sualna hnuaia lo tlu tawh hnu,
Tungding tura dotu zawng ten;
Huai leh chhel takin tawn zel ru.

tiin thiam takin a phuah a.

A chang 3 naah chuan Exodus bung 23:20 tlawhchhanin

Ngateh, kawnga veng zel tur leh

Ram buatsaiha hruai lut turin;

Ka vantirhkoh ka tir dawn e,

Thlamuantu Lal awa chuan a ti.

tin a phuah a. He hla hi MNF rammu te zingah chauh ni lovin
Mizoramah a lar hle a.

Tuipursen chung a thu neitu,

Babulon saltang hruai chhuaktu,

Aw Lal Jehu, nangmah ringin ;

Ka do zel dawn kan Zoram tan.

tin Tuipursen vaw chata Israel fate kal tlang tirtu, Israel fate Aigupta
sal atanga hruai chhuaktu Lalpa chakna rinchhanin, kan Zoram tan
ka do zel dawn a ni tin a hla tlang a kawm a. MNF rammu sawrkar
leh India sawrkarin inremna thuthlung an ziah fel 1986 atang khan
MNF Party ticket in MLA ah ala tling chho reng a, he lehkhahu
buatsaih lai hian Chief Minister term hnihna a hmang mek a. Aizawl
Chattlangah in a nei a, a inah awm lovin Chief Minister Bangalow-
ah an chhungkuain an cheng.

AW NANG KAN LAL KAN PATHIAN

Rokunga

1. Aw nang kan Lal kan Pathian,
 I hming ropui ber se;
 I hmaa kan lo kun hian,
 Kan dil ngaithla ang che,
 Kan awmdan tur ngaihtuah a,
 Mipui kan inkhawmin
 Finna ropui min pe la,
 Ro min relsak ang che.

 2. I finna leh theihna leh
 I hruaina loh rengin;
 Ropuina leh lalthutthleng,
 An ral leh thuai si thin;
 Nang crawh chu chatuanin,
 Hnam tin tan kulhpui nghet,
 Lalber te lalber chuanin,
 Ro min rel sak ang che.

 3. Chuvangin aw kan Pathian,
 Hei hi kan dil ber che;
 Kan ram kan hnam min hruata'n,
 Nang chauh kan thlang a che.
 Chhung lam leh pawn lam hmelma
 Indona thleng mahse,
 Hneh zel turin min pui la,
 Ro min rel sak ang che.
-

LO ENG THUAI SE

Sgt. Vanlalringa

1. Lalpa, i lalna rama din turin,
Zofa leng ten pheilar khawngin;
Kan ram sualna a lo reh nan,
Lalpa kan ngen, i khawngaih malsawmna.

Aw, lo eng thuai se zalenna ni,
Lungduh sam ang then hnu te nen;
Hlim ten Christa hming tak ho hun.
Lalpa kan ngen i khawngaih malsawmna.

2. Aw kan lungduh lenrual then tak ten,
Fam dairial chang tawh mah ula,
Kan nghilh lawng che khuarei mahse:
In thisen man Zoram a ral hma chuan.
 3. Kan lungduh kan lawmna ber te chuanin,
Seol thlan ngui ruai chu nghakin,
An thisen au thawm te chuanin
An hmabak chhunzawm zel turin min ti.
-

KAN ZORAMAH LAL CHRISTA CROSS

Zoramthanga

1. Kan Zoramah Lal Christa Cross,
 Sualna hnuaia lo tlu tawh hnu;
 Tungding tura dotu zawng ten;
 Huai leh chhel takin tawn zel ru.
 Kan Zoram thisen au thawm chuan,
 “Min hmangaihtu khawange” a ti.
 Chhantu baihvai aw kan Zoram;
 Ka lainatin ka hmangaih che.

 2. Zoram hi Christa tan tia,
 Lalpa hnena i hlan tawh kha;
 Lalpaa Pathian dang thlengtu,
 Lungngaihna te a la pung ang.
 Hmelma soal ral lian lo pungin,
 Chun leh zua laina thlemna nen;
 Phatsantu thawm thang vel mahse.
 Hnehna chu Lalpa ta a ni.

 3. Ngaiteh.! kawnga veng zel tur leh,
 Ram buasaiha hruailut turin;
 Ka vantirhkoh ka tir dawn e,
 Thlamuantu Lal aw chuan a ti.
 Tuipuisen chungu thu neitu,
 Babulon saltang hruai chhuaktu.
 Aw Lal Jehu nangmah ringin;
 Ka do zel dawn kan Zoram tan.
-

FAKIN AWM RAWH SE HALLELUIAH

Lt. Col. Lalkunga

1. Chatuan remruattu Pathian
 Chu fakin awm rawh se.
 Thuncihna sang hmangaihna kimin a lo kal,
 Hnam sipai te a rawn tlawh tak hi fak ru;
 Chhandamtu hlu chatuan nunna min pek hi fak ru.

 Fak hla chu a lo thang chhuak ta,
 Chhandamna kim min hmuh tir vangin,
 Fakin awm rawh se Halleluiah.
 2. Aw, kan Lalpa leh Pathian,
 I chhandaman kan hmuh hian;
 I fa nihna kan lo chang hi ropui kan ti,
 Kan fak ang che, i fa te hian chhandamtu.
 3. Thlalera kan awm larin,
 A mite min tlawh a;
 Thihna hlimkawra awm ten Enna kan hmu ta.
 Min hmangaihna hlu tak chu i fak ang u;
 Thih thlenga rinawma thawk turin,
 Min thlang chhuak ta.
-

LALPA I TANA THAWKTU TEN

Lt. Col. Lalkunga

1. Lalpa i tana thawktu te hian,
I duh angin awm lo mah ilangin;
I ngaihdamna famkim kan ngen e,
Min chelh reng fo ang che aw kan Lalpa.

Kan ram kan hnam tana e,
Thisen far zawng zawng au thawm hi,
A thlawnin luan tir suh langin;
Kan ngen che i thiltihtheihna Lalpa.

2. Khawvel sum leh pai hausakna leh
Mahni hmasialna ten min chim zelin;
Kan tum zalenna kan thlen hmain,
Min hnehsak ang che sualna hi Lalpa.
3. Kan Pi leh Pu te nun dan mawi kha,
Chawisang ila dan mawi leh duhawm chu,
Kan Zoram hi Christa tan tiin;
Nun dan mawi vuanin i kal zel ang.
4. Ram tan thawktu lenrual te u,
Hma lam pan turin Christa irawn ang;
Kan duh ber Chrisata lalna ram chu,
Thawk zel turin hma lam i pan ang u.

AW I HMING A DAI LOVANG

Capt. Chhawntluanga

1. Chung khuanu leng lo ruatsa reng hian maw,
Kallai relin hmatiang kan sawn;
Mahse kallai khamin thlang kawrvai lian,
Chhim thlipui iang an lo hrang e,
Lungrualpui nena dar ang kan lenna,
Famkhua an chan tir ta ka lungduh.

Aw i hming a dai lovang,
Thang leh thar chhuan tam leng mahse;
I ram chhana i tawrhna hian a man tawk e,
Chham ang i zalna piallei hmun leh;
Zan mu chhing lo doral karah,
Kan tuanna mual tuai ang tharin
Nghilh ni i awm lo vang.

2. Aw ka thian duh tak, i liam ta a maw..?
Nghilh bil lo la thlafam khuaa'n;
I fam pui Zofa nau ang nuhna tur,
Tunah piallei chang tawh mah la,
Kan nghilh lawng e, i chun leh zua hring nun,
Khuarei kumtluang hi sei mah sela.
 3. Hnem thiam thintu hmangaih Lalnunnem,
Kan lungduh kan lawmna ber ten;
Kallai rehn hnuthiang min chhawn ta e,
Thihna lui piah khawpui mawiah,
Angel var ten chawimawina lo hlan se,
Lo lawm ang che aw chatuan a tan.
-

AW TAWNMANG SI LO
(Capt. Dawngliana thi a phuahna)

Capt. Ngursasilova

1. Hmanah chuan suihlungual tea lengin,
 Thlang kawrvai doral kan tawnza thin a;
 Ram leh hnam lo dinchhuah hun tur thlirin,
 Duhthu leng tinkim kan sam dun thin a.

Aw, tawnmang si lo maw ka ngaithiam lo,
 Awmlai leng mah hmuh theih chang se kan ti;
 Kei ka lungduh thlafam chan tirtu hi;
 Ram leh hnam phatsantu maw lo ni.

2. Kei zawng ka dawn ngam lo lung ka phang e,
 Kumsul lam ang a lo her leh anga;
 Hlim ten tuanna tlang chhawlbuk run remna,
 Tawh chang ni a lo her chhuak leh dawn si.

3. Thlang kawrvai bel, thim lal rorelna chuan,
 Tihduhdahna an tawrh tir lai che a;
 I anka nem thinlaiah a cham reng,
 Aw Zofa zingah remna leng rawh se.
-

MANGTHA KA THIAN DUH TAK*Lt. Rohnung*

1. Aw kan Zoram nuam leh nunmawi hi,
Thamral mai atan phal lovin;
Famdai hmun khawhar leh hrehawmah,
Aw ka thian, i nun i hlan ta maw.

Aw ka thian duh, ka thian duh tak,
Mangtha, mangtha, mangtha, mangtha,
Kan ram tan i nun hlui hlan hi,
Thamral mai atan zawng ka phal lo,
Englai pawhin ka nghilh lawng che.

2. Lenrual zawng te hlima len lain,
I chan piallei thlan khawhar maw..?
I rauthla leng tal rawn tir leh la,
Mah ten tanglaiah pawm ka nuam c.
 3. I thiam, i fin, i huaisenna te,
Kan chawi zel dawn thang leh thar ten,
Nangmah ianga ram chhan ngam turin;
Kan bat, Zoram tan nun kan hai lo.
-

I AWI ANG AW ZALENG LUNGRUAL ZAWNG TEN

Rengliana

- 1 Awmlai leng si lo kei ka tuar zo dawn lo,
 A fam ta e, Zoram mihrang pasaltha chu;
 Darfeng val rual zaleng zawng zawng zingah hian,
 Sakhming mawi chul lo tur aw Zoram tluanah.

 I awi ang aw zaleng lungrual zawng ten,
 Kan ram riangvai par ang tivul leh turin;
 Darfeng tur val, lanu aw lungphang lo la.
 2. I fam tak ni khan Zawl khawpui tlang a ngui,
 Lalmang thlafam vangkhua ni pawh a sang bil lo;
 Luaithli nul bang thei lo zaleng zawng zawng ten,
 Zaivawr an rel thei lo aw bawhar zawng ten.
 3. Sakruangah nem ten puan an rawn hlan che,
 Hmanlai mihrang tawhlhlohpuan nen a chuang kim e;
 Tangka Rothangpui leh vulmawi tinreng nen,
 Chhingmit luaithli nul lo reng an awm nem maw.
 4. Ka tuar thiam lo aw sui lung phang lo tein,
 A kal ta e, mihrang, rualkhum, zaleng chhingtu;
 Rihsang mual liam mai turin ka phal lo che.
 Ding rih la Zoram nuama'n i siam ngei ang.
 5. Thisen vangin aw Lalpa mal min sawm la,
 Val rual, mihrang thisen luangin Zoram a bual,
 Kalvari tlang thisen luipua iang e;
 Varparh Arsi chung Pathian ka ngai vawng vawng.
-

HARHIN THO RU

Lalkunga ADC

1. Mim ang pianna kan Zoram tlang mawi hi,
 Hmana Pi Pu chena kan ram mawi hi kan ta;
 Kan din thar ta tlawmngai huaisen zarah,
 Harh in tho ru, Mizoram Mizo ta a ni.

 Rinawmna leh huaisenna kan ram tan,
 Dikna puanzar nen pen ru i kal zel ang;
 Zam su, hma lam pan ru, a eng zel ang,
 Harhin tho ru, Mizoram Lalpa tan bei ru.

 2. Zofa pheisen val zawng an mawi hluan e,
 Chengrang chawin ram chhan darfeng val an ngir e,
 Zam lai rel lo, hmatiang sawn zel turin,
 Kan tang zel dawn, Mizoram Mizo ta a ni.

 3. Min dal zo lawng, hrenthir, khaidiat mai chuan,
 Kan tang zel dawn e, Lalpa chakna ring zelin,
 Hnehna ni ropui chu min thlen ngei ang.
 Harh ru, tho ru, Mizoram Lalpa tan pein.
-

ZORAM LILY AN THLIAK TA E

Darthuama

1. Zoram kalsiam a her luai luai, a her sang zel,
Zofa mihrang chengrang chawiin pheilai an khawng ;
Zoram chhanin ka hrai nunnem mihrang val lairil a tho,
Zo zalen nan mangtha u le, biahtu min hlan.

Aw.! Sakruang buan ang ka pawm ka chul vel a,
Kan au, kan au, chinlai lenrual lungduh zawng ten;
Ka hrai dawntuai Zoram lily an thliak ta e,
Zofa nunrawng, thlafam chantu ka ngai thiam lo.
 2. Thlang kawrvai leh Zoram hnarkai mi ril zawng ten,
Remna biahtu Zoram tluanah an rel ta e;
Ka hrai nunnem chhungkaw remna lal no hlantu thlafam changin,
Remna thuthlung Zoram tluanah thleng se a ti.
 3. Zoram hnarkai mi ril zawng ten engtin ngai maw ?
Zoram tluanah remthu leng se, biahtu in tiam;
Ka hrai dawntuai par ang an thliak, zurui, hlemhle, nunrawng rualten,
Chinlai unau lenrual zawng ten kan ngai thiam lo.
 4. Hmusit, elrel, thudik tel lo, power rui ten,
Dikna hnawlin ka bung dawntuai dawt thu an hlan:
Lo ngai ve u, Zoram mihrang, piallei nghakin rihsang a kai,
Val rual thisen vang hian par chhuak la kan ram nuam.
-

KHAW KHAWM HLA

Suakliana

1. Kan huntawng zingah khawkhawm a pawl ber mai,
Zoram hmun tin khawtlang puang ang a chul zo ta;
Tlang tina mi khalh khawm nunau mipui te,
Chhunrawl a vang riakmaw iangin kan vai e.

Kan chatuanpa vangkhua ka ngai zualthin,
Lungduh lenrual an kimna khawpui thar nuam,
Min hmangaihtu Lalnnema tuallenna.

2. Ka dawn sei ngam lo kan ram lugngaihna hi,
Hnampui lungfing mingo valin hnuthang min chhawn,
Kan ram riangvai boral tur tungding turin;
Rairah chhantu chung Pathian ka ngai vawng vawng.
 3. Chhung kimtea aw lenrual lungduh te nen,
Zai kan vawma Van Lal run leh khawtlang a dai,
Thuva awmhar chun tawng loten an nghak e:
Zarva lenna ramdai aw an chang zo ta.
-

SIALSUK KHAW KANG HLA 1 NA

Laltanpuia

1. Vanhnuai mi hril Sial khaw Zopui khawiahnge maw i awm ?
 Ka rawn zawng che piallei hawktui,
 Thlafam vangkhua maw i chan le !
 Lungchimtea chung tin par ang vulna kan ram nuam,
 Hmelma doral darfeng rualin,
 Sen meipui hrang an lo ban e.
 Aw tuar a har min hnem zo reng an awm lo,
 Chung vankhaw iang kan tawnah Sial khawpui,
 Aw ! i mawi chuang e:
 Tunah par ang chul rih mah la,
 Din thar leh nang e, Khuanun min hual se,
 Ngaih zawng lungduh te an kimna.
 2. Chinlai khua tin deng zel aw, tuarah vanpui a chim,
 Ka hawi ngam lo kan hmun in leh
 Kan vangkhawpui ka fan ni hian;
 Turni kir vanlai khuangruahpui cham reng sumtualah;
 Awmlai hrang nen suihlung an rual za,
 Suar ang kan chim khawtlang hnawmah.
 3. Hmanah kan Pi Pu ten an chawi, vangkhawpui par a chuai,
 Kawrvai lian doral an chang ta;
 Thinlai kaw! ang a var thei lo,
 Tlang tinah pheisen lunglian nghosai ang an hrang e,
 Vangkhawpui leh lallai run mawitu,
 Chengrang tuilian ang an la e.
 4. Thal favang lenkaw! lo eng, tapin tlang tin ka chuan,
 Ka tan khuarel reng em lo ni?
 Ka tawng hmelmate diriamna.
 Dailung rawna siahthing par lo vul, lelthang zai vawr nen,
 Engtin nge lunglen ka lo tuar ang ?
 Aw ! Sial khawpui, i tel lo chuan.
-

SIALSUK KHAW KANG HLA 2 NA

Laltanpuia


1. Tinkim ka dawn changin lunglen za ten a tho leh thin,
 Kan vang khawpui dar ang lenna a chul zo ta;
 Ar ang vaih nan sumtual a zau thlawn e,
 Tap ruai ila tlangzapui leng relthang ka phur nang e.

 Awmkhua a har tlai nilen ka zuam nem maw,
 Nghilh ni i awm dawn lo khawthal romei chu chang mah la,
 Ti hian nghilh loh biahthu ka hlan che;
 Aw Sial khawpui, lungphang lo ten dam takin aw mangtha.
 2. Awmkhua a har nau ang ka tap thinlai a dam thei lo,
 Kumsul a vei kan nun khuarei a chang tur hi;
 Suhlung lenin zaiin ka chawi ang che;
 Aw Sial khawpui, nemrangpuana awih rual i awm si lo.
 3. Khua tin a fang tlang tin a zui awmhar te min hnemtu,
 Lo kir leh la kan vangkhawpui dairial a chang zo ta;
 Suilung rual ten tahzai i rel ang aw,
 Awiza ila awmhar lunglen dai ten a kiang mahna.
 4. Puni a tawng kan vangkhua hian lallai a sang tual tual,
 Kawrvai i hnawl ang aw, zalen nan kaw! a eng mahna;
 Rangka dartui ngeia'n i chuang ang aw:
 Hlimzai i wawr ang thlang sappui biahzai a thang ta e.
-

HARH LA HARH LA*Rokunga*

1. Harh la, harh la, Zoram i tlai ang e,
Harh la, harh la, hun tha a liam ang e;
Tho la, tho la kein lo ding ta che,
Ngaiteh, ri chu, zalenna dar a ri,
Tho rawh, hun tha a liam hma hian.

Hei hi kan tum ber lo ni tawh se,
Mahni ram puanzar hnuaia ding tur leh,
Rinawmna leh huainaa lo inthuum fo hi.
 2. Tunge lo kal, hriat loh chhingkhual a ni,
E heu, e heu, lem ang der thiam a ni;
Luh tir suh la, zawlaidi pawh a keng,
A dawi ang che hriatloh chhingkhual a ni,
Thirkhaidiat-in a hling ang che.
 3. Harh ru, harh ru, aw hnam huaisen te u,
Bei ru, bei ru, hma lam pan zel ula;
Zam su, hlau su, thinlung tihuai rawh u,
Ngai ru, ngai ru, chu tawtawrawt a ri,
Bei leh ngam ngei turin min au.
 4. Thlir ru, thlir ru, chung lam enchho ula;
Ngen ru, ngen ru, chung lam tanpuina pawh,
Bei zel rawh u, hneh ni a thleng ngei ang,
Hnehna, lawmna, rorelna thutthleng nen,
Kan hnam puanzar kan zar ve ang.
-



AW ZORAM I HMING THA KHA

K.Zoliana

1. Aw Zoram tho la, i kein ding rawh,
 I velin ralin an hual che;
 Enteh, an hnai zel, hmatiang an rawn sawn e,
 I ram, i hnam tan do ve rawh.

Aw Zoram, i hming tha kha,
Liam tir lo la, thlang kawrvai lo hnar la,
I ram chhan la, i hnam tan hmangai la;
Enteh, an sawm che lungualpui turin,
Lo hnar lul suh, i ram tan do ve rawh.

2. Aw Zoram tho la, lo inpeih tawh rawh,
 Ralthuam la la, tha zawng hlanin;
 I ram , i hnam, i neih, i nun zawng nen,
 An thleng ang che ro rawn hlanin.
3. Tho ru, tho thuai ru, doral tawn ru,
 I bei ang u, engpawh huamin;
 En teh, an hnai zual, kulhbing an rawn siam saw,
 I bei ang u, Zoram tho ru.

I DO ZEL ANG

Capt. Malsawma

1. Hun leh ni te an in her liam zel a,
 Thang leh thar sial ang an lo lian a;
 Kan finna sang zel hian, ram leh hnam hruaiin,
 Zalenna tlang kan au ve ta.

 Aw, Zofa tleitir leng zawng te,
 Kan sawm vela ram chhan turin,
 Dikna hmachhuanin, sual doral lian mahse;
 Suihlung rual ten i do zel ang.
 2. Hmanah Pi Pu zamual liam hnu zawng te,
 Doral tawnah an zam ngai bil lo;
 Keini pawh kan hnam kalsiam min khamtu zawng,
 Theihtawpin i do zel ang aw.
 3. Siamtu chung Pathianin a ruat tawh sa,
 Zofa te hnam din nghehna turin,
 A kut ata tuman min chhuh leh tawh lawng;
 Hnehna chu Lalpa ta a ni.
-

CHAWNGBAWLA BATTALION HLA

Tirhkoh Lalthuna

1. Sakhming chul lo, Zofa mihrang Chawngbawla,
Fam chang tawh hnu kan ngai em che;
I hmingchawiin hnam sipai te,
Kan inbuatsaih kan Zoram tan.

Mihrang Chawngbawla pawl ten,
Chung Pathian malsawmna a zarah;
I tan theihtawp kan chhhuah zel ang,
Lo lungphang suh aw kan Zoram.

2. Chawngbawla pawl hnam sipai val rual te hian,
Kan nunna kan hlan kan Zoram tan;
Hmuhsitna leh elrelna ten,
Min tizam lawng Zoram chhan nan.
3. Aw Zofa leng chenna, aw kan Zoram nuam,
Kan hmangaih em a che, Zofa ten;
Nangmah chhan nan hmelma doral,
Kan hneh zel ang Christa zarah.
4. Zalenna atana thawktu zawng te u,
Huai leh chhel takin i kal zel ang,
Lalpan min siam kan Zoram hi;
Kan chang ngei dawn Zofa leng ten.

KHUANGCHERA BATTALION HLA*Lt. Col. Lalkunga*

1. Khuangchera mi huaisen,
 Keini a zuitu te hnam sipai,
 Kan duai bil love val rual hi;
 I tungding zel ang huaisenna.

 A lo par ngei ang huaisenna,
 Keini 'K' Battalion neitu ten;
 Hlimin i au ang u val rual hian,
 Zaiin i chawi ang u zaleng ten.
 2. Khuangchera mi tlawmngai,
 Chawisan zel kan tum zalenna hlu,
 Thian chhan thih ngam zir te keini;
 Kan ram, hnam tan a hlu ngei ang.
 3. Khuangchera ding zel se,
 Keini a neitu te hian kan zui;
 Tlawmngaihna, huaisenna sang ber,
 Maltin sawmtu min hruai zel rawh.
-

LALVUNGA BATTALION HLA

Vanlalaauva

1. Leng zawng te lunglai muantu ber,
 I awmna hmun vangkhuaing;
 Muantu dang a ngai bil lo,
 Kan au che lo kir leh mai rawh.
 I sakhming chawi val rual kan ngir e.

 Lalvunga hmingchawi hnam sipai,
 An va mawi em ram tana ding te hi,
 I hniak hnung kanrawn zui zel e;
 Rinawmna huaissenatlawmngaihna,
 Ram mipui te kan entir zel dawn.
 2. Hmanah Pi Pu chenah Lalvunga,
 Selin a awm lo i hming,
 Thang leh thar tan a dang chuang lo;
 I sakhming chawitu MNA
 An duai bil lawng e doral hmaa'n.
 3. A sakhming kan chawi dungthulin,
 Than kan tum ram leh hnam tan;
 Hringmi ten chawimawina an hlan,
 Ram leh hnam damna ti zelin,
 Kan pen zel dawn kawla en hma chuan.
-

MIZO NATIONAL DAY

Lalringa

1. Mizo National day kan lawm e, Zofa ten,
Hlim leh lawm takin i zai ang u;
Thinlung lungngaih, lusunna hlip kiangin;
Hlim takin i hmang ang u.

 2. Aw Zofa leng rual zaithiam te u,
Kan hnam inpumkhat lungrualna niah hian,
Hlim taka lawmin zai i vawr ang,
Hlim takin i hmang ang u.

 3. Ram leh nam tana thawktute u,
Chhel leh huai takin hma lam tawn zel ru,
Thangthar ten in hnung kan rawnzui zel ang,
Kumtluang hrui ang sei mahse.

 4. Ram leh hnam tana thawktu zawng ten,
In hmangaihna hrui i vuan tlat ang;
Kan motto atan kan ti Be Honest,
Be honest Zoram tan.
-

SAIZAHAWLA BATTALION HLA

Lt. Khuanghlira

1. Zofa mihrang sakhming chul lo,
Chak hmingthang tak, hnam tin chhingu;
Nghilh ni awm lo, Saizahawla,
Zofa te thinlai hnemtu ber.

Saizahawla Battalion,
Mizo National Army,
Kan ram kan hnam damna turin;
Mizo National Army kan ni.

2. Aw, Saizahawla Battalion,
Mizo National Army kan ni;
Hmelma doral lian karah pawh,
Hma lam panin kan pen zel ang.
 3. Hnam sipai huaisen tlawmngaihna,
Pi Pu te ro hlu ber mai chu,
Hrehawm tinreng karah pawh hian
Neitu kan ni, a mawi mang e.
 4. Mizo hnam zalenna duhawm,
Hnam puanzar hnuaia rorelna,
A duhawmin a mawi ber e.
Kan ro hlu ber, kan hnam damna.
-

TAITESENA BATTALION HLA

C.Lalthangvunga

1. Taitesena pawl hnam sipai suihlung rualin,
 Kan bei zel dawn, zallenna famkim atan.
 Kan hma lam khua dur thin mahsela;
 Kan zam ngai lo, aw Zoram kan hmangaih che.

 Taitesena hnungzui mihrang val lungual ten,
 Zam rel lova hma lam pan zelin;
 Zalenna famkim tluang lam chu zawh chungin,
 Hma kan sawn zel kan hmabak hlen turin.

 2. Kan phat lawng che, aw Zoram kan phat lawng che,
 I tan thih thlenga rinawm kan intiam,
 Engpawh huamin i tan kan do ang,
 Hrehawm mahse kan chhan ang che aw Zoram.

 3. Aw Zoram, i chhunga thisen luang zawng zawng hi,
 A tam lua e, tunge rul zo thei ang le;
 Zalenna famkim chauh lo hi chuan,
 A rul zo lo, a sang lua e kan Zoram tan

 4. Kan hmangaih che, aw Zoram, kan hmangaih che,
 I fate thisen hlu luang zawng zawng te leh,
 An nunna hlu mual liam zawng te nen,
 Chibai bukin i hmaah kan lo kun e.
-

VANAPA PAWL KAN NIE

Capt. Lalthafela

1. Vanapa pawl kan ni e,
Kan zam ngai lo vai tawnah;
Kan thlang kawrvai Indian ho
An zam leh ta kan tawnah.

Lo thlaphang suh kan Zoram,
Nangmah chhan tur kan lokal,
Mipui zawng zawng nunau nen,
Tumah thlei bik kan nei lo.

2. Vanapa mihrang val rual,
Kan duai ngai lo vai tawnah,
Punjab, Bihar, Nepali,
An duai leh ta kan tawnah.

3. Bren gun, Carbine, Brieta nen,
Rifle, Sten gun, S.L. nen
Gun machine, Two inches mortar,
Vai ho dan rual kan ni lo.

4. Rum vung vung a thlawk leh ta,
Vanapa Rocket Launcher,
Position lak reng a ngai lo,
Vala'n Spadow in a hnawl.

ZAMPUIMANGA BATTALION HLA*Capt. D.Thangliana*

1. Zaiin kan hril dawn zaleng zawng zingah,
Thlafam chang hnu mihrang Zampuimanga,
Ram leh hnam chhan val rual sakhming hluana'n
Kan chawi 'Z' Battalion kan ram tan.

Zampuimanga Battalion hnam sipai,
A mawi chuang, i sakhming kan Zoram tan,
Zofa leng zawng thinlai muantu a ni,
Par ang vul zel ang che kan Zoram tan.

2. Thang leh thar chhuan tuai ang lo lian zel ten,
Kan thiam, kan finna leh chakna zawng,
Kan hlana ram tan engpawh huamzelin,
Kan do zel dawn kan Zoram tan.

3. Aw Zoram, i rochan ropui leh hlu,
I tana nun hlan ngam i hraileng chawi,
An dam lai hring nun hlim tea hmanga'n,
Khuanu lengin hualhim zel rawh se.
-

VANAPA BATTALION HLA

Capt. Ngursailova.

1. Hmasang Zofa khuavela thang tawh hnu,
Chhaktiang doral a lo lenin;
Kan pi kan pu mihrang val rual,
Doral tawnah an zam ngai lo.

Khuatin val rual a sakhming chawitu te,
Theih chang se a ngur khua muantu;
Sawi lai hming dai lo Vanapa'n;
Han tel ve a chak hian ka ring mang e.
 2. Tunah thang leh thar Zofa leng tawnah,
Thlang kawrvai an lo lian.
Ram chhantu mihrang val rual ten,
Mihrang sakhming chawiin kan do.
 3. Kan sawm vel e, rualduh zaleng zawng te,
Kan ram rial ang ral tur chhan nan,
In finna leh thiamna zawng te,
Ram leh hnam tan rawn hlan ve ru.
 4. Chhak, thlang, chhim leh hmara Zofa leng zawng zawng,
Rorelna hmun khata dingin;
Hnehna puan kan zar hma chuani'n,
Kan tawn zel ang, sual thim ral lian.
-

AW ZORAM I FINNA LEH


Laltanpuia

1. Aw Zoram i finna leh thiamna,
 Thuruk chu puang chhuak la,
 I vela hnam ze-hrang kara;
 I chi i kuang te hruai chhuak la,
 Kan ram mawi tak hi Zoram tana puang turin,
 Rorelna khawl hmaa zam lo,
 Nang kan vote ang che.

 Aw Zoram, aw kan Zoram,
 Aw Zoram ka ngaihlu che,
 I chhunga hnam ze tinreng te,
 Lungruala kan insuih khawmin;
 Finna thlipui hriat lohna,
 Thim hi chhem kiang la,
 Lungrualna hi ram leh hnam tan,
 Himna kulhpui ber a lo ni e.

 2. Ram leh hnam a dinchhuah nan thiamna,
 Famkim neih kan tum chuan;
 Aw tuna kan ram dinhmun hi,
 Dawn ve la lunga awi nem maw !
 Ram leilung leh mipui zawng zawng hi tang kan ni,
 MN ka sawi thei lo Zoram hi kan ram a ni.

 3. Aw Zoram i sang zela kea
 Dinchhuah ve kan tum ta;
 Tuna i ropuina let sang sawmthumin
 An rawn thlem ang che:
 Kan pi pu ro kan ram mawi tak hi chawisang la,
 I hnehna puanzar leh
 I lu lo thinsan mai rawh.
-



KAN RAM HI KAN RAM A NI

Laltanpuia (Lalzuithanga ziah dan)

1. Aw Zoram, i finna leh thiam,
 I thuruk chu puang chhuak la;
 I vela hnam ze hrang kara,
 I chi i kuang te hruai chhuak la:
 Kan ram nuam hi Mizo hnam tana puang turin,
 Rorelna khawl hmaa zam lo
 Nang kan vote ang che.

 Aw Zoram, aw kan Zoram,
 Aw Zoram ka ngaihlu che.
 I chhunga hnam ze tinreng te,
 Lungruala kan insuihkhawmin;
 Finna thlipui, hriat lohna,
 Thim hi chhem kiang la,
 Lungrualna hi ram leh hnam tan,
 Himna kulhpui ber a lo ni e.
 2. Aw Zoram i sang zela kea
 Dinchhuah ve kan tum ta;
 Tuna i ropuina let sang sawmthumin,
 An rawn thlem ang che.
 Kan pi pu ro kan ram mawi tak hi chawi sang la,
 I hnehna puanzar leh i lu lo thinsan mai rawh.
 3. Hnam leh ram a hmingthana thiamna
 Famkim neih kan tum chuan,
 Aw ! Tuna kan ram dinhmun hi,
 Dawn ve la lunga awi nem maw;
 Ram leilung leh mipui zawng zawng hi tang kan ni,
 MN ka sawi thei lo:
 Kan ram hi kan ram a ni.
-

HMANA PI PU CHENA*Laisiamu*

1. Hmana pi pu chena ka ram ka hmangaih chu,
Rei tak thimna hnuaia lo tlu tawh hnu;
Tunah nangmah chhanin kan lo ding dawn,
Zam rel lovin hma lam kan pan zel ang.

Assamese cho-el loh Zofa lengin,
Lak chhuah kan tum che, India vai hnuaia ata,
Aw, Zofa zawng lo tho ru,
Kan hma lam pan turin,
Zalenna ni kaw! a lo eng tan ta.

2. En teh kan pen dawn ta, kan ram chhanchhuak turin,
Thlemna tangka Rothangpui leng ai in,
Khaidiat hruaia Tan In kawng zawh huamin,
Aw nang Zoram chhan che hi kan thlang ta.
 3. Volunteer lungualin pheilai kan khawng tan ta,
Kan ram puanzar hnuaiah chengrang rawl nen;
Kan dinchhuah hun thlira rinawm takin,
Aw, nang Zoram chhan che hi kan thlang ta.
-

AW ZUI VE TEH

Capt. Chhawntluanga

1. Aw zui ve teh thangthar lungfing,
 Kir zai reng rel lova hma lam pantu te,
 Hmanah mi ten duhin thlang lo mahse;
 Tunah ka thlang ta Mizoram mizo ta.

 Kan sawm vel e, rualduh leng zawng,
 Hmatiang sawna kan ram par ang tivul turin,
 Nakinah tiin khua a tlai dawn;
 Aw Zofa leng rualduh zawng te,
 Zuanguin lo tho ula, zalenna sual turin,
 Aw pheilai i khaiza ang.
 2. Sum tam sengah kan sawm lo che,
 Lu chhum ban chhum tuarah kan sawm bil lo che;
 Kan sawm che ram i hmangaih chhan turin,
 Aw lokal rawh tunah lung i rualza ang.
 3. Kan ram kan hnam chhanchhuak turin,
 Do kan tum bil lo pheisen darfeng ral lian,
 A tul zawk e, dikna thuthlung vawn leh
 Thih thlenga rinawm taka awm tlat fo hi.
 4. Engkim peih a ni ta tunah,
 Kan pen dawn e, kawng dalin lo awm lul suh;
 Ram tan zalenna suala beitu te;
 Mal-tin, mal-za Khuenu lengin rawn sawm teh.
-

AW MIZO FATE ZAWNG ZAWNG HIAN

Laisiamu

1. Aw Mizo fate zawng zawng hian,
Hriatna thinlung nei nawn se.
Kan thlang che Independent
Tiin i au ang u.

Chung Pathian malsawmna a zarah,
Kan chang ngei ang Independent,
Zamualpui a liam hma hian;
Au ru, Zofa te u.

2. Kan thlang che aw i mawi chuang e,
Virthli lenna Zoram nuam;
Thlang kawrvai anka hnuaia
Awm atan ka phal lo che.
 3. Muhil te u tho thuai rawh u,
En teh u, saw in ram saw.!
Tihduhdahna phur chungin;
Tan la, hun liam hma hian.
 4. Sulhnu kan pi kan pu te chuan,
Tawlhlohpuan chu an sin a,
Kei ni paw'n hnam huaissen nan,
Kan hnam puan i zar ang u.
-

PIALLEI HMUN REM KAN BEL

Dozinga

1. Aw kan Zoram nuam, suihlung phang lo la,
Thlang kawrvai bawih atan ka phal lo che;
Chung Pathian ruatsa i zalenna tur;
Theihtawpin kan bei zel ang.

Tlailain lenkawl khua a lo thim hian,
Riakmaw sirva leng iangin,
Riahna run kan vai tukloh ramdaiah,
Piallei hmun rem kan bel e.
 2. Kan ngai bil lawng e, vangkhawlai tual nuam,
Ram leh hnam hmangaih mihrang val rual hian;
Thinlai muangtea kan len ve nan e:
Ka thlang thin chhawlbuk run nuam
 3. Tukloh ramhnuai siahthing zar hnuai hmun rem,
Kei ka tan lunglai min hnemtu a ni;
Silhpuan zial phelha laikhuma belin,
Dam ten zanmu kan chhing thin.
 4. Lenna tlang a dang doral lian vangin,
Doral lian tui ang an la nem ngei ang,
Chung Pathian zarah hnehna ni nghakin,
Dam takin aw mangtha le.
-

LAIKHUM ZAU

Dozinga

1. Laikhum zau zaiin ka chawi dawn e,
Zalengin min sel lo ula,
Laikhum a zau,
Kan tan laikhum a zau ngei e.

Piallei hmun rem rem lo pawh,
Chhawlbuk zar hnuai hnuai lo pawh,
Tlaitla khawthim kan nanna piang,
Khawilai hmun pawh kan zalna piang,
Kan tan laikhum a chang zel e.
Laikhum a zau,
Kan tan laikhum a zau ngei e.

2. Chung Khuanun min veng zel dam ten,
Zanmu kan chhing, hai ang kan thang,
Laikhum a zau,
Kan tan laikhum a zau ngei e.
 3. Chham ang zalna piallei hmun tinah,
Thari laikhum thingtin zar hnuai,
Laikhum a zau;
Kan tan laikhum a zau ngei e.
 4. Ram hmangaih zaleng val rual kan tan,
Thari laikhum thingtin zar hnuai;
Laikhuma a zau,
Kan tan laikhum a zau ngei e.
 5. Zalenna kaw! lo eng tur nghakin,
Riah hmun kan rem piallei hmun tin;
Laikhuma zau,
Kan tan laikhum a zau ngei e.
-

ZORAM PAR ANG TIVUL TURIN

Capt. Chhawntluanga

1. Hmanah hnam lungmawl tual kan lenna,
Tunah hai ang thang vein;
Lunglai tharin luah lai kan rem,
Lungrual ten kan chawi lian ang Zoram.

Pheichheh mawi vala ten,
Kan chawnban kan vawr siau e;
Laitual lenmawi ten sakruang
Dam nan Nurse train in,
Civilised Zoram par ang tivul turin.
 2. Zoram chhan nan pawl a awm nem maw,
Zuanguin lo tho la Vala,
Tha leh zungzam pawh ui lovin;
Pung leh nang e, siktui laitha zawng.
 3. Chun leh zua te u min sel lo u,
Kan silhpuan hniar awrh lai thi;
Bahsam sei nghiau val hi,
I mawi min ti tleitir lenmawi ten.
 4. Aw Zoram i chhungah kan leng e,
Awih lai nau ang min chawi lian la;
Doral hnehin vul reng tawh la,
Kan nghilh lawng che, Zoram dam reng rawh.
-

ENGTIKAH DAR ANG TAWNG I MAW*F.Rokima*

1. Awmhar lunglen ni hian ka dawn vel thin a,
 Hmanlai ngaiin run ram rehah hian;
 Chhawl ang ka uai a ni, tlangrel dawn lo hian,
 Kan fam tak leh aw Zoram nang ngaih vang.

 Kawrvai lo lian lungmawl vang a,
 Rualduh te zawng sam ang thenin;
 Engtikah dar ang tawng i maw!
 Ka nghakhlel em mai kei zawng thinlaiah.
 2. Vangkhua leh lungduh te tawn ni awm ang maw,
 Tu dang ngai lo renga kan len nan;
 Ngaihlai a zual leh thin, chhingkhuala chanin,
 Tawnmang chang thuai se, aw Zoram nang ngaih.
 3. A dam kan hauh anga Khuanu leng zarah,
 Tawn leh ni zawng a her na ngai e;
 Ka nghakhlel em kei zawng rualduh te nena,
 Tawn leh ni tur aw kan Zoram ngeiah.
-

MIZORAM LUNGPHANG SUH

Lalnghenga

1. Kan ram zalenna kalkhamin,
Thlang kawrvaiin chakna hmangin min bei,
An thlentir hrehawm tuarna tinreng;
Zaleng naufa rairah min chan tir e,
Mahse ramchhan mihrang kan ngir,
Mizoram lungphang suh.

Mizoram, mizoram ka hmangaih che,
Tunah hnehchhiah phatsan ni rih mah la,
Thang leh thar ten Lalpa chakna hmangin,
Hmelma doral kan tawn zel ang.
 2. Hrehawm tinreng tuar mah ila,
Ka hlau lovang kan ram leh hnam tan hian,
Deusawntu ten min cheksawlh mahse,
Phur zel nang e, hming sawi chhiatna te zawng,
Kan dinchhuah hma chuan kan ram tan,
Mawina kan chang chuang lo.
 3. Babulon saltang chhuah hma chuan,
Hlim zaivawrin rimawi kan rem thei lo,
Lalpa kan rum ri ngaithla ang che,
I van rorel kan ramah puang ang che,
Kan hnam dikna tungding turin,
Dikna Lalpa kan ngen.
-

PIALLEI HRINGNÜN A NUAM CHUANG LO

Capt. Ngursailova

1. Zankhua lo tlaiin rualduh zaleng zawng,
Vangkhawpui t ualah siang an lawi a,
Kei erawh tukloh ram lentu chhawl hnuaiah,
Rairah riang run chhawlbuk ka bel.

Aw kan vangkhawpui,
Tual nuam chu ngai mah ila,
Sual thim lalnunrawng te nena tuallen chu,
Piallei hringnun a nuam chuang lo.

2. Kei ka chun riangin biahthu min rawn hlan e,
I rualduh ten hraileng chawiin,
Tangka cheng Rothangpui nen run an rem a,
Ram zunah khua i tlai min ti.
3. Tawnmang lamah rualduh thlafam chang hnu,
Tawh changin thinlai kaw! ang a hnim,
Zofa te doral chhum anga zing hi,
Tui ang hian a la nem ngei ang.
4. Aw Lalpa, kan diln a hi mal min sawm la,
Zofa te doral tui ang nem se,
Mihrang thisen luangin sual tlengfai tawh se;
Hlim tea tual kan len ve na.

I LUANG RAL TUR

L.Ramhluna

1. Awmlai leng mah ka ngaithiam lo,
 Pheisen darfeng doral an lo lian a;
 Kei ka lungduh ka lawmna ber,
 Zoram chhantu famkhua an lawi tir e.

 I chun leh unau rual zawng ten,
 I sakruang nem ten kan chul nem maw,
 Hmartlang ramdai piallei karah;
 Rial tui ang i luang ral tur kan phal lo.
 2. I chun leh unau rual zawng ten,
 Tinkim dawnin awmkhua kan rel thiam lo,
 I sulhnu leh i hlimtla leng thlir changin;
 Luaithlipui kan nul leh thin.
 3. Zoram tan i tuarna leh
 I sakhming mawi nghilh ni a awm dawn lo,
 Mihrang val thisen luan vang hian;
 Zo zalenna kaw! aw lo eng thuai rawh.
 4. Mal tin sawmtu chung khuanu leng,
 Kan rawn hlan che mihrang rauthla leng hi
 Zoram chhana a tuarna hi mal min sawm in;
 Zalenna min thlen rawh.
-

SUANGLUNGPUIAH NGHILH LOH BIAHTHU*Capt. Malsawma*

1. Aw Zoram mawi chul lo hian par ang vul zel ang che,
Nang ianga ram thiang leh mawi reng an awm lo,
Hnamtin zaleng naufa ten i par kan tlan;
Chutin kan tan Mother land i lo ni.

Aw, Zofa leng rualduh te u, kan hunawl,
Hmang thaa ram tan thawk zelin;
Khua a var dawn ta lenkaw! a lo eng e,
Hlim leh lawmin zaitin reng i vawr ang u.

2. Tunah thim hnuaiah lengin i hmel chul rih mahse,
Lungphang lo la hnam fa te i tan kan ding;
Ram leh hnam, thian chhan nan engpawh huam zelin,
Kan tawn zel ang Freedom Fighter kan ni.
 3. Rammu val rual ten khuavel zawng kan deng kim ngei e,
Lengdang hneha rual zawng khumin hma kan sawn;
Kan tuanna mual tin Zoram tan ti zelin,
Suanglungpuiah nghilh loh biahthu kan hlan.
-

TLANG BAWM ROMEI

Capt. Malsawma

1. Aw ka ngai em che kan Zoram nuam,
 Suihlung ruala dar ang kan lenna;
 Sakhming chul lo tur, zaiin kan chawi nang che,
 Vul reng rawh enchimloh ram nuamah.

 Tlangtin bawm romei a zam karah,
 Riang hlei ten run kan rem, chhawlbuk hnuaiah,
 Tawnmang mawl em ni, duh leng kan sam,
 Chantawkhuanu ruat reng maw lo ni.
 2. Ka ngai mang e, vangkhua kan lenna,
 Khua romei an chang zo ta si a,
 Chun leh zua suihlung reng a dam thei lo,
 Kan thlang anpai rawn vang maw lo ni.
 3. Thlir velin tlangtin suihlung lenna,
 Lungduh lenrual nen kan hlim ni te;
 Chhingmit rauthlaa cham ka tang laiah,
 Nghilh thei hian kei zawng ka mawi si lo.
 4. Lalpa, kan dilna ngaithla ang che,
 Zofa te doral tui ang nem se,
 Chutin zalenna kaw! a eng tawh ang,
 Hmangaih par tlanin kan leng ve ang.
-

ZORAM TANA THAWKTU TE*Capt. Malsawma*

1. Zoram nuam ka lenna,
Nghilh thei hian ka mawi si lo;
Kumsul khuarei chang mahse,
Hlim leh lawma kan nuihna,
Uai lo ten vul reng la.
I tana thawktu te,
Kan tuanna tlang dang rih mahse.

Aw Zoram ngaia suihlung len,
Mual zapui kar dana leng tan zawng;
Suih-suih suih lunglen hi,
Nem ten kan tuar lawng e.

2. A cham reng Zoram zun,
Nghilh lohna biahthu min hlan,
A sakhmel leh a hlimthla,
Lan thei reng an awm lo,
Enteh, raltiang ram saw,
Min chhingzo reng an awm lo,
Chhak leh thlang chhim leh hmar,
Entu ram lo ni ang che.
-

RAM TANA MARTYR TE

V.L.Chuana

1. Zaiin ka chawi dawn e, kan ram lungngaihna hi,
 Thinlai ruk ka dawn changin,
 Hmanah suihlung ruala kan lenna ram ngei kha,
 Doral lianin thenna ram a chan ta.

 Aw ka ngai then lohna ram khi,
 Hrehawm tuara Martyr ta ten,
 Leiram hrehawm pela zai an vawrna,
 Chatuan ram ka lal lenna ram nuam khi.
 2. Aw kan lenrual lungduh then tak zawng zawng te chuan,
 Ram tan an nun an hlan ni chuan,
 “Kei nin kan vawiin ni chu an naktuk atan
 kan hlan ta” tiin biahthu min chhiah ta.
 3. Aw kan hlim lai ni leh hun te zawng zawng chuanin,
 Koh kir rual lohin mual an liam ta,
 Ngaiin au mah ila kir zai anrel si lo,
 Engtikah kan ram lungngaih bang ang maw.
-

PIALLEI THIM RUN A NGHAK*Capt. Ngursailova*

1. Ka dawn vel hian kei ka lung reng a awi thei lo,
Ka bung dawntuai vul lai an thliak mai hi,
Ka riang lua e, thinlaia'n min run e,
A sawi a hril ka thiam lo,
Hnam len ruai ruai rel a awl mang e.

A na lua e, leng zawng chhing leh
Riang hlei hluana ka nau bawihte,
Chhaktiang ramdai piallei thim run,
Mah riak in maw an nghah tir che.

2. Fur khaw thiag leh thal romei zing riag kara'n,
Ka thli bang thei lo ka tuai run remna,
Lentu, Ngirtling, Lelthang leh huiva ten,
Zaiin an awi ka tuai an hnem;
Chhaktiang ram lentu zing riag hnuai'a'n.
 3. A sakhmel mawi nghilh ni awm maw a hlimthla nen ?
Lung ka phangzo kumpui leng her chenin,
Nghilh hnu leng dar ang min tawn tir lehin,
Hlim lai ni hnuthiang chhawn hnu te,
An lo her chhuak leh si kei ka tuara'n.
-

ZORAM KA HMANGAIH CHE

Capt. Ngursailova

1. Aw Zoram ka thinlungin ka hmangaih che,
 Tunhma chuan i chhunga cheng zaleng zingah,
 Pi pu nunmawi par ang a vul thin kha,
 Tunah soal doralin a chim pil mek.

 Aw lo tho ru, rualduh zaleng zawng te u,
 Kan ram riangvai a chan leh ai chuan,
 Rinawmin theihtawpin i bei zel ang.
 2. Aw Zoram dinhmun tur hi han dawn ve teh,
 Thangthar lanu tuai ang lo lian zel te chuan,
 Vai nun zir zonunmawi sirah hnawlin,
 Tunah soal doralin a chimpil mek.
 3. Aw Zofa, leng dang khuavel hi thlir ve teh,
 Chanchin tha hre reng ngai lo thim hnuaia leng leh,
 Silhpuan chawi lo lungmawl zaleng zawng te,
 Tunah soal doralin a chim pil mek.
-

RAM TANA THI TE TAN

Lalkunga ADC

1. In tawh leh nan vangkhaw daiah thu tin kan tiam,
 Chung Pathian ven zela Zoram hi chhan turin;
 Zalam thuamah 'Dam takin aw' chawnban kan vuan,
 Min liamsan ta rinawm taka Zoram chhanin.

 Kan nghilh lawng e in tuarna zawng,
 In sulhnu leh in thil tih te nen;
 A thlawn lovang in thawhrimna zawng,
 Kan rawn chhui zel, in lenrual zawng ten.
 2. Pheisen darfeng chhuahtlang mawia ngir zawng zingah,
 Zawtin ka zawng ka tawng si lo, thinlai a vai:
 Biahthu min hlan thinlai thawngin, tuar a har ngei,
 Min liamsan ta, rinawm taka Zoram chhanin.
 3. In sakhming lam zelin ram leh hnam tan kan bei,
 Kan zam lawng e, in sul chhuiin in rualduh te,
 In thawhrim zarah thang leh thar tu leh fa te,
 An la leng ngei dawn e, zalenna par tlanin.
 4. In rinawmna leh huaisenna chu kan hmachhuan,
 Piallei thuahriat karah chham ang lo zal mah la;
 Kan nghilh lawng in sakhming khuarei kumtluang chenin,
 Khuarei Zofa khuavel hril a tling ngei dawn e.
-

AW ZORAM KA PIANNA RAM MAWI*Hriatloh*

1. Aw Zoram ka pianna ram mawi,
 Rualduh leng zawng kimna chu;
 Lalpan mal min sawm ang a,
 Zoram puan ang chul hnu tivul turin.

 I chawisang ang kan Zoram hi,
 Kan hnam kalkham hmelma doral hi,
 Thlang lenkaw! an her liam hnu chuan,
 Hnehna hla mawi kan sa rual tawh ang.
 2. Zankhua lo tlaiin chhawlbuk run chhung,
 Kan bel thin lungphang lo ten;
 Engtikah sappui nun ngai lova,
 Kan len ve ang Zoram nuamah.
 3. Khuanu leng malsawmna a zarah,
 Kan thiam kan fin ram tan hmang zelin,
 Kan dinchhuah hun thlir reng zelin;
 Zalenna kaw! a lo eng tan ta.
-

MIZORAM TAN*Zairemthanga Supply Inspector*

1. Pathian leh leilung danin min pek sa,
Tunah hnehchhiahtu hnuaiah kun mahse;
Kan thiam kan finna zawng te hmangin,
Aw Zoram nang chhan turin kan pen ta.

Aw nang Zoram lungphang lo la,
Nang hmangaihtu lunglaiah nghilh ni reng i awm lo,
Lenrual lungduh pawm lai di zawng te kalsanin,
Bawih nihna hnuai ata chhan che kan thlang ta,
Zalenna ni zawng a la eng ngei ang.

2. Aw nang chhan turin Zofa leng zawng te,
Pheisen darfeng pheilai khawngzain,
Fam dairial chan thlenga rinawmin,
Kan lo ding ta, nangmah chhanchhuak turin.
 3. Ram chhan thih ngam val lungruual zawng zingah,
Thang leh thar ten an vanglai ni zawng te;
Hlantu te thawhrimna zawng hianin,
Zalenna famkim chu a la luan tir ang.
 4. Tunah nekchep tihduhdahna rapthlak,
Karah nang hmangaihtu leng mah ila,
Dikna huaissenah leh rinawmin;
A khai kang ang hnehna puanzar ropui.
-

LENRUAL LUNGDUH THEN ZAWNG

Khuanghlira

1. Hmanah suihlung ruala leng dun thin kha,
Thlang kawrvai lo len vang in maw ?
Lenrual lungduh sam ang min then tir e,
Thinlai a na lung reng a awi thei lo.

Aw kan Zoram mawi leh duhawm tak,
Ram thianghlam ni tur hianin ;
Lo dingchhuak tawh la, kan lawm hle ang,
I chakna zawng zawng rawn hmang tawh ang che.

2. Aw thlang kawrvai lungmawl nunrawng te chuan,
Ka lenrual lungduh fam an chan tir e;
Ka ngaithiam lo hmelma doral lian hi,
Thinlai a na lungduh min then tir hi.
 3. Aw ka lenrual min tihlim thintu te,
Piallei nghakin chham ang an zal ta e,
Fam khawpui rauthla run hmun atangin
An rawn thlir thin, kan ram riangvai tak hi.
-

KA HMANGAIH ZORAM

Aichhinga

1. Aw ka pianna Zoram,
I sakhming reng a mawi hluan.e,
Nungcha zawng leh hringmi,
Ten kan awi ning lo che.
Par mawi tin vulna ram nuam,
Zo lentupui chawi vel ram hi,
Zotui thianga leh thlifim lenna,
Ka hmangaih che Zoram.
 2. Lairila dawn changin,
Ka ngaithiam lo aw kan Zoram,
Lunglai muanna a bo;
Hlimna a chuai zo ta,
Retheih leh tamin a khat,
Lungngaih mangan chhumpui a zing
Tah leh mittuiin a chim vel,
Ka hmangaih Zoram hi.
 3. Tawnmang mawl lah ni si lo,
Zonun parmawi a chuai zo ta;
Dikna laltiang hnawlin;
Sualna chumpui a zing,
Bawhlhlawnain a tuam vel:
Khawlohnain a khat zo ta.
Ram zawng laiah van i duai lua,
Ka hmangaih che Zoram.
 4. Ka dawn thinlaiah,
Rairah kan tahna Zoram hi,
Dikna silhpuan sinin,
Remna parthi batin;
Hmangaihnnaa insuih tawnin,
Rual zawng khuma hmatiang sawnin.
Kan hnam puanzar kan zar hun tur chu,
Hmangaih Zoram ngeiah.
-

KEI KA PERHKHUANG*Sgt. CBT*

1. Zaiin ka chawi dawn e, kei ka perhkhuang hi,
Khartung sawn lo, kharkhip kara ngun kual lung run;
Puan ang bang thei lo, kawrvai darfeng rualin,
Awmhar min hnema'n, bel leh nang e ni chhuak.

Dawn ve maw lungduh ten,
Kharkhip kara leng te;
Puan ang ban ka nuam e,
Kei ka ngun ve te hi,
Tichuan hlim ten kan leng ve ang,
Zoram nuamah.

2. Turnipui tawng lo ten run thim belh reng chu,
Dawnin thinlai zochhum ang a lo zing leh si,
Chhun ni a rei, zan khua a rei ti chung zelin;
Tlaini kan leng leh thin, khartung sawn lo tein.
 3. Eng dang vang a ni lo, kharkhip chhunga len chu,
Ram kalsiam vang lo ni, ngun kual hreng nun te hi,
Awmhar hnemtu, kei ka ngun kual leh khaidiat te,
Zam lo ten bel tang e, Zoram tan tiin.
-

KALLAI BANG THEI KAN NI LO*Hriatloh*

1. Hmanah pi pu chena kan ram Zoram nuam,
Tunah a dang chuang lo rualduh te;
Mahse enteh, sual ral lian hnuaia kunin,
An auh che hi i chhang dawn lawm ni ?

I phatsan dawn em ni, thangthar lungfing,
I bei zel ang hmelma sual ral lian hi,
Thisenin an lei tawh lungduh ten,
Kal lai bang thei kan ni lo.

2. Aw kan thlang ta Zoram nang chhan che hi,
Chakna leh finna nei lo mah ila,
Hmangaihtu Lalpan hma a hruai anga,
I zalenna tur kan bei zel ang.

3. Kan ram leh hnam tan i bei zel ang,
A eng ngei ang kan zalenna ni chu;
Tunah sual hruai chhiatin awm mah ila,
Lalpa Pathianin dikna chu a hria e.
-

TAWH LEH NI TUR

K. Vanlalaauva.

1. Awmhar chang ni hianin,
 Thinlai a na, ka nghilh lo aw kan nun,
 Ramdaia chham ang zal chu,
 Aw Zoram nang vang a lo ni.

 Aw Zofa leng zawng te,
 Tho ru hrehawmnain a tuam vel te,
 Rualduh sam ang then hnu zawng te;
 Tawh leh ni tur kan thlir bang lo.
 2. Vangkhua lungduh lenna,
 Tawn changin hrilh a hai, doral lian iang,
 Ka tawng lo runpui lum tur,
 Tawnmangah tal tawn ni awm maw.
 3. Ka nghakhlel lungduh te nen,
 Hlimzai vawra len hun kan ram ngeiah,
 Hrehawmna zawng hlip tawhin,
 Zoram par tlana kan len hun.
 4. Aw Zoram nang hi maw,
 Lungduh lenrual lungngaia ka thenna,
 Lungngaihna zawng hlip tawhin,
 Hlimna thleng se Zoram ngeiah.
-

KAWRVAI NUN AN CHANG ZO TA

Ngursailova

1. Aw Zoram mawi leh duhawm,
Tlawmngaihna par ang vulna,
Sualna thlipui lo hrangin;
Kawrvai nun a chang zo ta.

En teh an lo ding chhuak leh ta,
Mihrang val rual ram hmangaih te,
Sayichhiatna tinreng phur zovin,
Zam rel lovin an kal zel e.

2. Pi pu thlafam chang hnu te,
Lo tho leh se engtin ngai maw,
Ka ngaingam lo zonun par,
Uata chul zo mai tur hi.
 3. Thlang kawrvai chang mai lo hian,
Aw Zofa zawng te harh ila;
Kan ram boral tur chhanin
Suihlung i rualza ang u.
-

ENCHIM LOH ZORAM NUAM

Capt. D.Thangliana

1. Enchim loh Zoram nuam ka hmangaih che,
Tunah soal chhumpuiin chim mahse;
A la kiang ang Zofa te kan hlim nan,
Hrehawm tinreng chu ka tuar ang.

Aw ka lenrual lungduh zawng te,
Ka sawm vel e, kan ram tana do turin,
Kan hnam nunmawi leh tlawmngaihna hlu,
Hnutiang chhawn hnu par ang tivul turin.

2. Aw Lalpa, kan dilna tlawm ngaithla la,
Kan ram i lalna atan ti a;
Zofa lungtual zawng te kan hlim ve nan,
Zalenna min neih tir ang che.

3. Aw kan lenrual lungduh then te zawng chu,
Nghilh loh biahthu suanglunga remin
Kan rawn hlan e, Lalpa i ram mawiah.
Chawimawina te lo hlan ang che.

CAPITAL ZOTLANG

L.T.Muana

1. Tual kan lenna Zo khawpui,
 Chung Pathian ruat rengin,
 He tlangah hian lo ding che
 Zo hnam bulpui atan,
 Aw i mawi e, Zo khawpui zaia chawi i mawi reng

Kan ngai chuang lo sappui leng pawh,
 I chhunga leng zawng hian;
 Zo hnam thlir ber leh nghahfak,
 Thatna chang hi vawr rawh.

2. Aw Zo khawpui leng zawng te harhin lo tho ula,
 Hun tha kan neih chhung hianin,
 Vullai kan chuai hma hianin,
 Zo hnam tan kan thawh tur chu muang lovin i thawk ang.

Kawrvai reng reng an ngai chuang lo,
 Zo nam timawi turin,
 Kemahni Mizo ngei hi
 Kan tul ber zawk a ni.

3. Hranglam ngam val zawng an lian kan hma an hruai,
 Harhin tho ru leng zawng te;
 An hma bak hlen turin
 Zo hnam tan kan thawh tur chu muang lovin i thawk ang.

Hnam riangvai kan chan zawh hma hian,
 Dingin inralthuam ang,
 Kemahni Mizo ngei hi,
 Kan tul ber zawk a ni.

M.N.F. DAY HLA

Capt. D.Thangliana

1. Chinlai rualduh Zofa zaleng zawng ten,
I lawm ang u he ni ropui hi;
Zaiin kan hril zel dawn e khuavela'n,
Sakhming mawi leh hlu kan Zoram tan.

Aw par ang vul la sakhming mawi,
Kan lawmlai pian cham chawitu hming hluan,
Zofa thinlai dumtu ber i lo ni,
Dam reng la MNF dam reng rawh.

2. Zata chawi lai hming mawi par ang lawma'n,
Chhak, thlang, chhim, hmara leng Zofa zawng,
Kan sawm e ram leh hnam chhan val rual hian,
Suilung rual ten hlim zai vawrzaa'n.
 3. Aw hlimin i lawm ang he ni ropui,
Zoram zalenna thlen tura'n,
Chung Khuanu leng hualhimna a zarah,
Par ang vuil zel ang che Zoram tan.
-

I ZAL TA MAW KAN RAM TAN

L. Duhawma

1. Lunglam ka vai tinkim dawn chang ni hian,
In zal ta maw piallei thuahriat kara'n;
Nghilh ni reng awm dawn lo lungduh te,
Ngaihlai a zual sulhnu fan changin.

In zal ta maw kan ram tan,
A chuai zo ta in nun mawi,
Mahse a tul si thin;
Kan hmangaih Zoram tan,
Malsawmin vur ang che Lalpa,
Kan thisen luang zawng hi.
 2. Khuarei an chang zo ta kan hlim lai ni,
Ka ngai mang e piallei khartung sawn hnu;
Kohkir ka nuam thinlai dam ve nan,
Tharin vul leh se aw kan ram tan.
 3. An riang chuang e lungduh thlafam chang hnu,
Nemrang puan chawi lo ten in zal ta maw ?
Fan ka nuam piallei khartung sawnin,
Hlan ka nuam mihrang tawllhpuan ngei.
 4. In chun leh zua ten engtin ngai maw,
Lo ngai ru fam chang chun leh zua te u,
An zal ta piallei thuahriat kara'n,
In malsawm dawn in hraileng ngei kha.
-

ZALENNA NI KAWL A ÆNG NGEI ANG

Jordana A.O.

1. Lawi ang kan than kan ram hi kan ta,
 Val an hrang khuavel deng kim ngei e;
 Dan sual atna puån ang hnawl turin,
 Chengrang chawiin thanhawl val an tuan.

 Pathian leh kan ram tan rinawm takin,
 Dikna puanzar ropui chu chawin
 Zam rel lo ten hmatiang an sawn zel,
 Zalenna ni kaw l a æng ngei ang.

 2. Nunrawn zetin leh sual chi tin phur,
 Thlang kawrvai tui ang lo lian é;
 Thudik tan thil tha ti lungrualin
 Pal ang kan dan an la nem ngei ang.

 3. A lo eng ang zalenna ni kawlah,
 Hnehna ropui hrang kan lam ni chuan;
 Pathian leh kan ram tan tang lo chu,
 Suihlungphangin an la nem ngei ang.

 4. Ram chhan thihngam val an hran laiin,
 Suihlungphanga kawrvai lo bel chu;
 Ziaam fengin tahpuan lo khawng se,
 Nuthaiah hual se thanhawl val ten.
-

ZALENNA KAN TAN*K. Vanlalaauva*

1. Chhan tlak ram i neih hi muang lo la,
Hnam eiral tum thim lal chuanin;
I velin kulhbing an siam e,
Zofa te tho ru a tlai hma hian.

Tho ru, lengrual tin leh zirlai te,
Kan hnam damna kawng a inhawng;
Kan thiam kan finna zawng,
Ram leh hnam damna tur,
Kal chhuak la kaw! a eng ngei ang.

2. Thiam tin zir lo sang zel mah la,
Khuavel pawh hel mah langin;
I hnam a dam si loh chuan,
A thlawn a ni i ropuina.
 3. Van hnuai lei chin hringmi zawng te tan,
Hnam zalenna pek kan ni;
Kan dang chuang lo Zofa te,
Zalenna kan tan ruat a ni.
-

ZAH ULA CHAWIMAWI RAWH U

Sangkhumi

1. Kan Zoram zalenna leh dikna tungding leh turin,
 Vangkhaw nuam run-in lum;
 Chhungkhat leh thenrual te,
 Ngai lo iang hnutiang an chhawn
 Ram chhan val rualin,
 Tuklohram lentu karah riah run an rem.
 Zah ula chawimawi ru,
 Zofa leng zawng ten (v-3)
 Zoram chhan chhuihthang val rual,
 Mihrang chuang hi.
 2. Hmelma lian, doral lian karah
 Chengrang hnamchem an chawi,
 An duai ngai lo an zam ngai lo rual zawng laiah,
 An thisen an tha leh tui,
 An nunna an theihna an hlan ta,
 Saltang Zofa te chhuah turin.
 3. Sik tiauchhum, turni hrang sa leh,
 Khuangruahpui hnuaiah pawh:
 Riah run remna piallei hmun rem an tawn hma chuan,
 Ramsa hlauhawm leh ramhnua hnim pik,
 Hling nei zingah pawh chhuntiang zantiang,
 Pawh dawn lovin an kalzel.
 4. Chhuan tam nghei zanmu chhing lo,
 Hrehawmna hnuaiah pawh;
 Phunnawi lovin hlim ten hmatiang an sawn zel c,
 M.N.F. val rual hi,
 An than lai sang zual zel rawh se khuavelah.
 5. Mahse aw thinlai a na, kim ten dawn changin,
 Ram leh hnam tana nunna pe lungduh te kha;
 An kir lawng zalenna ni kawlah her chhhuak mahse,
 Khuanu leng chawimawina lo hlan ang che.
-

ISUA CHRISTA LO LAL RAWH SE

C. Lalthangvunga

1. Aw Lalpa i hmangaih Zofa te hian,
Leilung pian tirh ata chhandamna kim;
I lo buatsaih avangin kan lawm e,
I hming chu fakin awm rawh se.
 Aw kan Zoram dung leh vangah,
 Isua Christa lo lal rawh se;
 A ma hmingin zalenna hlu,
 A ma zarah chhandamna kim,
 Kan lo chan ve tak avangin
 A hming ropui fakin awm rawh se.
 Kan ram rorelna khawl hi
 Isua Christan chelh tlat rawh se.
2. Aw Lalpa, i hmangaih Zofa te tan,
I thlarau thianghlim rawn tir zel ang che;
Rin vanga chhandama an awm theih nan,
A kin ta tiin i tlak tawh si.
3. Aw Lalpa, i hmangaih Zofa te hi,
Hmana Israel fa te i hruai laia;
Mei leh chhum dinga i hruai ang khan,
I mi te min hruai zel ang che.
4. Aw Lalpa, i hmangaih Zofa te hi,
I hmangaihna thianghlim hriattir ang che;
An tan Kalvaria i tuarna kha,
Hriattirin puang nawn fo ang che.
5. Aw Lalpa, i hmangaih Zofa te hi,
Dam lai ni chhiar dan min zirtir ang che;
Chutin nangma rawng kan bawl kumkhua ang.
Chatuan thlenga i hming fakin.
6. Aw Lalpa, i hmangaih Zofa t hi,
I ralthuam famkimin min thuam ang che,
Chhung lam leh pawn lam hmelma zawng zawng te;
I hming vanga hneh zel turin.

MIN CHAWI RAWH KA CHAU EM MAI

Capt. Chhawntluanga

1. Ka nu duh tak i hrai riang chawi,
Ram chhanin ka par a chuai;
Hlim leh lawmin ka muhil ang,
Min chawi rawh ka chau em mai.

Ka nu duh tak i hrai riang chawi,
Min pawm la i awm nghengin,
Hmangaih kutin min kuangkuah la;
Min chawi rawh ka chau em mai.

2. He khawvel thlaler atang hianin,
Angel ho zai ri ka hria.
An zinga telve ka chak e;
Hmangaih par mawi tlan turin.
3. Ka nu duh tak kan inthen dawn,
Van khawpui chu pan turin;
Tah chuan mittui zawng zawng a hul ang,
Thukna thlan ropuiah chuan.

Chham tur

Tunah hian kan ram leh hnam tan,
Ka loin hman ve-na chuan:
Min liampui dawn ta e,
Van kawthlerah khian
Angel te nen kan lo hmuak tawh ang che.

MANGTHA CHIBAI LENRUAL TE U

Lalhnuna Tirhkoh

1. Hmanah Zoram nuam leh hmun mawi duhawm,
 Tunah erawh lungmawl luat vanga;
 Sal tanna rapthlak hnuaia kunin,
 Chhanchhuahna lamtluang zawhin Zofa te,
 Harsatna leh buaina tinreng karah;
 Mihuai thisen far nen kan Zoram tan.

Mangtha, mangtha, chibai lenrual te u,
 Kan Zoram tan in nun hlu in hlan hi;
 A ropuiin a va hlu em Zofa te tan,
 A thlawn lo, a thlawn lo,
 Hmangaihna thisen luang.

2. Aw Zoram tana nun pe zawng te u,
 In thisen hlu chawl rih mah sela,
 In hmangaih Zoram nuam leh duhawm
 Parin a vul zel dawn Zofa leng te tan hian,
 In thawhrimna a thlawn lawng khuavelah,
 Mangtha, mangtha, chibai lenrual te u.
-

AW KAN PHAL LO

Lalhlupuii

1. Dam takin aw tiin sam ang kan inthen a,
 Kan hma lama hun lawmawm thlen beisei chungin;
 I chun leh zua then leh rual chinlai unau te,
 Tawn leh beisei chung zelin maw i liam tak le.

Aw kan phal lo, kan phal lul lo, aw i chan hi,
 Aw i sakhming rial ang dai tur kan ngaingam lo;
 A mi dailam rawnah famkhua i chang ta maw !
 Aw i sakhmel dar ang tawn ni a awm tawh lawng.

2. Chun nunnemi'n i tang vuanin han chul vel se,
 Lungchim takin aw hmangaih ten bawihawm ve se;
 Thinlai a fan lunglai a na, tuar thiam a har,
 Tukloh ramdai mah riak ten maw i lo nghah le
 3. Lenrual duh te in vul lai ni a tawi lua e,
 Tunah tapin lo inthen rih mah i langin;
 Thihna lui piaah khawpui mawi chu kan thlen hunin,
 Lenrual lungduh inthen hnu te kan intawk ang.
 4. Aw kan lenrual lungduh zamual liam ta te chuan,
 Thang leh thar tuai ang lian tur te nau ang nuih nan,
 Kan waviin ni hi in naktuk atan kan hlan;
 Tiin biahtu anka nem ten mkn lo chhiah ta.
-

PI PU CHENA KAN RAM MIZORAM

Dozingu

1. Pi pu chena kan ram siamtu ruat reng hi,
 Kan thlang ber thin che ram dang zawng aain,
 In hmangaih leh dikna rinawmna hmangin,
 Lungreal te in hma lam ipan zel ang.

 Kan ram leh hnam awmdan tur ngaihtuahin,
 Chung Pathian hnenah i hlan zel ang.
 In hmangaih leh dikna rinawmna hmangin,
 Lungreal te in hma lam ipan zel ang.
 2. Mahni hmasialna leh thamna eiruk te,
 Hnawlin awm tawh se Zoram thar nuamah;
 Hei hi kan tum ber lo ni fo zel sela,
 Dikna hi kan ram tan ni zel turin.
 3. Kan nghilh thei lo che u, lungduh kal ta te,
 In ram in hnam tan nun in hlan ni kha:
 In thisen auh zalenna kaw! lo enin,
 Dawn a tam hnutiang ngaih a thar zel ang.
 4. Harh ru aw hnam mipui zaleng zawng zawng te u,
 Kan zalenna kaw! lo enna turin;
 Lungreal takin chawnban zai i vawr ang u,
 Kan ram aw Mizoram ka ngai ber che.
-

INDEPENDENT KAN ZORAM TAN

Laltanpuia

1. Aw nang kan Zoram min hruaitu rinawm chuan,
Buaina leh lungngaihna karah huai takin;
Kan ram tan zalenna rawn thlen la,
Tuna i hming thatna hi kumkhuain a dai tawh lawng.

Aw hmanhmawh la, aw kan nghakhlel,
Sappui lian leh thlang kawrvai;
Zaleng lungrualin kan ngai lawng,
Engtikah nge kan chanve ang ?
Kan zalenna Independent,
Independent kan Zoram tan.

2. Kan fing kan var ta, kan thiam a sang zel,
Kan dan mawi tlawmngaihna hi chhawm zelin;
Rinawm leh huai takin hma lam i pan zel ang,
Thlang kawrvai dan thim hnuaia kan hnam a boral hma hian.
 3. Kan tum, kan beisei kan chakna zawng zawng nen,
Kan pen, kan kal lui tawh dawn tuilian angin,
Kan hnam leh ram tan thisen chhuahna kan hlau lo;
Mahse kan himna chung Pathian hnenah i dil fo zawk ang.
 4. Aw Israel hruaitu ropui Lalpa chuan,
Hekna leh sawichhiatna karah huai takin;
Aw chakna thar chuan MNF himin thuam la,
Khawvel hnamze tinreng ten i hming an chawimawi theih nan.
-

ENGVANG NGE TIIN KA ZAWT A

R.Khawpuithangu

1. Hawh u i bei zel ang,
 Ram tan engpawh huam zelin,
 Fam dairial chang tawh te sulhnu
 Chhui chung zelin i bei ang

 Engvangin nge tiin ka zawt a,
 Ram leh hnam vang a ni,
 Lungngaih lusun kan chan,
 Tiin min chhang a.

 2. Thlafam chang tawh hnu te
 Thlafam chan chhan hi ka chhui
 Chhuak ngam lo, ram leh hnam tan hian,
 Mihrang val rual an ni zawk.

 3. Nang zawng thlang kawrvai bel,
 Ram leh hnam phatsan i ni,
 Ka hawi ngam lo piallei thim bel,
 Mihrang val rual ho zingah.

 4. Thlafam chang tawh hnu leh,
 Dairial chang hnu zawng te,
 Chung Khuanun seng ngei se ka ti,
 Thlafam vangkhua ngeiah chuan.
-

ANPAI JAIL RUN

Aichhinga Jorhat Jail

1. Ka dawn sei ngam lo kan chan tawk,
Khuanu rel reng em lo ni?
Chhunni kan leng zantriang khumin,
An sawi an-pai Jail run hliapah.

Biahzai kan rel thiam lo,
Anpai zaleng zingah;
Ngaihlai a zual lungduh te nen,
Chengrang chawia chhingkhual kal lai ni leh,
Doral lian kan tawn lai ni te.

2. Lunglai muantu rualduh te kha,
A na lua e kan chan tawk,
Hlim thing belin laikhum an zal,
Chumchi leng leh khuangruah karah.
 3. Mal tin sawmtu chung Khuanu leng,
Zoram hmangaiha rammu te,
Pheisen ralman saltang te nen
Hlim ten min hruai khawm leh ang che.
-

MILITARY TRAINING SCHOOL

Capt. Ngursailova.

1. A mileng thiam thang zirna vang khawpui,
Sumtual zau lai dar tuah run sang mawi,
Mihrang thiam zirna buannel ramdai;
Novar leh ziatial an lenna.

Aw sual do dikna changtu ten,
Pheilai khawm chengrang an chawi.
Thiam tin anzir zalenna tur atan,
MTS dam rengrawh Zoram tan.

2. Kan sawm vel e, rualduh zaleng zawng te,
Mahni thanlai hnuthiang chhawn ve a.
Chengrang chawia hlim thing bel ve in,
Mihrang kal lai rel Zoram muantu.

3. Thangthar nun sual te siamtha turin leh,
Hmelma doral hneh zel thei turah,
Aw Lalpa nanging min pui zel la,
Remna leh muanna lo leng rawh se.

SA LOAH CHUAN TUI BER MAI

Saithangputia sailo

1. Chhang ei tur kan va duh tak em,
Chhang ei lo val kan riang chuang e,
Ei mah ila kan chak leh si ;
Zaikung nu i deng dawn lawm ni.

Tuibur chu tuibur a ni a,
Kurtai pawh kurtai a ni a;
Chhang zawng chhang i ni na nger e,
Sa loah chuan tui ber mai tui ber mai.
 2. Chhang deng leh deng lo i hriat duh chuan,
Mi sum kotlang en zel mai rawh;
Chutah a lo pawt phawt chuanin,
Tih dan i hrethiam mai lawm ni.
 3. Chhang deng in in hriatreng tur chu,
In ei hmain ngaihtuah ula;
Mizo Army'n an duh em kha,
Khawng e i ko teh ang tiin.
 4. Chhang ei tur kan tawn chang chuanin,
Manager in an siam vela,
Chutah kurtai a han thet a,
Kan hmeh belhbawm kan chhawk hmawh thin.
 5. Chhang ei tura han khuk ruai hi,
A nuamin a va nuam tak em !
Chawlnhia chhang ei loh hi chuan,
Kan chak lutuk kan khusun thin.
-

A BUILDING CHU ZORAM DUNG LEH VANG

Rongura

1. Lalpa, Zoram i tan kan hlan,
Vul zel rawh hma lam pan zelin,
Min khawngaih mal min sawm sak thin.
Malsawm tinreng a luang liam,
Kan Zoram dung leh vangah hian.

Zaleng naufa lenrual rial ang,
An dai zo ta, thinlai a hnim,
Tangah min chhun ka ngai mang e,
Hmana nun hlui a thamral tawh hnu.

2. Ram hmangaihtu val lungrualin,
Chengrang chawiin an her liai e'
Saw hmar thimpui hma tawn zelin;
Chengrang au rawl tlang tin thangin,
Hma an sawn zel zam rel lovin.
 3. Lungmawl sawrkar hmelma lianin,
Pheisen ralthuam tha ber hmangin,
Min doin min cheksawlh mahse;
Kan zam dawn lo, kan kal zel dawn
Lalpa kan hmaah a ding tlat.
-

THLAFAM CHANG HNU TE

Capt. Ngursailova

1. Zoram leh hnam tan thlafam chang hnu te,
In hriatreng nan suanglung remin;
Thaikawi biahthu kan rawn hlan,
Kumtluanga nghilh loh nan kan ti.

Aw Zoram leh hnam tana tuar zova,
In hmabak chu thang leh thar te,
Chhunzawm zel tur atana dah a,
Nunna hlu tak hlan ta te u.

2. In hmaah kan lu te rawn kaikunin,
Zoram tlan nan in thisen luang,
Thang leh thar lo lian zel tur te tana
Vul lai hring nun in hlan hi.
 3. Chhingmit rauthla ai angin cham,
Nghilh ni reng in awm dawn lo,
Khuarei kum sang pawh ral mahse,
Nghilh ni reng in awam dawn lo.
 4. Lungngaih, mangan, hmuhsit tihduhdahna,
Zahna tinreng tuar zoin,
Thang leh thar min hmangaih vanga maw,
Kan nghilh lawng kum sang pawh ral se.
-

THLAMUANG TAKIN AWM RAWH U

Sgt. Lalringa

1. Kan lungngaih hrehawm mangan lai pawhin,
Kan hrehawmna hliahkhu turin,
Englaipawhin ka Lal Isua duh tak,
Ka hmaah hian a ding reng a ni.

Kan Lal Isua duh tak aw mawi chuan,
Thlamuang takin awm rawh u min ti;
Aw a va mawi em ka Lal aw chu,
Thlamung takin awm rawh u min ti.

2. Ram tana Tan In khur thim nghaktu te u,
Lungngai leh beidawng mai lovin;
Lal duhawm aw mawi tak chu ngaithla ru,
Thlamuang takin awm rawh u min tih chu.
 3. Ram chhantu zaleng val rual zawng te u,
Ral hlauhawm leh thihnaah pawh;
Thlamuanna Lal aw mawi chu ngaithla ru,
Thlamuang takin awm rawh u min tih chu.
 4. Aw Zofa leng rualduh zawng te u,
Kan ram tlu hnu tungding turin;
Hrehawm tinreng tuar thin mah ilangin,
Thlamuanna Lal aw mawi chu ngaithla ru.
-

MAHRIAK TEN PIALLEI THIM RUN

Capt. Ngursailova

1. I dungthulin ka hrai riang dan i har lua e,
Thla i fam Zofa nau ang nuih nan;
Hnam kalkham kawrvai doral pawh tunah,
Tui angin an lo nem tan ta.

I rual duh ten an vangkhuaah,
An chun leh zua run an rawn bel;
Aw khawiah nge ka hrai duh leng ve kha ?
Mah riak ten piallei thim run a nghak ta.
 2. Bawhar mah hian zankhua lo tlaiin chun an bel,
Ka hraileng ve khan chun rawn bel ve maw !
Hrinhniang an liamna tlang zalam pheı saw,
Kei zawng ka thlir bang thei dawn lo.
 3. Theih chang se chungmu iangin han leng thiam ila,
Awmhar zual chang ni hian fan ka nuam e,
Rairah chhawlbuk run an remna tlangah,
A rauthla tal ka tawng mahna.
 4. Lenrual zawng te chhungkim dar ang leng zain,
Zalenna ni par ang an lawm ang a;
I chun erawh nau angin ka tap ang,
Aw hrih ka hai sei dawn mang e.
-

U.T. TE LEK LEK

Hriatloh

1. Hmanah kan Zorm hrehawmin a tuam,
Zalenna kan sual tantirh lai khan.
Kan ram riangte hi puan ang chul turin,
Ka dawnin lung reng a awi thei lo.

Aw Mizo U.T. te lek lek kan ram tan,
Kan thlan loh khawp hi, kan duh ber zalenna,
Kan ram leh hnam tan hian kan thlang kei zawng,
India vai hnuai atan ka phal lo che.

2. Zalenna nge min pek dawn boralna,
Tia zaleng ten an dawn laiin,
Ai ang kan thlang lo aw Mizo U.T.
Par ang hian i vul leh si a.
 3. Zawnha ka siam a, min chhang la U.T.
Par ang i vul chhan ngei mai chu,
Keini zalenna party pawl te chuan,
Kan hnawl dawn India vai U.T. hi.
-

A PAWI EM MAI DENGAMAM

L.Ramhluna

1. Ram leh hnam vanga riang hlei hluan Zoramchhuana,
Zawl khawpui vangkhoa hnutiang i chhawn,
Ngai lo iang Jail run thim maw i nghah ?
Suihlungphang lawng che thim lal tawnah

A pawl em e, Dengmam i riang lua e,
Thlang kawrvai doral vanga maw rairah i chan,
Zalenna ram chhan chhuihthang valmawi,
I anka nem nghilh ni awm lawng e.
 2. Ram hmangaih i rumna zawng zawng nghilh rual loh chu,
An haider lui si khawvel zawng hian,
Sawichhiatna tinreng chu phur chungin,
Hling lukhum phiarin an khum tir che.
 3. Babulon saltang kan zalen ve na turin,
Chhuihthangval lenmawi zaleng chhingtun
Buaina Jordan lui ral ram nuamah,
Min thlen ang che aw zaleng zawng zawng.
 4. Tunah chauvin tap leh rumin leng rih mah ıla,
Nakinah khua a lo var hun chuan,
Zoram thar mawiah lungduh te nen,
Ram thar par tlanin kan leng za ang.
-

KAN PHAL LO KAN TIAM LO

V.L.Thanga

1. Dam takin kan inthen a,
Nakin hun lawmawm chu thlirin,
I chhung te leh i lenrual duh zawng te,
Tawh leh beiseiin mual i liam.

Kan phal lo, kan tiam lo,
Aw i sakhming rial anga dai tur,
A mi dai lam rawnah lungphang takin,
Mual i liam ta hi a na kan ti.

2. Chun nun i tang vuan sela,
Hmangaih ten bawihsawm ve ila,
Thinlai a na hmelhriatloh kara'n maw !
Awm khawhar mahtea i zal le.
 3. Then har i tih zawng pela,
Lalpa chatuan pan mah ni la,
Lei hringnun hian ngaihda a thiam nem maw,
A tawi lua i vul lai ni.
-

KA NGAI THIN FAM CHANG HNU

Hriatloh

1. Suihlung phang loten,
Chhawlbuk run ka nghak mah ten,
Lenrual lungduh fam chang hnu,
Dar ang tawn ni her leh se.

Ka dawnin ka ngai thin fam chang hnu,
Koh kir theih chang se hlim ten,
Leng ila Zoram lungrualin,
Tu dang ngai hian ka ring lo.

2. Hmanah lungrual kim ten,
Hmelma doral lian kan tawn a,
Tunah fam an chang ta Zoram tan,
Tawnni her hian ka ring lo.

3. Angel te lenna iang,
Zoram hi par ang vul se;
Chutin kan lawm a kim ngei ang,
Zofa leng rual zawng te hi.
-

ZORAM NUAM

Capt. Malsawma

1. Kan lenna Zoram nuam zaleng zawng an kımna,
 Tu nun ngai lova tual kan lenna,
 Hnam kalsiam lungruala hmatiang kan sawn lain,
 Sual doralin tlang tin a rawn bawm e.

 Aw kan Zoram par ang tivul turin,
 I ngen ang chung Pathian malsawma;
 Hmangaihna um zelin rinawmna hmachhuanin,
 Zam lo ten i bei zel ang kan Zoram tan.
 2. Tunah doral lian chhumpui ang zing rih mahse,
 A la kiang ang Zofa te rumna hi;
 Mual tin tlang tin lungruala kan len ve nan,
 A her chhuak ngei ang chung Pathian zarah
 3. Hmelma sang sawm zinga min hruai chhuaktu Lalpa,
 I fak ang perkhuang tingtang zai nen,
 Min hmangaihna aw chuan sual thim ral lian mahse;
 Ka hruai zel ang che u tiin min tiam.
 4. Remna thlifim a lo thlen hun chuanin,
 Luaithli nula inthen hnu zawng te,
 Hawihkawm lenrual te nen kan insuihkhawm leh ang,
 Lalpan min buatsaih kan ram ngeiah.
-

ZORAM CHHANTU

Aichhinga

1. Aw saw raltiang lentupui cham dur,
 Chhuihthang val rual dar ang lenna;
 Thinlai muang ten zanmu chhingin,
 Chhun ni an leng lentu karah.
 An ngai bil lo vangkhaw lai zawng,
 Chengrang chawiin tuanzai an rel,
 Hmelma pheisen ral hian karah,
 Zofa zawng te lunglai lawm nan.

 2. Rual zawng larah ka lung min len,
 Len ve ka nuam lentu karah,
 Buannel ramdai, lenrual duh ten,
 Zuksial dar ang an chhaina chu;
 Tawn leh ni tur ka dawn thin a,
 Dar ang lenna Jarl run hlapah.
 Ngaih lai a zual lunglam ka vai,
 Chung Khuanu leng ka ngai zual thin.

 3. An leng e chhaktiang thlangtiang khumin,
 Fur khua hrehawm leh khuangruah kara'n,
 Thal ro turni hrang vung hnuarah,
 An diau bil lo, hlim lai an tlan,
 Chengrang chawia raltukin.
 An duai ngai lo khuavel chhingu,
 Zomi pheisen darteng val rual.
 Ka fak seng lo Zoram chhantu.
-

PAR ANG VUL SE

Hriatloh

1. Ram hmangaih val rual ten pheilai khawngin,
Hmatiang kan sawn zalenna tlang panin,
Chengrang chawiin ram lentu hring hnuaiah
Piallei hmun rem kan bel.

Lo eng thuai se zalenna ni,
Lungduh sam ang then hnu te nen,
Hlim ten awm leh ka nuam
Vangkaw tualah.

2. Rairah riang aw Zoram ka nghilh lawng che,
Mihrang val rual zaleng zawng te hian,
Kan tawn zel ang doral chhum zing mahse,
Par ang i vul ve hma chuan.

3. Lalpa kan hlan kan ram hmangaih i tan,
I duh angin min hmang ang che Zofa te;
Chhiarsenloh malsawmna chu min vur la,
Par ang vul se kan Zorm nuam.
-

HMANGAIHTU RINAWM

Lt. Rohmuna

1. Hmangaihtu rinawm,
Famkhua i chang hma lua.
Zoram hian a mamawh em che,
Lo kir leh la Zoram tan,
Dairialah i chang si maw ?
Lo kir leh lul rawh aw.
 2. Ka hmangaih Zoram,
Lusun reng reng hian maw,
Khuanu ruatsa reng em lo ni?
Hmangaihtu rinawm i vai e,
Ka theihna tlem hle mahse
Ka nun i tan ka hlan.
 3. Hmangaih vanga maw,
I thisen luan chhan,
Zoram leh nang ka phatsan ai chuan,
Ka nunna hian anchhia dawngin
Khawvel chhuahsan nghal se,
Zoram tan a hlu zawk.
 4. Aw Zofa zawng te,
Suihlung i rual tawh ang u,
Hmelma min diriamtu te leh
Hek ching Zoram thisen eitu;
Kan zain i bei ang u,
Kan hnam tiumualphotu hi.
-

THIAM ZIRNA RUN*Sgt. Vanropuia*

1. Kan ram kan hnam finna nau ang thang lian zelah,
An sel leh an sawi sakhming Jail run,
Val sual rual te tuallenna tia an sawi thin,
Kei ka tan chuan thiam zirna lo ni.

Rualduh zawng te u min sel lo u,
Zaleng val rual hian Jail run nghak mah ila;
Kan ram kan hnam timawi tur hian,
Kan thiam kan finna te kan hmang zel dawn.
 2. Aw lokai ve u, kan zirna run sangah hian,
Thiam leh finna chher chhuak turin,
Kan ram leh hnam tan hmasawn nana hmang zelin,
Kan sawm che u lenrual zawng te.
 3. Engdang ka dawn thei lo thiam zirna run lo chu,
Ka lunglai min hnemtu a lo ni,
Nghilh thei hian ka mawi lo khuarei chan thleng pawhin,
Mal tin sawmtu min hualhim zel rawh.
-

JAIL RUN KAN MAWI

Sgt. vanropuia

1. Biahzai rel thiam reng a har kan ti e,
Dawn lungruk duhaisam zawng a kim thei si lo,
Khuanu leng chawi hai ang thang lianin;
Pialral iangin Jail run kan ,mawi e.

Tuar thiam awm maw khuavel leng zawng zingah,
Vanglai nun leh hlim lai ni te an liam zel si;
Hai ang kan tar Jail run hliapah,
Au mah ila nun hlui kir leh reng hian a mawi si lo.

2. Zaleng zawng ten hlim lai ni an chen a,
Laitual an mawi tu dang leng an ngai si lo maw !
Chhawrthlapui leh tlai ni engmawi lawmin;
Hlim lai ni chenin zai an vawr e.
3. Kan ram leh hnam dikna puang chhuak turin,
Kan thlang, hmuhsit, elrel, sawichhiat leh awmhar run,
Dawn tam luaithlipui nulin kan vai,
Aw Zoram i dikna puang chhuak turin.
4. Aw Zoram dikna puan i zar hma chuan,
Hlim zai kan vawr thei lo zaleng valrual te hian,
A tam lua e kan ram lungngaihna,
Khuanu leng, kan rawn hlan kan Zoram hi.

AWMKHUA A HAR NGEI

Sgt. Vanropuia

1. Awmkhua a har ngei mai vawiin ni chu,
 Zawh ka nuam awmhar tinkim dawn zawng te.
 Suihlung rualza i maw khuavel ram zauah hian,
 Min zem nun hlui fam ngaih khawtlang lunglenin.

 Lenrual lungduh nau ang kan nuih pui zawng ten,
 Aw zamual liamin hmanlai min chan san ta,
 Ka hawi vel chhawlbuk zo lentu chamdel,
 Ngaiin luaithlipui nul reng ka bang thei lo.
 2. Lenkawl a thiang tlang tin a hring cham del,
 Thal favang lelte kiuin zai lo sa;
 Sirva zai mawi zawng nen suihlung an rualza thin,
 Tinkim dawn changin hlim zai ka rel thei lo.
 3. Thuva ianga kan lenna vangkhua hi,
 A chul ruai darfeng rallian vangin maw ?
 Thinlai na hian dam ni reng a nei thei dawn lo,
 Engtikah her chhuak ang maw nau ang nuih ni.
-

KA DAWN KIM LO A NI

Sgt. C.Sangzuala

1. Khawvel chu a hmang thiam te tan a lawm,
Tih ngaihndan sum leh pai ngainat vanga,
Dikna puan ang hnawla thupbo zelin,
Bum hmang kan lo chang leh mai thin.

Aw dikna lal si lo,
Aw belhchian dawl lo hringnun,
I siamtu thinlai ruk na ngei ang.

2. Dam lai hringnun pipu ang then vel hi,
I dawn Chiang ang awmlai man loh leng chuan,
Fam hnu kum sangrawn her chhuak tur leh,
Pialral kan nun thlarau chan tur.

Kan dawn kim lo a ni.
Dam chhung hun chauh em kan dawn ?
Hun her zel ngaihruat dan thiam ila.

AN KUTAH KAN HLAN TA

Capt. D.Thasngliana

1. Zoram chhantu val rual thlafam chang hnu zawng ten,
An dam lai hring nun Zoram tan hlanin,
An hmabak chhonzawm zel turin min sawm,
Ti hian min hlan biahthu thang leh thar te.

Ram leh hnam tana nunna pe ta ten,
Kan thawh theih tawk te chu thawk zovin;
Thangthar te chhonzawm zel atan,
An kutah kan hlan ta tiin.

2. Aw nghilh a har ngei thang leh thar min hlan biahthu,
An fam chhan nang leh kei leh Zoram hi;
An phal lo rial ang ral tur kan Zoram,
Ti hian min hlan biahthu Zofa leng zawng.
 3. Hrilh leh sawi mai a tawk nem maw ram hmangaihna,
Tha leh tui kan neih sum leh pai zawng leh,
Kan thiam kan finna leh chakna zawng nen,
I thawkza ang kan ram leh hnam tan hian.
 4. Aw chung Khuana leng malsawmin vur zel ang che,
Ram leh hnam chhan val rual zaleng zawng te;
Chhak thlang chhim hmara leng Zofa zawng nen,
Zalenna famkim min neih tir ang che.
-

MARTYR TE SAKRUANG CHU

K. Vanlalaauva

1. A lo thleng ta Zortam nghahfak remna kaw! eng,
 Christian pawl tin leh Party tin ram hmangaihtu,
 Mipui aiawh inlungual ten "Remna siam ru,
 M.N.F. tia an auh chu, kan zui nang e,
 Mipui te au aw kan ram tan.

Kan rawn chhawm e, Zoram vanga martyr te sakruang chu,
 Tukloh ram lentu kara chham ang zal tawh hnu;
 An tel lova Zoram luah chu kan ngaingam lo;
 Ngainn au mah ila kir tur an awm ta lo,
 An lo hlan ta an nun hlu kanoram tan.

2. An thisen man reng a lo ni Zoram remna,
 A sang ngei e, zalenna man thisen luang chu,
 Zoram tlu tawh tundin leh nan phelh tawh lo tur,
 Inpumkhatna lo ni ngei se,
 Chutin kan hnam damna tur kaw! a eng ngei ang.
3. Zofa chim leh hmar chhak leh thlang a mite u,
 Lo ngai teh u an thawm ri chu ram hmangath vang;
 Lungual takin i dinza ang ram hnarkat tur,
 Mipui te ta rorelna khawl siamtu pek ang ngei a,
 Dikna humhim tur chu.

LALPA BUATSAIH RAM*S. Vanpuilala Tirhkoh*

1. Khawvel buaina te chhuahsanin,
Chatuan in mawi lam chu panin;
Ka tan i buatsaih rammawi chu,
Aw, engtiknge ka thlen ve ang.

Khawvel buaina zawng zawng te hi,
Aw engtiknge ka chhuahsan ang,
Aw ka nghakhlel i ramtiam chu,
Aw Lal Isu min hruai zel rawh.

2. Khawvel mawina zawng zawng te hi,
Tunah par ang vul mah sela;
A mawina zawng pawh nei ila,
Chatuan atan an tling zo lo.
 3. Aw hringmi zaleng zawng te hi,
Chu rammawia cheng ve turin;
Christa hmangaihna aw nem chuan,
Aw lokal rawh tiin min ko.
 4. Hmangaih lenrual lungduh te nen,
Luaithli nulin kan inthen thin.
Lalpa buatsaih ram mawiah chuan,
Lungduh te nen kan lengza ang.
-

CURFEW KARA LUNGLEN

Rammawia

1. Hmanah buan ang pawm lai Lalnunnem,
Awmlai leng mai lo chuan min then hi ka ring si lo;
Tunah erawh Di zun leh ram zuna uai chu,
Dawn a tam ta zanmu reng ka chhing thei lo.

Aw lunglen curfew karah hian,
Tuar a har hrih ka thiam zo love,
Hmana Zoram nun leh chimloh Thadangi zun
Ngaih hian chin lem a nei thei dawn lo.
 2. Sual lei doral lo lian kan tawnah,
A hrang chuang e Bawihte i sakhmel ka then ta che,
Sakhmel tawn leh ni tur sual doral lo kian hunah,
Duh ten tangah pawmin inthen tawh lawng aw.
 3. I hlimthla te mai maw ka chan tawk,
Min hnem thin awmkhawhar suihlunglen a zual changin.
Kan karah dawt thu leng leh tlangkam a tam lua e,
Ka tahpui thin ram hriat loh chhawlbuk hnuaiah.
-

JAIL RUN THIM

C.Durthanga

1. Kumsul mah vei se hleih ten kan nun a dang lo,
Aw ka ngai lungduh zawng nen lungrual lai ni,
Mahse tunah erawh ar ang kan lawina run ve hi,
Ka dawn hian lung reng a awi thei si lo.

Engtikah her chhuak ang maw hlim ni tur,
Hei hi chantawk Khuana ruat em lo ni ?
Ka zuam lo kumtluanga Jail run thim nghah reng chu,
Sual leh thim lal nunrawng te an leng si.

2. Aw ka pianna Zoram tana tuar lai ni te,
Hlim ten lenrualduh te nen chengrang chawiin;
Hmelma doral lo lian kan tawn vel lungrual ten,
Ka ngai thin lenrual lungduh then hnu te.
 3. Lalpa i malsawmna kan tawnah vur ve la,
Hlim ten lenrual duh te nen intawng lehin,
Kan zawl khawpui tualah nau ang nui lehin,
Tah chuan tah leh rumna hi a bo ang.
-

MIZO HNAM RUN

Major Khawlhmingthanga

1. Zofa zaleng kan hlím ve nan,
Zo hnahtlak chhínlung chhuak zawng te,
Mizo hnam run rawn bel ve ru,
Raltiang kai zai kan íel ta e.

Zoram kalsiam a her lui lui,
Khawchhak, khawthlang, chhim leh hmarah,
Han thlir ve la hmatrang sawnna,
Zoram tluanah a sur seng sung.

2. Mizo hnam runah rawn lawí ru,
Chhínlung chhuak Zofa leng zawng te,
Chutin kan lawm a kím ngei ang,
Hnam damna bul tur a ní sí.

3. A mí zaleng zawng zawng te u,
Rawn bel ve ru Mizo hnam run;
Pheikhái rual ten pen zel ang aw,
Kan ram dínchhuahna thlir zelin.

4. Hnam Martyr thisen au aw chuan,
An hmabak chhunzawm zel turin;
Zofa zaleng te mín au ve,
I tho ang u, lanu val rual.
-

KA PIANNA RAM NGEI

Capt. Malsawma

1. Aw Zoram ka pianna ram,
Thinlungin ka hmangaih che;
Rinawmin lo par chhuak la
Rual zawng khumin.

Aw Zoram nuam ka pianna ram ngei,
Chhawrthlapui iang tual kan lenna,
Ka thinlungin ka theihnghilh lawng che,
I tan chauh ka inpe ang do turin.

2. Hnam kan thang kan sang zel a,
Kan dikna te chhuang zelin,
Ram kan fang zalenna
Zalenna tlangau pui turin.
3. Chhak leh thlang chhim leh hmarah,
Keini iang mihrang awm maw,
Tudang ngai lo ten,
Hlim zai kan vawr leh thin.
4. Thlang lenkaw! mihrang leng nen,
Song song manu ti zelin;
Suihlung rual ten hlim lai par,
Ang kan chen e.
5. Chhim tlangpui kan hrut del del,
Arakan BCP
Mujahit leng ten 'Kawng-re'
Biahthu min hlan.

I LONG TO SEE MOTHER AT HOME

Zoramthanga

1. I long to see mother at home,
She is the only one that care for me;
By now and then I feel the wind,
That gentle calls me through the hills.

O Dear my son come home ^{with} shake my hand,
Or else we should in heaven meet;
And only blooming flowers are left,
That thou planted to console me.

2. O! Dear mother I love thee still,
Thou still abide in me through nights and day,
But dear mother it's my country,
That keeps and calls me here to stay.

The blood of dear my friends are calling me,
It is for you, O good mother;
It is for you O thou Zoram,
That I should live and die nobly.

HLA ZAWNAWLNA

A

A building chu Zoram dung leh vang	...	...	...	152
A pawı em mai Dengmam	...	...	...	157
An kutah kan hlan ta	...	...	...	168
An-pai Jail run	...	...	...	149

AW

Aw ı hming a dai lovang	...	...	...	87
Aw kan phal lo	...	...	...	145
Aw nang kan Lal kan Pathian	...	...	...	82
Aw Mizo fa te zawng zawng hian	...	...	...	112
Aw tawnmang sı lo	...	...	...	88
Aw Zoram ı finna leh	...	...	..	108
Aw Zoram ı hming tha kha	...	...	...	97
Aw Zoram ka pianna ram mawı	...	...	...	127
Aw zui ve teh	...	...	...	111
Awm khua a har ngei	...	...	...	166

C

Chawnghawla Battalion Hla	...	...	...	99
Capital Zotlang	...	...	...	136
Curfew kara lunglen	...	...	...	171

E

Enchimloh Zoram nuam	...	...	...	135
Engtikah dar ang tawng ı maw	...	...	...	116
Engvang nge tiin ka zawt a	...	...	...	148

F

Fakin awm rawh se Halleluiah	...	...	...	85
------------------------------	-----	-----	-----	----

H

Harh in tho ru	91
Harh la Harh la	96
Hmana pi-pu chena	110
Hmangaihtu rinawm	163

I

I awi ang	90
I do zel ang	98
I long to see mother at home	175
I luang ral tur	119
Independent kan Zoram tan	147
Isua Christa lo lal rawh se	142
I zal ta maw kan ram tan	137

J

Jail run kan mawi e	165
Jail run thim	172

K

Ka dawn kim lo a ni	167
Ka hmangaih Zoram	130
Ka ngai thin fam chang hnu	159
Ka pianna ram ngei	174
Kal lai bang thei kan ni lo	132
Kan phal lo kan tiam lo	158
Kan ram hi kan ram a ni	109
Kan Zoramah Lal Christa Cross	84
Kawrvai nun an chang zo ta	134
Khawkhawm hla	93
Khuangchera Battalion hla	100
Kei ka perhkhuang	131

L

Laikhum zau	...	...	...	114
Lalpa buatsaih ram	...	...	...	170
Lalpa i tana thawktu ten	...	...	...	86
Lalvunga Battalion hla	...	...	...	101
Lenrual lungduh then zawng	...	...	...	129
Lo eng thuai se	...	...	...	83

M

Mahriak ten piallei thim run	...	...	...	155
Mangtha chibai lenrual te u	...	...	...	144
Mangtha ka thian duh tak	...	...	...	89
Martyr te sakruang chu	...	...	...	169
MNF Day hla	...	...	...	137
Military training School	...	...	...	150
Min chawi rawh ka chau em mai	...	...	...	143
Mizo hnam run	...	...	...	173
Mizoram lungphang suh	...	...	...	117
Mizoram tan	...	...	...	128
Mizo National Day	...	...	...	102

P

Par ang vul se	...	...	...	162
Piallei hmun rem kan bel	...	...	...	113
Piallei hringnun a nuam chuang lo	...	...	...	118
Pi pu chena kan ram Mizoram	...	...	...	146
Piallei thim run a nghak	...	...	...	124

R

Ram tana Martyr te	...	...	...	123
Ram tana thi te tan	...	...	...	126

S

Sa loah chuan tui ber mai	...	...	...	151
Saizahawla Battalion hla	...	...	...	103
Sialsuk khaw kang hla 1 na	...	..	...	94
Sialsuk khaw kang hla 2 na	...	...	..	95
Suanglungpuiah nghilh loh biahthu	...	...	...	120

T

Tawh leh ni tur	...	...	...	133
Taitesena Battlion hla	...	...	...	104
Thiam zirna run	...	...	...	164
Thlafam chang hnu te	...	...	...	153
Thlamuang takin awm rawh u	...	...	...	154
Tlang bawm romei	...	...	...	121

U

U.T. te lek lek	...	...	...	156
-----------------	-----	-----	-----	-----


V

Vanapa Battalion hla	...	...	...	107
Vanapa pawl kan ni e	...	...	...	105

Z

Zah ula chawimawi rawh u	...	...	...	141
Zalenna ni kawla eng ngei ang	...	...	...	139
Zalenna kan tan	...	...	...	140
Zampuimanga Battlion hla	...	...	...	106
Zoram chhantu	...	...	...	161
Zoram ka hmangaih che	...	...	...	125
Zoram nuam	...	...	...	160
Zoram par ang tivul turin	...	...	...	115
Zoram tana thawktu te	...	...	...	122
Zoram lily an thlak ta e	...	...	...	92





*Au ! I hming a dai lo pang
Thang leh thar chhuan tam leng mah se...*